

VASEGA FEOLOOLO 2018

MANATU AOA O LE TAUSAGA:

A’OA’O IA LE TAMA E TUSA MA ONA ALA

IANUARI: IA A’OA’O ATU

28 Ua talia e Nineva le tala’iga a Iona
Iona 3: 1 - 11

FEPUARI:

4 O le faamalologa a Iesu i Petesa
Ioane 5: 1 - 9

11 Ua ta’u atu e Repeka ia Iakopo le
mea e tatau ona fai Kenese 27: 41 – 45

18 Ua a’oa’o atu Iesu i ona soo Mataio 20: 20 – 28

25 Ia tausii i ala o le Alii Faataoto 8: 32 – 36

MATI: AUAUNA MA LE FAAMAONI

4 Faamaoni i le aoga e te manuia ai
Mataio 25: 14 - 30

11 O Mose le auuuna faamaoni
Numera 12: 1 - 16

18 E fesoasoani mai le Alii ia i tatou
1 Samuelu 7: 7 - 14

25 (ASO SA LAUPAMA)
Ua malaga Iesu i Ierusalema Mareko 11: 1 – 10

APERILA: A’OA’OINA MA TALITONU

1 ASO SA TOETU
E lē o iinei o Ia, a ua tu Luka 24: 1 – 12

8 A’oa’o ma faia e manuia ai

Teuterenome 6: 1 – 9

- 15 Vaai ma faatuatua i le Talalelei
Galuega 13: 4 – 12
- 22 Pa'i atu ma le talitonu moni Luka 8: 40 – 48
- 29 Talitonu i le foa'i a le Atua
1 Samuelu 2: 18 – 21

ME: O LAU FILIFILIGA

- 6 Filifili i le lelei ae lē o le leaga Iosua 24: 14 - 18
- 13 **ASO SA O TINĀ**
E viia le fafine amio lelei
Faataoto 31: 10 – 12, 26-31
- 20 **ASO SA FONOTELE**
- 27 E sili le taulaga pe sili le alofa Mataio 9: 9 – 13

IUNI: IA ILOA ALA O LE ATUA

- 3 O Iesu le ala i le Tamā Ioane 14: 1 – 7
- 10 Ua tete'e le Alii i le ala o Palaamo
Numera 22: 15 – 35
- 17 Ia lelei ō tatou ala ma amio Ieremia 7: 1 – 7
- 24 Ua usitai Paulo i le valaau a le Alii
Galuega 16: 1 – 10

IULAI: E SILASILA LE ALII I LOU LOTO

- 1 Ua faauuina Tavita e fai ma tupu
1 Samuelu 16: 1 – 13
- 8 E silafia e le Alii loto o tagata uma
Galuega 1: 15 – 26
- 15 Ia fai e outou se loto fou Esekielu 18: 25 – 32

- 22 Tatou te iloa le Atua, pe a mama loto
Mataio 5: 8
- 29 Ua liliuese le loto o Solomona
mai lona Atua 1 Tupu 11: 9 – 13

AOKUSO: FAI LE MEA E FINAGALO I AI LE ATUA

- 5 E sili le alofa i lo le taulaga Hosea 6: 4 – 11
- 12 ASO SA O TAMĀ
O le tamā fai aiga lelei Kenese 13: 1 - 18
- 19 Naunau e fai le finagalo le Atua
Ioane 4: 31 – 38
- 26 Ia o ese mai ifo i tupua 1 Korinito 10: 14 – 22

SETEMA & OKETOPA: LE ALII E, A’OA’O MAI A’U I LE TATALO

- 1 (ASO SA - TALALELEI)
O le Tala Lelei mo tagata uma
Mareko 16: 15 - 16
- 9 ‘Aua le faalialiavale a o tatalo
Mataio 6: 5 – 8
- 16 Ua toe atamai Nepukanesa
Tanielu 4: 34 – 37
- 23 Ua faafofoga le Alii i le leo o Elia
1 Tupu 17: 17 – 24
- 30 Ia tatalo mo ē o tala’i le Talalelei
Roma 15: 30 – 33

OKETOPA:

- 7 }
14 } Malologa Aso Sa Lotu Tamaiti
21 }
28 Ua talia e le Atua le tatalo a Esekia
2 Tupu 19: 35 – 3

NOVEMA: O LE UPU A LE ATUA E MAMANA.

- 4 Faalogo ma tausi le upu a le Atua
e manuia ai Luka 8: 9 – 15
- 11 Fiafia e faitau Afioga a le Alii
Efeso 6: 10 – 20
- 18 O lana upu e ola ai tagata
Teuterenome 8: 1 – 9
- 25 E faapoto tatou e le Tusi Paia
2 Timoteo 3: 10 – 17

TESEMA: O LE MESIA VALOIA

- 2 ASO SA – AFIO MAI (Advent Sunday)
Ua valoia le Afio mai o le Mesia
Mika 5: 1 – 5a
- 9 Ua o atu Iesu ma ona matua i Aikupito
Mataio 2: 13 – 15
- 16 Talia a’oa’oga ma faamalologa a Iesu
Mareko 1: 21 - 2

.....

**MANATU TAIALA IANUARI & FEPUARI:
IA A’OA’O ATU**

O le tatou faalogo ma faia a’oa’oga lelei ua a’oa’o mai ai o tatou matua ia i tatou, o le a manuia ai o tatou olaga i le lumanai, auā o faasinoga lava ia mai le Atua.

**ASO SA: 28 IANUARI 2018
(ASO SA TUPULAGA)**

MATAUPU: UA TALIA E NINEVA LE TALA’IGA A IONA.

SINI: Ia a'oa'o le fanau ia iloa le taua ma le lelei o le ola usitai, faalogo ma talia so'o se feau aoga, aua e le gata ina manuia ai le olaga, 'ae taumamao ai foi faafitauli ma puapuaga ma'i tatou.

TUSI FAITAU: Iona 3:1-10

FESOASOANI MO FAIAOGA:

Talofa tamaiti, malo le faamalolosi mai i le tatou aoga i lenei taeao. Ia tatou viia pea ma faafetaia le alofa ma le agalelei faifai pea o le Atua, ina ua tatou aulia mai ai foi le toe amataina o a tatou aoga Aso Sa i lenei foi tauasaga. O le tatou mataupu amata la i le taeao lenei, fai faatasi; **UA TALIA E NINEVA LE TALA'IGA A IONA.** Ioe, o le tala masani ua faalogo so'o ai tatou a tamaiti? O le tala ia Iona foi lea na folo e le i'a. E fia foi aso na folo ai Iona e le i'a tamaiti? Ioe e tolu po tolu ao a tamaiti? Sa faatonuina e le Atua Iona e alu e ta'u le feau i le nuu o Nineva ina ia liliu ese mai le agasala, aua ua oo i luma o le Atua a latou amioga leaga, afai e le usitai, o le a oo atu loa le malaia ia i latou. O Nineva o se tasi o laumua ta'uta'ua o le malo o Asuria i na ona po. O le ala lena na le le manao ai Iona e alu i Nineva talu ai o Asuria sa fai ma fili o le nuu o le Atua. O le mafuaaga lena na sola ai i le vaa lea na alu i Tasesa. O le finagalo lava o le Atua na ia toe faasaoina mai ai Iona mai le lafoina o ia i le sami i le taimi na afatia ai la latou malaga i le vasa, lea a na saunia ai e le Atua le i'a na te toe faasaoina Iona. O inā na usitai ai Iona ma alu ai loa e ta'u atu le feau i le nuu o Nineva. O se aai tele le aai lenei o Nineva, e tolu aso e savali ai le tagata faato'a so'o i totonu o le aai. Na lagona e tagatanuu uma le feau a le Atua e oo lava i le tupu. Na talia lelei e le tupu le feau, ma poloaina ai loa Iona nuu ina ia anapogi tagata uma ma salamo mai le leaga e oo lava i a latou manu. Ua talia e Nineva le talaiga a Iona. O le ala lea na lē taunuu ai le malaia na tuu e oo i le nuu o Nineva, ina ua salamo i latou ma liliu ese mai le agasala. Ua o latou vivii ma savavali i ala o le Atua ma faia le finagalo.

Uiga o Upu:

- i) anapogi: fa'aoge manaoga o le tino, (taofi le 'ai ma le inu mo se taimi umi). ma tuu atu i le Atua lou loto e ala i tatalo;
- ii) salamō: lagona e le tagata Iona le toe fia faia o se mea sese na ia faia muamua.

GALUEGA FAATINO:

Tali mai i fesili nei.

- i) Aisea na musu ai Iona e alu i Nineva?
Tali: Na musu Iona e alu, talu ai o Nineva o se tasi o laumua o le malo Asuria lea sa fai ma fili o le nuu o le Atua.
- ii) Pe na talia e Nineva le talaiga a Iona pe leai?
Tali: Ioe, sa talia lelei e le nuu o Nineva le tala'iga a Iona, o le ala lena na anapogi ai i latou uma e oo a i a latou manu.
- iii) Aisea na le oo ai le malaia i le nuu o Nineva?
Tali: Ua le oo le malaia i le nuu, ona ua salamo tagata uma mai le leaga a.'e ua savavali i ala o le Atua.
- iv) Sa faafefea ona tala'i e Iona le feau a le Atua?
Tali: Na savalia e Iona le nuu i aso e tolu ma tala'i atu le feau a le Atua.

PESE: Tala'i le tala moni. (Pese ma Viiga 185).

A'OA'OGA:

1. Ia talia gofie i o tatou loto le feau a le Atua.
2. Aua tatou te ola tete'e i le finagalo o le Atua.
3. Ia fai i tatou ma e fiafia e tala'i le feau a le Atua.

.....

ASO SA: 04 FEPUARI 2018

MATAUPU: O LE FAAMALOLOGA A IESU I PETESA

SINI: Ia malamalama tamaiti, o le fetalaiga a Iesu, na malolo ai le tagata ma'i.

TUSI FAITAU: Ioane 5: 1 – 9

FESOASOANI MO FAIAOGA:

Ua tuua e Iesu Kalilaia mo Ieruselema i Iutaia, aua e tataua ona auai i se tasi o tausamiga a Iutaia. A o i ai le Alii iina, na asiasi o Ia i le taelega e igoa o Petesa i le gagana Eperu. E lima faapaologa o lenei taelega, ma e toatele tagata mama'i i gasegase eseese, e naunau ia oo i lenei vai, auā latou te faamoemoe e malolo ai. O e tauaso, pipili ma isi ma'i e tele, e pulunaunau lava ia vave i le vai mo le ola, i le taimi e sau ai le agelu. Afai e oo i le aso e alu ifo ai le agelu i le taelega, ona ia faagaepu lea o le vai. I le o lē ua muamua ifo ina ua gaepu le vai, e malolo ai alva o ia, i le ma'i o maua ai. Ao i ai la Iesu iina, na ia silafia ai se tasi o tagata ma'i o taoto e latalata i le taelega. Na silafia foi e Iesu, ua tolusefulu ma le valu tausaga talu ona ma'i lenei tagata. Na fesili atu Iesu ia te ia, pe fia malolo. Ona fai mai lea o le tagata ma'i ia Iesu, "*Le Alii e, e leai lava se tagata na te tuuina ifo a'u i le taelega, pea gaepu le vai, a alu ifo a'u e muamua ifo le tasi ia te a'u.*" Ua ia faamatala atu ia Iesu le faapogai o le tuai ona malolo, ma e moomia se tasi e fesoasoani e tuuina ifo o ia i le vai. Na te le'i iloaina foi o Iesu lea ua la talanoa.

Na tali atu Iesu ia te ia, "*Ina tu ia i luga, ave ia lou moega, ma ia e savali.*" O le taimi lava lenei na malolo ai o ia mai lona ma'i i tausaga e tele. Na ia tula'i foi ma ave lona moega ma savali loa. O le mea moni e lei i ai lava sona faamoemoe e toe malolo mai lenei ma'i na maua ai. Peitai e mafai e le Atua ona taitai o tatou manaoga loloto o naunau i ai mo mea lelei. E a'oa'oina ai f oi tatou le fanau, ina ia 'aua nei ave se faa'itauli po o se mea faigata i o tatou loto, e afua ai ona una'iina oe ma a'u e lafoa'i lo tatou

faamoemoe i le Alii. E mafai e le Atua ona faailoa mai se galuega mo i tatou e ao ina fai, e ui i le tulaga faigata o aafia ai tatou i le ola.

Uiga o Upu:

i) tausamiga a Iutaia –

O faatasiga tetele a tagata Iutaia e faamanatu ai le alofa o lo latou Atua ia i latou i aso anamua. E fai ai ‘aiga ma le lotu faafetai i le Atua. Ma e o uma i Ierusalema e faataunuu ai.

O nisi o tausamiga a Iutaia o loo faamanatu pea e oo mai i aso nei:-

- Tausamiga o le Paseka ma Areto e le faafefeteina
- Tausamiga o vaiaso po o le Penetekoso
- Tausamiga o Faleapitaga (ma isi)

ii) faitotoa mamoe -

o le faitotoa e fa’aaoga e aumai ai i totonu o le aai mamoe, e sauni tuuina atu i le malumalu mo taulaga.

iii) gaepu - sa’eu ina ia gaioi ma taavilivili le vai.

GALUEGA FAATINO: PASO

Saili upu o i lalo i totonu o le Paso

agelu	faapaologa	mama’i	silasila
alu	faatalitali	muamua	silafia
ave	fetalai	malolo	savali
Eperu	gaepu	moega	tausamiga
Iesu	latalata	mavae	taelega
ifo	lima	ma’i	tauaso
igoa	luga	Petesa	tagata
Ierusalema	mamoe	pipili	toatele

upu
faitotoa

vai

taoto

vale

A	A	A	E	E	P	E	R	U	I	E	R	U	S	A	L	E	M	A	L
E	G	V	F	F	N	A	S	T	V	L	K	P	K	O	F	R	H	O	A
A	T	E	A	S	T	V	T	N	S	A	M	U	A	M	U	A	U	T	T
N	M	L	L	H	R	A	U	L	P	V	S	T	V	F	T	V	P	O	A
I	E	S	U	U	V	M	L	P	M	A	I	P	T	S	H	K	E	T	L
E	O	T	O	M	P	T	U	F	T	S	L	N	F	S	T	I	A	I	A
H	M	M	S	N	O	U	E	A	F	A	A	P	A	O	L	O	G	A	T
O	A	S	F	U	L	U	R	A	A	L	M	E	P	G	F	U	O	F	A
R	M	A	M	A	I	F	O	N	A	A	H	T	V	A	A	V	F	G	O
U	O	N	A	M	P	A	T	S	I	P	T	E	E	L	E	T	A	O	T
K	E	V	L	U	F	A	T	U	A	A	R	S	V	S	U	T	O	G	O
A	G	E	O	R	T	P	U	O	L	I	M	A	A	N	N	O	T	F	S
G	A	I	L	K	T	F	S	S	I	L	A	S	I	L	A	T	P	P	A
I	L	O	O	L	S	F	G	A	T	G	L	I	M	P	H	K	L	R	U
M	P	N	F	S	A	T	R	V	A	A	K	L	R	P	U	T	I	K	A
A	E	H	M	M	E	R	V	A	L	F	S	A	S	A	T	A	G	A	T
S	I	R	M	P	I	P	I	L	I	M	E	F	F	E	L	L	A	L	A
U	O	S	P	I	P	E	F	I	F	O	N	I	U	K	U	K	P	O	U
A	U	K	U	L	E	K	O	H	S	P	P	A	S	R	G	I	Y	N	T
T	A	E	L	E	G	A	R	F	F	F	E	T	A	L	A	I	G	O	A

Fautuaga: E mafai ona faamaea e tamati le paso i o latou aiga, pe a le uma i le vasega.

PESE: E mafai ona a’oa’o i tamaiti le pese a Lale Peteru (Punialavaa)
“Taelega i Petesa”

A’OA’OGA:

1. Talitonu i le alofa o Iesu
2. Fesoasoani i tagata mama’i
3. O Iesu lava le ola.

.....

ASO SA: 11 FEPUARI 2018

MATAUPU: UA TA’U ATU E REPEKA IA IAKOPO LE MEA E TATAU ONA FAI.

SINI: Ia malamalama tamaiti, e ao ina usiusitai i faatonuga mai matua, auā o faasinoga latou te manuia ai.

TUSI FAITAU: Kenese 27: 41 – 45

FESOASOANI MO FAIAOGA:

O le tamā ma le tinā, o i laua lava o matua e taitai se aiga i mea uma e manuia ai. E lē gata i le maopoopoga o mea uma e tua i ai le aiga, ae sili lava i lo la faiva faa-taitai o le aiga – le tausia lelei o le fanau, aemaise le a’oa’oina o le fanau i amioga tatau. O faatonuga talafeagai, o faasinoga aoga la’ua te fai atu i fanau, o mea lelei ia e manuia ai fanau i le lumanai pe a latou usitai ma faia.

O matafaioi ia faa-matua lelei na silasila i ai le tamā o Isaako ma le tinā o Repeka, ina ua alia’e mai faafitauli i totonu o le aiga, i le va o le la fanau o Esau le tama matua ma Iakopo le laititi. O le tasi aso na tupu ai le ita o Esau ia Iakopo lona uso, ona o le manuia na faamanuia atu ai lona tamā ia te ia, ae ua leai mo ia. O le manatu o Esau, o le a ia fasioti ia Iakopo i se aso ona o lana mea leaga ua fai. Manatua foi tamaiti, ua atu lua lea ona faia e Iakopo le sisio (supplan ted) i lona uso matua o Esau. Na ia fao le tofi o le ulumatua (birthright) mai ia Esau, ae o lenei foi ua ia toe fao ese le manuia.

Na iloa e Repeka folafolaga ua faia e Esau ia Iakopo, ona ia feau atu ai lea o Iakopo lana tama aupito itiiti. Na ia faailoa atu ia Iakopo, “Faauta, o lou uso o Esau, o loo faamafanafana ia i lona loto ia te oe, o le a fasioti ia te oe.” Na ia faatonu atu foi Iakopo, ina ia alu ma sola atu i lona tuagane e igoa ia Lapana i Karana ma nofō ai, se ia uma le ita o lona uso. Na faapea atu foi Repeka i lana tama o Iakopo, afai e mavae le ita o Esau ia te ia, ma galo foi ia te ia le mea na ia faia ia Esau, ona ia toe feau lea o Iakopo ma aami atu ia te ia, i le nuu o le a alu e mau ai.

Tamaiti, o le faaiuga ua faia e Repeka ia Iakopo lana tama laitiiti, ona o le ita o Esau lana tama matua, o se faasinoga tatau ma talafeagai lea mai matua, e fofo ai le faafitauli ua aliali mai i le aiga. O se faasinoga lava lea mai le Atua ina ia manuia ai le gasologa o lea aiga i le agai atu i le lumanai. Pe afai foi e alu ese Iakopo mai totonu o le aiga, o se avanoa lelei foi lea e mafai ai e Esau ona pulea ma faatonutonu lona ita, pe a nofo ma mafaufau i le leaga o le mea ua ia fuafua i ai. E le gata i lea, ae o se avanoa foi lea e tatalo ai i lona Atua mo se fesoasoani i tiga o feagai ma ia.

GALUEGA FAATINO: PASO

1. O le ata o i lalo, o lo o fa'aalia ai le auala na savalia e Iakopo i lana solaaga mai Peresepa agai atu i Karana ia Lapana le tuagane o lona tinā.
2. Faailoga i lau peni le auala o Iakopo mai Peresepa i Karana.

Fautuaga mo le faiaoga:

- E tatau ona tofu le tamaitiiti ma le kopi o le paso
- Tulimatai e lau susuga galuega a tamaiti

O le solaaga alu i Karana
Ia Lapana, le tuagane o lona tinā (o lona tinā)
Ua usitai i le faatonuga
O le faaiuga a matua
Ina ia faasaoina ai lona ola.

2. Esau ua ita i lona uso
Fia fasioti ia Iakopo
E teu pea lava i lona loto, lona sisi'o (lona sisi'o)
Matua ua la a'oa'o mai
Le fanau i le mea e ao ona fai
Tatalo i le Alii tatou te manuia ai.

(Fati –Pese aganuu a Sagone – Na ou foi atu i lena tausaga)

A'OA'OGA:

1. Aua e te taulamalama i lou uso.
2. Usitai i faatonuga mai matua.
3. Ia e ola faamagalalo atu.

TATALO: Ia faaiu le mataupu i le tatalo a le Alii.

.....

ASO SA: 18 FEPUARI 2018

MATAUPU: UA A'OA'O ATU IESU I ONA SO'O

SINI: Ia malamalama le vasega, e taua le a'oa'o mai o le Alii ia i tatou, tatou te malamalama ai i le faasinoga sa'o tatou te ola ai, ina ia tatou maua lona malo.

TUSI FAITAU: Mataio 20: 20 – 28

FESOASOANI MO FAIAOGA:

Tamaiti, o ai e fiafia e alu i le aoga a le malo ma le Aoga Aso Sa? Lelei tele. Aisea e taua ai lo tatou o i aoga? Ioe, ina ia tatou maua le poto mai le Alii. Ia tatou maua le poto i mataupu eseese i aoga a le malo, aemaise foi lo tatou popoto i tala o i le Tusi Paia.

O le tala na tatou faitau i le Tusi Paia, o lo o faamatalaina ai le a’oa’o atu o Iesu i ona so’o e sefulu ma le to’alua, ao agai atu le Alii ma i latou i Ierusalem. A o i le ala i latou, na sau ai ia Iesu le tinā o Iakopo ma Ioane, le fanau a Sepetaio. Ua ifo mai o ia ia Iesu. Na fesili le Alii i le fafine – “Se a se mea e te manao i ai?” Na tali atu o ia ia Iesu, e manao ia nofo le tasi o lana fanau i le itu taumatau o Iesu, ma le isi i lona itu tauagavale i lona malo. Ua fetalai atu le Alii i lenei au uso – “Lua te le iloa le mea lua te ole mai ai na. Lua te mafaia ea ona inu i le ipu o le a ou inu ai?” O le ipu ua saunua i ai Iesu, ua faatatau lea i ona puapuaga ma le satauro o le a feagai ma Ia. Mafatiaga ia ua le o malamalama i ai le au-uso, e mua’i fesagai ona mafai lea ona oo i le mamalu ma le paia o le malo o le Atua. Fetalai atu Iesu ia i laua – o le tagata e nofo i lo’u itu taumatau ma lo’u itu tauagavale, e le o ia te Ia ona avatu, ae ua na o e ua saunia mo i latou lea mea e le Tamā.

Na tiga loto o le au soo e toasefulu i lenei au uso. Ma o le pogai lea na valaauina ai i latou uma e Iesu ma a’oa’o atu loa i ai faatatau i le ola auauna atu i isi tagata, aua e naunau i latou uma i le fia sili (18: 1). Ua faamanino atu e Iesu ia i latou, o le tagata sili i le malo o le Atua, o le auauna i mea lelei uma. O le pule ua aumai e le Atua i tagata uma, e le mo le taua o ia lava ia te ia. E le o se pule foi e maua ai sona tamaoiga po o se pule foi ia fa’aaloogia ai o ia e isi tagata, e auauna ma se galuega. Peitai, o le pule e faia ai le tautua lelei ma aoga mo le Atua ma lana foafoaga paia. Lea lava na a’oa’o atu ai le Alii i ona so’o, o le tagata e fia muamua ia i latou, ia mua’i fai ma auauna. O le sini lea o i le talaiga ma le feau na afio mai ai Iesu. O le talaiga na Ia auauna atu ai i tagata, ma faaiuina i le aveesea o lona ola. O Ia o le taitai sa i ai lona loto faa-auauna. O le auauna na Ia iloa le galuega ua tataua ona fai, a fai loa e aunoa ma se faatonuga. O Ia lava o le auauna faatuatua ina na faapogai ma taulamua i feau lelei mo tagata uma.

O le foa'iina atu o lona ola e fai ma togiola mo tagata e toatele, o le atoaga lea o lona faiva faa-uauna. O lona ola ua tuuina atu ina ia faaolaina ai le lalolagi agasala, auā ua na o lona maliu e magalo ai a tatou agasala. O le faasinoga lava lea e tasi, ua finagalo Iesu ia ola ai ona so'o. E lē o le fia saili tulaga sili ma suesue po o ai e sili, ae ia latou iloa lelei, o i latou o uauna ua filifilia e lima ma vae i ai le galuega tala'i o le Talalelei.

GALUEGA FAATINO: Tusiga Fuaiupu.

Fa'aaoga upu o i lalo i ni au fuaiupu

1. ifo
2. saunia
3. tiga
4. uauna
5. a'oa'o
6. togiola

TAULOTO: A'oa'o le tauloto lea i tamaiti.

1. Iesu ua valaau atu i ona so'o
Sei a'oa'o atu ao faalogologo
O le tagata ua fia sili ia te outou uma lava
E ao ina galue faamaoni i lana uaunaga.
2. E manao Iesu ia tatou uauna muamua
Ola alofa i isi ma fai le tautua
O Ia lava na te silafia galuega ua tatou fai.
E tauia lava tatou e lo tatou matai.
3. Na sau Iesu ia lē uauna mai tagata ia te Ia
Ao Ia na tautua mo tagata ia manuia
Na oo lava i lona ola faamaumuina
Togiola ai agasala e tele ua tatou faia.

A’OA’OGA:

1. Tautua faamaoni i matua e manuia ai.
2. Auauna i so o se tagata mafatia.
3. Ae fia pule, toaga i lau aoga.

TATALO: Faaiu le mataupu e se tamaitiiti i le tatalo.

.....

ASO SA: 25 FEPUARI 2018

MATAUPU: IA TAUSI I ALA O LE ALII

SINI: Ia malamalama le vasega, o ala o le Alii, o le potō, o le alofa ma le amiotonu.

TUSI FAITAU: Faataoto 8: 32 – 36

FESOASOANI MO FAIAOGA:

Tamaiti, o le tatou mataupu o lenei Aso Sa, ua faamanatu mai ai ia i tatou le fanau, le taua o lo tatou tausī i ala ua faasino mai e lo tatou Alii. Aisea e moomia ai lo tatou tausī i ai? Ioe, auā e alofagia ai tatou e o tatou matua, aemaise foi isi tagata ma le Atua. Ma e manuia ai tatou i le lumanai.

O le tusi o Faataoto, sa tuufaatasia mataupu uma ua i ai e Solomona le atalii o Tavita, ao avea o ia ma tupu o Isaraelu. O le tele o vaega o lenei tusi na tusia lava e Solomona, faatasi ai ma le sao taua o Akuru ma Lemueli, o ni tagata popoto. I le tatou Tusi Faitau, ua a’oa’o mai ai ma faasino i tatou e Solomona le tupu potō, faapei o se tamā ua avatu fautuaga potō i lona atalii po o lona afafine, e fesoasoani i lea amataga o le ola. Pe afai e tausī ma le faamaoni i ai, o le ana maua lava le tele o le potō ma faamanuiaga mai nei a’oa’oga i lona olaga.

O lona uiga, pe afai tatou te maua le potō mai le Alii, ua tatou maua foi le ola. O le ola ua tumu i faamanuiaga mai le Atua, aua ua usiusita’i i le

a’oa’o mai o matua ma le Atua. E tupu i taimi uma le alofa o le Atua ia te ia, ma e fiafia foi e ola i ala amiotonu o le Atua. O taimi uma o le ola o le tagata ua maua le poto mai le Alii, e lē uma le fia faalogologo i a’oa’oga e tupu ai pea lona poto.

Tamaiti, o le poto o le faavae mautu lea ua fausia ma atia’e ai mea uma o le ola o le tagata. Pe afai e tumau le poto ma tatou faatinoina ala uma o le poto i o tatou olaga, o le a faapena foi ona faamanuia mai le Atua i lo tatou ola. E faapena tonu lava lo tatou tumau i lo tatou Alii o Iesu i taimi uma o le ola. O mea uma na a’oa’i ma a’oa’o mai ai Iesu tatou te tausi i ai, ia tatou faamaoni i ai aua o le tino lava lena o lo tatou alolofa ia te Ia. Ae sili i lona finagalo lona faamanuia mai ia i tatou.

GALUEGA FAATINO: PASO

Saili mai upu o i lalo i totonu o le paso. Li’o le upu pe afai ua maua.

ALII	FAALOGOLOGO	MAUA
ASO	FAITOTOA	MATAALA
AOAO	FANAU	POU
ALA	LEOLEO	POPOTO
AOFA	AMUIA	PUIPUI
TAUSI	TEENA	

* E fautuaina le faiaoga ina ia tofu tamaiti taitoatasi ma le paso.

A	E	A	L	O	F	A	N	A	U	O	P
A	O	L	P	U	A	M	S	E	T	T	U
N	L	A	P	I	A	U	M	S	V	O	I
I	O	S	O	N	L	I	P	I	E	P	P
F	A	U	P	I	O	A	S	O	S	O	U
E	L	I	T	V	G	R	R	A	T	P	I
P	F	A	N	O	O	N	O	L	O	T	S
O	E	L	O	E	L	V	S	A	A	V	U

S	E	I	P	U	O	T	I	A	N	S	A
H	E	I	P	I	G	U	V	T	E	N	T
	F	A	I	T	O	T	O	A	E	S	K
L	A	P	O	A	A	U	A	M	T	K	H

PESE: A’oa’o le pese lea i tamaiti.

1. Faalogo, faalogo i le Atua x 2
O Iesu ua a’oa’o mai Ia
Faalogo, faalogo i le Atua.
2. Ia tausī, ia tausī i ona ala x 2
Amuia le tagata e fa’aaoga
Ia tausī, ia tausī i ona ala.
3. Faalogo, a’oa’o ma tausīa x 2
I upu o le poto mai le tama
Faalogo, a’oa’o ma tausīa

(fati – Tulei, tulei, lau avega)

A’OA’OGA:

1. Finau ia maua le poto
2. Faalogo ma usitai e atamai ai
3. O Iesu le poto silisili

TATALO FAAIU

.....

MANATU AUTU O MATI: AUAUNA MA LE FAAMAONI

E taua le faamaoni i so o se mea o lo tatou olaga. E pei o le a’oga, galuega ma so o se feau e tuuina mai tatou te faia, auā e alofagia ai tatou e le Atua

ma Ia faamanuia mai ai ia i tatou. O le tagata galue, auauna ma le faamaoni e tauia e le Atua.

ASO SA: 4 MATI 2018

MATAUPU: FAAMAONI I LE A’OGA E TE MANUIA AI

SINI: Ia malamalama le vasega e moomia tele le galulue ma suesue faamaoni i le aoga, e faamanuia ai le Atua i o latou lumanai.

TUSI FAITAU: Mataio 25: 14 – 30
(mo le Faiaoga e suesue ai)
Mataio 25: 20 – 30 (mo le Vasega)

FESOASOANI MO FAIAOGA:

Tamaiti, o ai tagata e toaaga e fai a latou galuega i le aiga (homework) pe a aumai e faiaoga? Lelei tele. Ae faapefea pe afai ua leai se galuega e aumai e le faiaoga e fai i lou aiga? O le a la lau mea e fai? Tamaiti afai e te galue faamaoni e fai au meaaoga i lou aiga ma faitau-tusi ma faitau lau api, ona e maua lea o le potu mai le Atua, auā ua e faamaoni e suesue i le aoga.

O le tatou mataupu o lenei Aso Sa, ua faamanatu mai ai ia i tatou le taua o le ola faamaoni i so o se feau ua tuu mai ia i tatou e fai.

Na avatu e le tasi matai ana taleni i ana auauna e toatolu. O le auauna muamua e lima na tuu atu i ai. O le isi e lua taleni na avatu i ai, a o le tagata mulimuli e tasi le taleni. Ua ia faatatauina i le mea ua mafai e le tagata, ona alu loa lea o ia i lana malaga. O le manatu o le matai, ia fa’aaoga ma galueaina nei taleni ma le faamaoni, ina ia toe maua ai nisi tupe mo latou. O taleni ua ta’ua i le tatou tala, ua faatatauina i meaalofa ma ala-oa ua aumai e le Atua mo i tatou - ft – tupe, taimi, ma isi e tele. O meaalofa ua ia finagalo ia galueaina ma le potu i lo tatou malosi. E le o le tele o mea ua tatou maua mai le Atua le mea sili. Peitai, e fia silasila o Ia po o tatou faamaoni e galueaina ma faagaioi nei taleni ma meaalofa aua o le a tatou manuia ai.

Tou te iloa la tamaiti, e foi mai le matai, ma ia iloa ai le tala fiafia i tagata na galulue faamaoni, ma le tala faanoanoa i le tagata paie ma le faamaoni. O le tagata na i ai taleni e lima, na galue faamaoni, ma ia toe maua ai foi le isi lima faaopoopo. Faapena foi i le na i ai le lua, na toe maua foi le isi ana lua taleni. Ae o le na i ai le tasi, na moemoe lelei lava ma tafao solo, e aunoa ma le galueaina o le taleni. O auauna na i ai le lima ma le lua, sa le gata ina galulue faamaoni, ae na alolofa i lo la matai. Ua fai atu le matai ia i laua taitoatasi – “Ua lelei ia, le auauna lelei e ma le faamaoni, ua e faamaoni i nai mea itiiti, ou te tofia oe e pule i mea e tele, ina ulufale mai ia i le fiafia o lou Alii. Ae o le na i ai le tasi, na fao ese le taleni na ia te ia ma tuli i fafo i le pogisa.

Tamaiti, e taua tele lo tatou faamaoni ia tatou a’oa’oga. A tatou toaaga e alu i le aoga ma faamalosi i a’oa’oga, o le a tauia lava oe e le Atua. E manuia ai oe, ou matua ma o le a e fiafia ai foi e tautua ma auauna mo le Atua.

Upu Faamalamalama:

- i) taleni - o meaalofa a le Atua mo le tagata
ff – tupe, auro, ario, potu
- ii) taufaitagiaue - tagi leotele, tagi tautala
- iii) lilivau o nifo - pau foliga ma fa’aali ou nifo i le ita tele

GALUEGA FAATINO: Taliga Fesili

Tali mai fesili nei:

1. E fia taleni na avatu e le matai i ana auauna e to’atolu?

Tali: E valu

2. O ai o nei auauna e toatolu e faamaoni?

Tali: O e na tia i taleni e lima ma le lua

3. Aisea ua le maua ai se faasiliga a le isi auauna?

Tali: Aua e paie ma augata e galue.

4. O le a le tau'i o le tagata faamaoni?

Tali: E pule i ana lava mea e tele
E fiafia e fa'aaoga mea ua ia maua e auauna ai mo le Alii.

5. O le a le iuga na oo i ai le na i ai le taleni e tasi?

Tali: Na fao le taleni na ia te ia ma tuli i fafo i le pogisa.

6. Po o e faamaoni i le tausiga o ou matua ma lau aoga?

(Silasila le faiaoga i nisi tali talafeagai e aumai i tamaiti i fesili taitasi)

PESE: A'oa'o le pese

1. O taleni nei e lima, na ou galueaina

Ua ou toe maua ai, le isi foi lima

E suamalie, le faamaoni

Ua ou lagona ai le fiafia ma le olioli

2. E lua foi taleni na aumai e lo'u matai

Ia ou faamalosia e galue i ai

Ua toe maua, le isi foi lua

Ulufale maia i le fiafia o lou matai

Tali: (1 & 2)

Ua e faamaoni i mea iti

E viia ai lava lou Alii

Le auauna lelei e, faamaoni

Le malo le Atua o lou tofi

Tautua nei, aua e te toe foi x 2

3. Le auauna paie ma le faatamala

Talofa ua le afu lava ona mata

Na o le moe, fiafia i le taa

Leai ma se galuega, e faia i le olaga

Tali: Ua e le lulu mo se fua
Augata e fai le tautua
Ua e le ola fuafua
Oi talofa i ou matua
E faamasino, mai le Atua

(fati – “Ua nofo toatasi” by Suliveta Kurene)

A’OA’OGA:

1. Ia fiafia e ola faamaoni
2. Tatalo ma toaga i lau aoga
3. O le ola paie, e taunuu i le leaga.

TATALO: Faaiu le mataupu i se tatalo.

.....

ASO SA: 11 MATI 2018

MATAUPU: O MOSE LE AUAUNA FAAMAONI

SINI: Ia malamalama le vasega, e taua le faamaoni i feau tatou te faia.

TUSI FAITAU: Numera 12: 1 – 16 (mo le Faiaoga)
Numera 12: 1 – 8 (mo le Vasega)

FESOASOANI MO FAIAOGA:

Tamaiti o le ola faamaoni, o se uiga faale-Atua e finagalo o Ia ia tatou ola ai, ao tatou feagai ma galuega, o tiute ma so o se mea tatou te faia. O totonu o lou aiga, e moomia lo tatou ola faamaoni i le va ma matua. Faapena foi i le aoga i le va ma faiaoga ma galuega faa-le-a’oa’oga.

O Mose, sa tofia e le Atua, e fai ma taitai malaga, ina ua o ese mai le nuu o le Atua mai Aikupito, agai atu i le nuu folafolaina. O lona uso o Arona ao

lona tuafafine o Miriama, sa lagolago ia Mose i lana taitaiga. O ia o se tagata usiusitai i faatonuga uma mai le Atua. Ae o le mea ua tupu, ua faifai upu ma muimui o ia e Arona ma Miriama, ona o le fafine Kuso (nuu ese) sa fai ma ana ava. Ua le gata i lena, ae ua la fesiligia foi le Atua i lona fetalai ma feso'otai mai na o Mose, ae le oi la'ua. Sa le tali atu lava Mose i se upu, aua o le tagata matua agamalu lava o ia.

Ua silafia e le Atua lea mea, ona ia valaauina lea o Mose, Arona ma Miriama e fia fai se latou tala i le fale fetafai. Ua faamalamalama atu e le Atua ia Arona ma Miriama, o Perofeta uma a le Atua ua faailoa i ai le Atua i se fa'aaliga ma fetalai atu ia i se miti. Ae ua le faapena Mose, le auauna a le Atua. O ia o se tagata faamaoni i lona aiga uma, ma la te faafesagai ma ia ma talanoa i le malamalama, ae le faaliloina. Ua ia silafia foi le faatusa o le Alii i taimi uma e talanoa ai ma le Atua.

Tamaiti ua matua le fefefe lava Arona ma Miriama i le Atua ma a la tala na fai ia Mose. O le ala lena na tupu ai le ma'i lepele ia Miriama i aso e fitu.

Tamaiti, pe afai tatou te faamaoni e fai feau ma so o se galuega ua tuu mai e matua, faiaoga, faifeau tatou te faia, e moomia lava lo tatou faamaoni e faataunuu. Pe tatou te tigaina, fia aai, fia inu, vevela le la pe timuia foi, ae a tatou punonou ma le faamaoni e fai se feau, e tauia lava i tatou e le Atua, auā e fialia o Ia i le faamaoni. Aisea la e te le galue faamaoni ai i au mea aoga e te manuia ai.

Upu Faamalamalama:

- i) agamalu (humble) - loto maulalo
- ii) fale fetafai (tapenacle)- o le fale ie sa mafuta ai tagata i le taimi o le malaga o le Esoto. E mafai ona feaveai pe a sui se nuu e oo i ai le malaga.
- iii) ao faaniu (pilla of cloud)- o le ao e tu sa'o i luga, e aumai le malamalama i tagata.
- (iv) toagalauapi (camp) - o se faatasiga, mafutaga i se nofoaga tuufua.

GALUEGA FAATINO: Faafetauiga (matching)

Faafetaui upu o i le vaega 'A' i o latou uiga sa'o oi le 'E'

- | | | | |
|----|------------|----|--------------------------------|
| 1. | Arona | a. | taitai malaga a Isaraelu. |
| 2. | ava a Mose | e. | fai upu ma faitio i isi tagata |
| 3. | Mose | i. | punitia |
| 4. | muimui | o. | ma |
| 5. | ita | u. | o le fafine Kuso |
| 6. | masiasi | f. | uso o Mose |
| 7. | taofia | g. | toasa |

PESE: A'oa'o le pese lea (Oh my darling Clementine)

1. O Mose o le auuana
Faamaoni a le Atua
Taitai le malaga
A Isaraelu i Kanana
O se tagata faamaoni
Le solomuli i le oti
Tausaafia ma usitai
Auauna ma le onosai
2. Ui ina muimui tagata
Faapea o ia e leaga
Faatiga i lona loto
Fiu ai le tiapolo
Talanoa ma le Alii
Inoino ai ona fili
Fa'aali i ai le Atua
A'o fai lana tautua

A'OA'OGA:

1. Faamagalo atu i ou fili.
2. Ia faamaoni i taimi uma.

3. Ia taitai le Alii i lou ola.

.....

ASO SA: 18 MATI 2018

MATAUPU: E FESOASOANI MAI LE ALII IA I TATOU

SINI: Ia malamalama le vasega, afai tatou te talitonu i le Alii ma le loto atoa, e tali mai lava o Ia i o tatou mana’oga.

TUSI FAITAU: 1 Samuelu 7: 7 – 14

FESOASOANI MO FAIAOGA:

Tamaiti, e tele taimi o lo tatou olaga e feagai ai tatou ma mea faigata i totonu o o tatou aiga, pe afai e mamafa feau tatou te faia. E maua foi i a’oa’oga o tatou i ai. Pe afai e tele ma faigata mataupu. Tamaiti, e i ai lava faigata i so o se vaega o le olaga o tatou ola ai.

Faapena foi Isaraelu (le nuu o le Atua). E ui lava ina solo lelei le latou fesootaiga ma lo latou Atua, ae na faafetoai lava i latou e puapuaga e tele, aua ua taitai ese e tupua ma le agasalala la latou mafutaga ma le Alii. Peitai, sa toe alofa lava lo latou Alii ia i latou, auā ua salamō i le leaga.

Ao i ai la Isaraelu i le aai o Mesepa, sa latou faalogo ai i le tala, faapea ua o a’e alii o le nuu o Filisitia e tau ma i latou. O lo latou fefefe ia Filisitia, na latou fai atu ai i le perofeta o Samuelu, ina ia le mapu lona valaau atu i le Alii lo latou Alii mo i latou, e faaola mai ia i latou ai lima o Filisitia. Na usitai Samuelu i le mana’o o le nuu, ma ia avatu foi le tamai mamoe o lo o susu e fai ai le taulaga-mu atoa i le Alii.

Tamaiti, e ui ina matata’u ma fefefe Isaraelu ia Filisitia, ae na faafofoga mai lava le Alii ia te ia. Ao fai le taulaga mu e Samuelu ae ua faapa mai e le Alii le faititili taalili tele i luga o Filisitia. Na faataapepeina Filisitia uma ma fasia i latou e Isaraelu. Na tuliloa atu foi e Isaraelu nisi na sosola ma fasi i lalo ifo o Peteka. Ua ave e Samuelu le maa ma tuu ai i le va o

Mesepa ma Sena na ia faaigoa foi o Epenesa, ua fai ma faamanatu ia Isaraelu “Ua fesoasoani mai le Alii ia i latou.”

Tamaiti e a’oa’o mai lenei tala ia i tatou, ina ia iloa ai, o a faigata ma faafitauli tatou te feagai ai, e ao ina tatou tatalo ma le loto faatuatua i lo tatou Alii, auā e tali mai lava o Ia i ē ole atu ia te Ia ma le loto talitonu atoatoa.

Upu Faamalamalama:

- i) Mesepa (Mizpah) - o le aai i le ituaiga o Peniamina
- ii) Epenesa (Ebenezer)- o le fanua na tau ai le taua a Isaraelu ma Filisitia, ma latou manumalo ai.
uiga - ua fesoasoani mai le Alii ia i tatou (The Lord has helped us)

GALUEGA FAATINO: (Sailiga)

O a ni upu o i le Tusi Faitau o le tatou mataupu, e tutusa uiga ma upu o i lalo.

- 1. faatasitasi - (faapotopoto)
- 2. fefefe - (matatau)
- 3. talia - (faafofoga)
- 4. faasalalauina - (faataapeapeina)
- 5. faiaina - (toilalo)

PESE: Faamanatu le pese masani (Trust and obey)

A’OA’OGA:

- 1. E fesoasoani mai le Alii ia i tatou.
- 2. ‘Aua e te faavaivai i lau aoga.
- 3. Tatalo i le Alii i taimi o faigata.

.....
ASO SA: 25 MATI 2018 (ASO SA LAUPAMA)

MATAUPU: UA MALAGA IESU I IERUSALEMA

SINI: Ia malamalama le vasega, sa alalaga tagata e toatele – “Osana,” ina ua afio atu Iesu i Ierusalem.

TUSI FAITAU: Mareko 11: 1 – 10

FESOASOANI MO FAIAOGA:

Tamaiti, o le a foi le sauniga lea tatou te faamanatuina i le Aso Sa lenei? Ioe, o le sauniga po o le Aso Sa o le Laupama. O le Aso Sa o le malaga faatupu atu o Iesu i Ierusalem, aua o le a feagai ai le Alii ma ona puapuaga. E le gata i lena, ae o le Aso Sa ua amata ai ona sauni tagata luitaia e faamanatu la latou sauniga tele o le Paseka.

Ao latalata atu Iesu ma ona soo i Ierusalem, na latou uia ai aai o Petefake ma Petania o i ai le mauga o Olive. Na auina e le Alii ni ona soo e toalua i le isi aai, e aumai le tamai asini o lo o nonoa ai. O le asini e leai se tagata na tietie ai. Na o atu i la’ua ma tatala mai le asini o lo o noatia i le faitotoa i fafo i le ala, e pei ona faatonuina ai i laua e Iesu. Ua latou lafo o latou ofu i ona luga, ona tietie ai lea o Iesu. E toatele tagata na i ai i lea aso. O nisi ua latou fofola o latou ofu i le ala, ae o isi foi ua latou ta ifo la o laau o pama ma fola i le ala.

Tamaiti, ao tietie atu le Alii i le asini, o tagata na i tafatafa o le ala i luma ma tua, ua alalaga atu i le Alii – “Osana! Ia manuia le afio mai i Lē suafa o le Alii. Ia manuia le malo ua oo mai o lo tatou tamā o Tavita, Osana i mea e aupito i luga!” O le uiga o le upu “osana”, o le “faaola mai”. O le alalaga a tagata, ua afio mai le tupu na te faatoilaloina o latou fili ua pologa ai, pei o le pule a le malo o Roma.

Peitai, e le faapena le faamoemoe o le Atua ma le afio mai o Iesu le Alo pele. E lei afio mai Iesu o se tupu fai-taua, e pei o se tagata tau e tietie i se solofanua po o se taavaletoso e solofanua. O lona afio atu i Ierusalem, o lona faailoa atu o Ia lava o le Amiotonu, o le Faaola, ma le Agamalu (Sakaria 9: 9). Tamaiti, o sauaga ma puapuaga e oo lava i le maliu ma le toetu o Iesu i lenei vaiaso paia, sa mafai lava ona molimauina ai e tagata, e moni lava o Iesu le Agamalu, Amiotonu ma le Faaola mo tagata uma.

GALUEGA FAATINO (Faatinoga)

O le galuega faatino lava e sili ona a'oa'oina ai tamaiti, mo lenei mataupu, o le faatinoina lea e le fanau ma faiaoga - O le Malaga a Iesu i Ierusalem.

PESE: E mafai ona pepese faatasi tamaiti i nisi o pese o le Aso Sa o le Laupama.

- Faataitaiga:
1. Osana pepese tamaiti uma
 2. Tamaiti vave mai, ia Keriso ia ola ai.

A'OA'OGA:

1. Ia agamalu ma loto maulalo pei o Iesu.
2. O Iesu lo tatou Faaola.
3. Fiafia e ta'uta'u le suafa o Iesu.

.....

MANATU TAIALA O APERILA:

A'OA'OINA MA TALITONU

O lo tatou ola a'oa'oina, e taua le vaai, faalogo, galue ma maitau i le mafaufau ma le loto mea aoga ua a'oa'oina ai. Ae sili lava i mea uma le faatinoina i le amio tatau o mataupu ma faasinoga ua a'oa'oina ai.

ASO SA: 1 APERILA 2018
(ASO SA O LE TOETU)

MATAUPU: E LE O IINEI O IA, A UA TU.....

SINI: Ia malamalama le vasega, na toe soifua mai lava Iesu i le tuugamau, ina ua mavae aso e tolu.

TUSI FAITAU: Luka 24: 1 – 12

FESOASOANI MO FAIAOGA:

E manatua e outou le fanau, le mafuaaga na tatou le o ai i aoga i lena Aso Faraile! Lelei tele outou. Sa malolo uma galuega ma aoga a le malo ma Ekalesia i lea aso, aua o le aso ua faamanatu e le au Kerisiano uma i le lalolagi, na maliu ai lo tatou Alii o Iesu. Na sauva tagata ia te Ia ma faasatauro ia Iesu, se ia oo lava ina oti ma tanumia i le tuugamau.

Peitai Ia le Aso Sa lenei, ua tatou faamanatuina ai ma le fiafia le Toetu manumalo mai o lo tatou Alii i le maliu ma le oti i le tuugamau. O se vaaiga ofoofogia na iloa e Maria le Makatala, o Ioana ma Maria le tinā o Iakopo, ma i latou uma o e na o atu i le tuugamau o taoto ai Iesu. Na latou iloa ua fulieseina le maa mai le tuugamau, ona latou ulu atu ai lea i totonu. Sa latou iloa ai ua leai se Iesu i le tuugamau. Ao fememea'i i latou i lea vaaiga, sa faafuasei ona latou vaaia tagata e toalua ua oofu i ofu pupula. Ua fai atu foi nei tagata ia i latou – “Se a mea tou te saili ai le ua soifua i e ua oti’? E le o iinei o Ia, a ua tu; ia outou manatu i lona fetalai atu ia te outou, ina o i Kalilaia o Ia. E tatau ona tuuina atu o le Atalii o le tagata i lima o tagata agasala, ma ia faasatauroina, ma toe tu mai i le aso tolu.”

Tamaiti, o ave feau ia e toalua a le Atua, po o agelu foi ua oo mai e faailoa i tagata. **O IESU UA TOETU.** Na toe foi nei tinā ma e na latou o i le nofoaga o potopoto ai soo o le Alii e sefulutasi, ma faamatala mea uma na latou vaai ma faalogo i ai. E ui lava faapei se tala faafagogo e faamatala mai, ae na tu lava i luga Peteru ma momo’e i le tuugamau. Na ofo o ia ina ua iloa le moni o le mea ua tupu.

Tamaiti, o le toetu o Iesu mai le oti, o le totonugalemu moni lea o le tala faasolopito o le faa-Kerisiano. O ina foi ua fausia mai ai le Ekalesia, aua ana leai se toetu, e leai foi le lotu Kerisiano e oo mai i lenei taimi. E le gata foi i lena, ae ia tatou iloa foi, o loo soifua pea ma faatasi mai le Alii ia i tatou, pe afai tatou te valaau ia te Ia.

GALUEGA FAATINO: (Faatinoga)

E lelei foi ae faatino e faiaoga ma tamaiti le Toetu. E sili ona faatumauina i mafaufau o tamaiti le Aso Toetu i le faatinoina o le vaaiga i le taeao o le manumalo o Iesu i le maliu ma le oti.

PESE: Pese ma Viiga 48 (Pese o le Toetu)

A’OA’OGA:

1. Ua manumalo Iesu i le oti.
2. Tatou te mafuta lava ma le Alii i so o se taimi.
3. Talitonu ia Iesu Toetu.

.....

ASO SA: 8 APERILA 2018

MATAUPU: A’OA’O MA FAIA E MANUIA AI

SINI: Ia malamalama le vasega, e taua le maitau o mea lelei ua a’oa’oina ai i latou, ae silisili lava ona taua le faia ma faatinoina ia a’oa’oga i o latou olaga.

TUSI FAITAU: Teuterenome 6: 1 – 9

FESOASOANI MO FAIAOGA:

Tamaiti o ai e fiafia e alu i le aoga, (aoga a le malo, ma le aoga Aso Sa) Lelei tele. E taua lava lo tatou fiafia, faamalolosi e o i le aoga, aua e manuia ai o tatou olaga. A tatou popoto i aoga, o le a maua sau galuega lelei. E oo foi i le aoga Aso Sa, e maua ai lo tatou poto i afioga a le Atua. Pe afai tatou te popoto i nei aoaoga ua a’oa’oina ai tatou; e finagalo le Atua ia faatino ma faia nei a’oa’oga i o tatou olaga e manuia ai.

O le finagalo foi lena o le Atua na a’oa’o atu ai e Mose le nuu o Isaraelu, ao agai atu le nuu o le Atua ma latou nonofo ai i le nuu folafolaina, lo latou tofi. Afai o le a latou nofoia Kanana, e tatau ona ola matata’u tagata uma i

lo latou Atua. O lona uiga ia ola fa'aaloalo i le Atua i taimi uma. Ia tausiusi i ana tulafono ma ana poloaiga uma. O le nuu o Kanana, ua faamatalaina o se nuu e tafe ai le suasusu ma le meli, o lo o faatatauina i le matagofie ma le tamaoaiga o le nuu i ona vaega eseese. Nei avea le matagofie o le fanua ma pogai o le a galo ai ia Isaraelu lo latou Atua ma fai nisi amioga le tusa ma le finagalo o le Atua.

O le mana'o o le Atua i lona nuu, ia le gata ina faalogologo mai i le a'oa'oga, ae ia sili lava lo latou tausisi ma faia, latou te manuia ai ma matua faatoateleina ai latou. Ua lapatai atu Mose i le nuu, e leai lava se isi atua o Isaraelu. Ua na o le toatasi lava Ia. Ua iloa e Mose, o le nuu o le a fai mo latou tofi, e tele tapuaiga ma e tele foi atua, nei tosina i ai o latou loto. Lea la ua matua a'oa'o atu o ia, i le nuu ina tumau lo latou alolofa atu i le Alii lo latou Atua e toatasi. *“Ia e alofa i le Alii lou Atua ma lou loto atoa, ma lou agaga atoa, ma lou malosi atoa...”* O lona uiga o le faasinoga foi lea mo i tatou uma e atagia ai lo tatou fesootaiga ma lo tatou Atua. Ia fa'aalia lo tatou alolofa i le Atua ia tatou amioga lelei e fai i aso uma o le ola. Ia avea ana poloaiga ma tulafono e fai ma taitai i o tatou olaga.

Tamaiti, ou te iloa, o le galuega foi lenei o lo o faia e o tatou matua ia i tatou, i o tatou aiga. O lo o a'oa'o ina i tatou e matua, faifeau ma faiaoga o aoga Aso Sa ina ia tatou alolofa i lo tatou Atua i taimi uma. Ia tatou mulimuli i le Atua e ala i uiga tausaaafia ma amioga tatau i aso uma, aua o mea uma o tatou fa'aaogaina i lenei ola, o mea ua foa'i mai e le Atua mo i tatou ia tatou manuia ai. O lona uiga, e le na o na tatou o i le lotu ma le aoga Aso Sa e maua ai tala i le Atua. E mana'o o Ia, ia tatou ola ai i a'oa'oga mai ia te Ia, ona moni lea o lo tatou alofa atu ia te Ia. Fetalai ma a'oa'o mai Iesu i le Mataio 22: 37 – *“E te alofa atu i le Alii lou Atua ma lou loto atoa, ma lou agaga atoa ma lou manatu atoa.”* O le tulafono sili lea e liolio i ai tulafono uma o le Feagaiga Tuai.

Tamaiti, ua a'oa'o ina i tatou i lenei mataupu, ina ia tatou fa'aaloalo, ola matatau ma faia faasinoga uma mai le upu a le Atua (Tusi Paia), aua tatou te manuia ai ma tino ai lo tatou alolofa ia te Ia. Pe e te nofo i lou fale, savali i le auala, taoto o le a moe, ia tautalatala i le alofa o lo tatou Atua.

GALUEGA FAATINO: Faatumu avanoa.

Faatumu avanoa o i le parakalafa o i lalo i upu talafeagai ua tuuina atu:-
faatoateleina, tausī, tafe, tama, meli, manuia, fetalai.

O lenei Isaraelu e, faalogologo mai, ma ia e _____ i ai ia faia, ina ia
_____ ai oe, ma ia matuā _____ ai outou, faapei ona
_____ mai ai le Alii le Atua o ou _____, i le nuu o lo o
_____ ai le suasusu ma le _____.

PESE: A'oa'o le pese lea

1. Faalogo ma ia a'oa'o
Faalogo ma faia lona finagalo
Faalogo ma savali tonu ai
Le Atua ua a'oa'o mai

Alofa i le Alii lou Atua
Alofa ma lou loto atoa
Alofa ma le agaga atoa
Ma le malosī i tuu atu loa.

(fati – Fai sau tatalo i le taeao)

A'OA'OGA:

1. A'oa'o ma savali i a'oa'oga.
2. Alofa i le Alii i taimi uma.
3. Fiafia e tautalatala i upu o le ola.

.....

ASO SA: 15 APERILA 2018

MATAUPU: VAAI MA FAATUATUA I LE TALA LELEI

SINI: Ia malamalama le vasega, o le Talalelei ia Iesu Keriso toetu e tatau ona talitonu i ai tagata uma, aua o le manuia lea mai le Atua.

TUSI FAITAU: Galuega 13: 4 – 12

FESOASOANI MO FAIAOGA:

Tamaiti, e taua tele le lelei o le tatou faalogo ma le vaai atu, i mataupu ua a’oa’oina ai i tatou. O la tatou vaai tino i se mea na tupu, e faaosofia ai i tatou e talitonu i ai ma molimau i le moni atoatoa.

Ua faapena le uiga o le tatou mataupu o lenei Aso Sa – **VAAI MA FAATUATUA I LE TALALELEI!** Ua uma ona tofia e le Agaga Paia o Panapa ma Saulo mo le galuega tala’i, ona amata loa lea o le la galuega. Ua la tuua le taulaga o vaa o Selukeia Anetioka, ma malaga atu ai loa i le atunuu o Kuperu. Na amata ona la folafola atu le Talalelei i le aai o Salamina, i sunako o tagata Iutaia. Sa auauna foi Ioane po o Mareko ia i laua i le galuega (12: 12). Ua tuua Salamina ona latou oo atu lea i Pafu le laumua o Kuperu, ua soo ai le motu ia i latou.

O iina i Pafu, na iloa ai e Paulo le tasi taulaitu. O le tagata Iutaia, ae o se perofeta pepelo foi e igoa ia Paiesu. Na nofo lenei tagata i le sui konesula, o le malo o Roma i lea atunuu, e igoa ia Sekio Paulo. O Sekio Paulo, o se tagata faautauta tele. Na ia faalogo i le i ai o Panapa ma Saulo i lona nuu, ona ia aami lea ia i laua, ua manao i le fia faalogo i le Afioga a le Atua. Peitai, o Elima (o le faa-Eleni o le igoa Paiesu) po o Paiesu lava lea, le fai togafiti faataulaitu, ua tetee atu ia Panapa ma Saulo, nei liliu atu le sui Konesula i le la talaiga.

Na iloa e Saulo (Paulo) lea faufauga leaga a Elima (Paiesu) ona ia pulatoa atu lea ia te ia, aua ua tumu o ia i le Agaga Paia. Ua ia faapea atu foi i lea perofeta pepelo, *“O oe na ua tumu i le pepelo uma ma le ulavale uma o le atalii o le tiapolo, o le inoino i le amitonu uma lava, e te le se’i soia ea lou faapiopio i ala tonu o le Alii. Faauta nei, o le a oo ia te oe le aao o le Alii, e tauaso oe, e te le vaai i le la se ia se aso,”*

Tamaiti, o lea lava taimi, na pa’u ai o ia i le eleele ua le iloa ai e lea tagata fai togafiti faataulaitu se mea, aua ua ufitia e le ao uliuli. Ua tauaso ona

mata ma fealua'i solo e saili se tagata e taitai ia te ia. O se a'oa'oga foi lea mo i tatou le fanau, ina ia tumau lo tatou faatuatua i le Talalelei. 'Aua tatou taumafai e faasese isi tamaiti, e leai se Atua. Leai. E tatau ona tatou fesoasoani i isi tamaiti, e faailoa i ai le tala moni ia Iesu Keriso Toetu. Ina ua vaai ma iloa atu e le sui konesula le mea ua tupu i le tagata fai togafiti faalaulaitu, o iina lava na tupu ai lona faatuatua, auā ua matua ofo o ia i le a'oa'oga a le Alii, e pei ona talaiina e Paulo ma Panapa. Tamaiti, o le talalelei, o le tala i le alofa tunoa o le Atua, e ala ia Iesu Keriso toetu manumalo.

Upu Faamalamalama:

- i) taulaitu - o le tagata ua fiafia i agaga leaga ma ua fai folafolaga pepelo i tagata. E fai togafiti pepelo ma taumafai e faaliliu atu tagata i amioga leaga ua ia folafola mai.
- ii) Paiesu - o Elima lava lea.
- iii) sui konesula - e le sui o le konesula o Roma i atunuu uma na pulea e Roma.
- iv) faapiopio - faasese; taitai ese lagona o tagata.

GALUEGA FAATINO: Tali i Fesili

Tali mai fesili nei faatatau i le tatou mataupu

1. O ai na tofia Panapa ma Saulo e tala'i le Talalelei?
Tali: O le Agaga Paia.
2. O fea na amata mai ai le malaga a Panapa ma Saulo?
Tali: O Selukia i Anetioka.
3. O fea na amata folafola ai e Panapa ma Paulo afioga a le Atua?

Tali: O Solomina i Kuperu.

4. O ai le laumua o Kuperu?

Tali: O Pafo.

5. O ai lea tagata o Paiesu?

Tali: O le perofeta pepelo, taulaitu.

6. O ai le igoa o le sui konesula o taua i le tala?

Tali: O Sekio Paulo.

7. Aisea na tetee ai Elima ia Panapa ma Saulo?

Tali: E musu nei liliu atu le sui konesula i le talaiga.

8. O le a le mea na tupu ia Paiesu?

Tali: Na tauaso.

9. Aisea na talia ai e le sui konesula a'oa'oga a le Alii na talai atu e Panapa ma Paulo?

Tali: Aua ua vaai ma maofa i le mana o le Alii, na faatauasoina ai Paiesu.

Aua ua tupu lona faatuatua i le a'oa'oga o le Afioga a le Alii.

PESE: Toe faamanatu le pese lea, aua e fetau i le mataupu.

Nothing is impossible
When you put your trust in God

E leai se mea e le mafai
Pe a e faatuatua i le Atua

(faamolemole faiaoga, silasila i tusi aoga o isi tausaga, o loo
i ai lenei pese)

A'OA'OGA:

1. Fiafia e vaai ma faitau le Tusi Paia.
2. O le suafa o Iesu e tuliesea ai temoni.
3. Fiafia e talanoa i au uo i tala ia Iesu, ae le o tala leaga.

.....

ASO SA: 22 APERILA 2018

MATAUPU: PA’I ATU MA LE TALITONU MONI

SINI: Ia malamalama le vasega, e tali mai lava le Alii i o tatou manaoga, pe a tatou o atu ia te Ia ma le loto talitonu moni.

TUSI FAITAU: Luka 8: 40 – 48

FESOASOANI MO FAIAOGA:

Ao i ai Iesu i ana talaiga, o faamalologa ma vavega e tele i Kalilaia, sa toatele tagata na vaai tino ma faalogo i mea ofoofogia na faia e le Alii. Ua avefa lava ia mea na faia i le mana o le Alii, ma ala ua toatele ai tagata e mulimuli atu ia te Ia, aua ua faatuatua i latou i le Alii. E oo foi i le pule o le sunako e igoa ia Iairo, ua sau o ia ia Iesu ma faatoga i le Alii ma lona afafine e toatasi o le a oti i lona ma’i.

O le maliu atu la o Iesu e faamalolo le afafine o Iairo, e toatele tagata ua tumutumu mai ma fetaomi mai i le Alii, aua ua talitonu i lona mana. Sa i ai i nei tagata ua fetaomi ma fetuleni mai ia Iesu, le fafine ma’i i le puna toto i tausaga e sefulu ma le lua, ua le faamaloloina o ia e nisi e fofo na saili togafiti i ai, ma manatu ai loa o ia, e alu atu ia Iesu ua fia mapu i lona ma’i. E ui i le tumutumu o tagata, ae na finau atu pea o ia i sona avanoa e oo atu ai i le Alii.

Ua alu ane o ia i tua o Iesu, ma pa’i atu i le tu’upao o le ofu o le Alii. Tamaiti o se mea lava tatou te ofo ai tele le mea na tupu i le fafine. O le taimi lava na pa’i atu ai i le ofu o Iesu, na utu ai lava i lea taimi lona puna

toto. O lona uiga ua malolo o ia i lea lava taimi na pa'i ai i le Alii. O le fa'aaliga lea o lona alu ia Iesu ma lona faatuatua moni, ia faamaloloina o ia. Na fesili Iesu i tagata, po o ai ua pa'i ane ia te Ia. Peitai, e leai lava se tasi na iloa le mea na faia e lenei tinā. O lea na fetalai atu ai loa le Alii, *“Na pa'i mai lava se tasi ia te a'u; auā ua ou iloa ua alu atu le mana na ia te a'u.”* E le faapea e le i iloa e Iesu le fafine na pa'i atu i lona ofu. Na ia silafia lava, ae o lona finagalo, ia alu ane i luma o le motu o tagata le fafine, sei a'oa'oina ai o ia ma le motu o tagata. Sei ona ta'u atu i tagata, e le oi lona ofu se mana faataulaitu ae malolo ai le fafine. Peitai o le faailoga lea o lona faatuatua i le Alii. E ui o le tulafono faa-Iutaia, e sa ona pa'i atu se tasi i se fafine ua maua i lea ma'i, ae o le finagalo o Iesu, e le tatau i so o se Kerisiano ona teena so o se tasi ua mafatia i ona faafitauli ma puapuaga, pei o lenei fafine. E tatau ona fa'aaloalo i ai ma tatalo mo ia. Na fetalai atu Iesu i le fafine, *“Lo'u afafine e, o lou faatuatua ua e malolo ai; ina alu ia oe ma le manuia.”*

Tamaiti, ua tatou talitonu ma iloa foi lo tatou Alii o Iesu. ua tatou molimau foi o Ia lava o lo tatou Faaola e toatasi. Peita'i, ua tatou lē faatuatua i lona mana i nisi taimi, pe a fua i mea le lelei ma amioga le tusa ma lona finagalo. O le ata lena o le lē pa'i atu o lo tatou faatuatua i le Alii. Ua a'oa'o mai lenei tala, ua na o le faatuatua i le Alii e malolo ai o tatou ma'i ma suia lo tatou ola i le lelei. Ia tatou iloa o Iesu o le alofa lava Ia, i so o se tasi e sulufai atu ia te Ia, auā o Ia o le foma'i i o tatou tino, loto ma agaga.

Upu Faamalamalama:

- | | | | |
|-------|---------|---|---|
| (i) | fetaomi | - | (thronged) fetuleni, feoma'i, putuputu. |
| (ii) | tu'upao | - | teuteu po o le fele o le ofu |
| (iii) | utu | - | taofi, uma |

GALUEGA FAATINO: Faatulaga mai le amataga i le faaiuga.

Faatulaga mai faamatalaga oi lalo, mai le mea na tupu muamua seia oo i le mea na tupu mulimuli.

- a. Ua malolo le fafine puna toto.

- e. Ua faamanuia atu Iesu i le fafine.
- i. Ua sau Iairo ia Iesu.
- o. Ua pa'i atu le fafine i le ofu o Iesu.
- u. Ua fetaomi ma fetuleni mai tagata ia Iesu.
- f. Ua faapa'u le fafine i luma o Iesu.

Tali: 1 – i 3 – o 5 – f
 2 – u 4 – a 6 – e

PESE: Tusi Pese – Pese ma Viiga 373

1. Omai outou tamaiti
 Tou te ola ia Iesu
 O Ia le alofa tele
 I e o atu ia te Ia
 Tamaiti e,
 Vave mai ia Iesu

A’OA’OGA:

1. Alofa i e ua mama'i
2. Talitonu i le alofa o Iesu.
3. O Iesu lo tatou foma'i sili.

.....

ASO SA: **29 APERILA 2018**

MATAUPU: **TALITONU I LE FOA’I A LE ATUA**

SINI: Ia malamalama le vasega, o le tagata e talitonu moni
 i le Atua, e faamanuia lava i ai le Atua.

TUSI FAITAU: 1 Samuelu 2: 18 – 21

FESOASOANI MO FAIAOGA:

Tamaiti, tou te iloaina, o a mea ua foa'i mai e le Atua mo i tatou, ua tatou fa'aogaina ma ola ai? (E lelei ae tuu le avanoa i tamaiti e ta'u mai ai mea ua latou iloa) Lelei tele, o mea uma lava ua tatou fa'aogaina i lo tatou ola, o mea uma na ua foa'i mai e lo tatou Atua tatou te ola ai. O meaai, vaiinu, ea, ola, malosi o le poto ma tupe ma isi mea e tele, e mai lo tatou Atua. Ia tatou faafetaia ai le Alii i ia mea e tele, ma ia tatou fiafia foi e faitaulaga atu ia te Ia i nisi mea, aemaise ia aoga lo tatou ola mo Ia.

Tamaiti, o le tatou tala na faitau ai i le Tusi Paia, o le tala ia Samuelu ma ona matua o Elekana ma Hana. E ui ina tele mea ua ola ai lenei ulugalii o Elekana ma Hana, ae sa lē atoatoa lava le fiafia o le tinā ia Hana, ona o le leai o sana tama. Sa tatalo e le aunoa Hana i le Atua ma ia tauto atu i le Alii, ina ia foa'i mai ia te au se tama tane, ona ia foa'i atu lea o ia i le Alii i aso uma o lona ola. Sa alofaina Hana e le Atua, ma ia fanau mai le tama tane, ua ia faaigoa foi ia te ia, o Samuelu. O le uiga o le igoa o Samuelu – *“Ua faafogaina e le Atua”* (Heard by God)

Tamaiti, e lei popole lava Hana i lana tautoga na ole atu ai i le Atua, mo le fia maua o sana tama tane. Ina ua te'a le tama ma le susu, tusa lea ua tolu tausaga le matua i le tu a Isaraelu, ona momoli atu lea e le ulugalii o Samuelu i le fale o le Alii i Sailo, ia Elia le faitaulaga. Sa auauna Samuelu i luma o le Alii, a'o itiiti lava o ia. Na ofu foi o ia i le efota ie lino, o le ofu talaloa o laeiina e faitaulaga uma. Afai foi e o ane ona matua i lea tausaga ma lea tausaga e avatu a la taulaga, e o ane lava ma le ofu itiiti mo Samuelu, e saunia e lona tinā. E faamanuia foi Eli le faitaulaga i matua o Samuelu i taimi uma e o a'e ai mo faiga taulaga. Na ia fai atu ia Elekana ma Hana – *“Ia foa'i mai e le Alii ia te oe fanau i lenei fafine e sui ai lana na ia tu'u mai i le Alii.”*

E lei masalosalo Elekana ma Hana i faamanuiaga na folafola mai e Eli ia i la'ua. Na foi i lo latou nuu ma le loto talitonu i faamanuiaga mai le Alii mo i la'ua, auā o le manuia lava mai le Atua. Tamaiti e ui lava ina foa'i atu e lenei ulugalii le la tama e toatasi o Samuelu mo le Alii, ae na asiasi le Alii ia Hana, ma toe maua ana tama-tane e toatolu ma ana tama teine e toalua. E ui ua le ta'ua o latou igoa i le tatou tala, ae o le a'oa'oga taua mo

i tatou i lenei tala, e faamanuia mai lava lo tatou Atua ia i tatou i ala tatou te lei mafaufauina. E lei toe manatu Hana e toe maua nisi fanau, pe a fua i lona matua ua i ai. Peitai, na faatuatua lava o ia i le folafolaga a le Atua mai ia Eli le faitaulaga.

GALUEGA FAATINO: Tauloto

E lelei ae fa'aaoga le taimi, e a'oa'o ai e tamaiti le tauloto o i lalo.

1. O Samuelu le faitaulaga
O ona matua o Elekana ma Hana
O lona nuu e igoa o Rama
Na auauna i le Alii, i le tolu o ona tausaga.
2. O Samuelu ua ofo atu e ona matua
I le Alii ina ia tautua
Sa galue o ia mo le Alii
Na amata mai lava i lona laitiiti
3. Na faamanuia le Alii i le ulugalii
Toe maua ai le isi lima tamaiti
Talitonu i le foa'i a le Atua
Ta te maua pe a faatuatua.

PESE: Pese Aoga Aso Sa

Nothing is impossible
When your put your trust in God

E leai se mea e le mafai
Pe a e faatuatua i le Atua

A'OA'OGA:

1. Fiafia e lafo le sene i le Aoga Aso Sa
2. Talitonu i taimi uma i le Alii
3. E faamanuia le Alii ia i tatou.

.....

MANATU TAIALA O ME: O LAU FILIFILIGA

O lau filifiliga e te manuia ai, o lau filifiliga foi e te malaia ai. Ua tu’u mai e le Atua ia i tatou le ola ina ia tatou ola ma iloa ai le mea lelei ma le leaga. O le olaga ua i ai le manuia ma le agasala, e saoloto ai le tagata i lana filifiliga. Manatua ia tatou filifili faatasi ma le Atua.

ASO SA: 6 ME 2018

MATAUPU: FILIFILI E AUAUNA I LE ALII

SINI: Ia malamalama le vasega, e ao i tagata ola uma ona auauna i le Atua Soifua, auā o Ia na foa’i mai le ola ma mea uma tatou te ola manuia ai.

TUSI FAITAU: Iosua 24: 14 – 18

FESOASOANI MO FAIAOGA:

Tamaiti, o ai na faia oe ma a’u? O ai na faia le laueleele, o mauga o laau ma meaola uma ua i le lalolagi. Ae a le sami ma meaola uma ua i ai? Ae faapefea le vanimonimo le la, fetu le masina ma le eau a tatou manavaina? (E lelei ona faasolosolo uma fesili nei i tamaiti, ia saga mautu ai pea i mafaufau, na faia nei mea uma e le Atua.)

Tamaiti, afai na faia e le Atua mea uma lava o i lenei lalolagi, ma ua ola fiafia ai foi tatou i aso uma, o lona uiga e tataua lava ona avea le Atua ma Tama tatou te tapuai ma auauna i ai. E leai lava se isi atua tatou te maua mai ai se mea e tasi tatou te ola manuia ai.

E faapena le uiga o upu faamafanafana a Iosua i le nuu o le Atua o Isaraelu, ina ua iloa e Iosua ua lata mai lona oti. Ua apoapoa’i atu Iosua, e tataua ona matata’u, auauna ma le loto sa’o ma le faamaoni Isaraelu uma i le Alii. Ua iloa e Iosua, e tele atua ma tupu ua faia i lima o tagata o lo o i

ai i lo latou nuu ua nonofo ai. O le a avea ia tupua mamate ma ala o le faigofie ona see atu i ai o lagona o tagata, o fouvale ai i le Atua Soifua. O vavega ma mea ofoofogia na vaai i ai o latou mata na faia i le alofa o le Atua, e tatau ona manatuaina pea i taimi uma e i latou.

O le manao o Iosua, ia filifili nei Isaraelu po o le Atua soifua e auauna i ai, po o atua o sa Amori e ana le nuu ua latou nonofo ai. O le loto o Iosua, ia taitai tonu loto o tagata i le Atua ua tumau ai o ia ma lona aiga atoa. Fai mai Iosua, “..... a o a’u ma lo’u aiga, matou te auauna i le Atua.” Tamaiti, so o se taimi lava e te filifili ai, ia taitai le Agaga o le Alii i so o se mea e te fai, e tali mai lava o Ia i lau filifiliga i mea lelei e te fiafia i ai. Faapena foi Iosua a’o ia ta’ita’i le nuu, o ana filifiliga uma i mea lelei e manuia ai Isaraelu, sa tuu atu atoa lona faamoemoe i le Atua. Ma e ao ai lava ia Isaraelu ona filifili i le Atua ae le o tupua.

Manaia le tali a le nuu i le fesili a Iosua, poo ai e auauna i ai?*ia mamao lava ia te i matou ona matou tuua o le Alii, ina ia auauna i atua ese.* E sa’o lava latou, auā ana leai le Atua na ta’ita’i ese mai latou mai le pologa i Aikupito, ma leoleo latou i le ala, po penei ua le oo i le nuu folafolaina. Tamaiti e faigofie ona tatou folafola atu ia tatou filifiliga ua faia, auā o oe lava e faia le filifiliga. Peitai ia moni upu ma le faatinoga. Filifili tatou uma e avanoa i le Alii, auā ua maliu Keriso ina ia ola tatou tagata agasala.

GALUEGA FAATINO: Faatumu avanoa

Filifili le upu talafeagai i le lisi o upu, e faatumu ai avanoa i le parakalafa:-mamao, faamaoni, tapuai, auauna, filifili, leoleo, tuua.

O le a’oa’o atu o Iosua ia Isaraelu, o lena foi mo i tatou uma, ina ia tatou _____ i le Alii ma le _____ i aso uma o le ola. E ao ina tatou _____ e avea le Alii ma Atua tatou te _____ i ai. Ia _____ lava ia i tatou ona _____ le Alii, aua o Ia lava o lo o _____ i o tatou ola.

PESE: Pese masani ai “Ua ou filifili e mulimuli ia Iesu

A’OA’OGA:

1. Ia tatou manatua le Alii i taimi uma.
2. Filifili faatasi ma le Alii.
3. O lau filifiliga e te manuia ai, o lau filifiliga foi e te leaga ai.

.....

**ASO SA: 13 ME 2018
(ASO SA TINA)**

MATAUPU: E VIIA LE FAFINE AMIO LELEI

SINI: Ia malamalama le fanau, o le fafine amio lelei, e viia o ia e tagata ma le Atua, aua ua ia te ia meaalofa a le Atua i lona olaga faatina.

TUSI FAITAU: Faataoto 31: 10 – 31 (mo le Faiaoga)
Faataoto 31: 10 – 12 (mo le Vasega)

FESOASOANI MO FAIAOGA:

Tamaiti, o le a le sauniga lea ua tatou faamanatuina i lenei Aso Sa? Lelei tele. O le Aso Sa e lua o le masina o Me i tausaga taitasi, ua faamanatuina ai i Samoa atoa, “O LE ASO SA O TINA”. Lea foi la ua tatou aulia ma le fiafia lenei Aso Sa e faasino i o tatou tinā.

O le tatou tusi sa faitauina, ua mafai ona faailoa ai ia i tatou vaega po o a’oa’oga, tatou te iloa ai se tinā lelei. O upu sa tatou faitauina, o upu ma valoaga na a’oa’o ai Lemueli e lona tinā. O ia o se tupu potu ma ola mata’u i le Atua. Ua ia faaiuina le Tusi o Faataoto i le tele o a’oa’oga faataoto i tinā. Ua ia faapea mai – “*O le ava amio lelei, o ai ea se ua maua? E silisili lona tau i penina.*” O se molimau e ta’u mai ai ia i tatou, o le fafine po o le ava lelei, e faigata ona saili ma maua. O le atoatoa foi o se tinā lelei, e le faatusaina lona atoatoa i se penina taugata ma saili gata po o se isi lava mea. O le ava amio lelei, o le tinā lea ua ola mata’u i le Alii i

taimi uma. O lona uiga ua ia te ia meaalofa uma mai le Atua, auā ua ola ma galue i le taitaiga a le Atua.

O le fafine po o le ava amio lelei, ua mafai ona faamatalaina i a'oa'oga pei ona tatou faitau ai i le tusi faitau.

- E faatuatua ma talitonu o ia e lana tane
- E le mativa i se oloa, aua e toaga
- E alofa ma agalelei
- E ola saili
- Auauna ma galue fiafia
- Ola manatunatu mo mea lelei
- E faamalosi e taumafai
- E ola mataala
- E poto i suisuiga ma mea taulima
- E loto fesoasoani i e tigaina ma matitiva
- E le faafiti i le malulu
- E mataala i laei o le fanau ma lana tane
- E atagia i lana tane lona lelei
- E mamalu pe a vaai i ai tagata
- E ataata i taimi uma
- E tautala ma le poto i upu o le alofa
- E faafetai ia te ia lana tane ma le fanau
- E mata'u i le Alii
- E viia o ia e tagata
- E tauia e le Alii fua o ona lima
- E faamanuia o ia e le Alii

Tamaiti, o le malosia ma le agaga fai mea lelei o le tina lelei, e le afua mai ona o le maoa'e o sana taumafaiga. Peitai o fua na o lona ola mata'u i le Atua. Ua le taua lava i le faamatalaina o le tina lelei (i luga) foliga vaia i le tino, e pei o le matagofie ma le lalelei ma isi. O foliga ia i fafo e pepelo ma faatauvaa, aua ua le atoatoa iina se tinā ua mata'u moni i le Atua. Peitai o le amio ma mea na te fai, ua iloa ai lona faamoemoe i le Alii ua mata'u i ai. E viia foi o ia e tagata ae sili i le silafaga a le Atua.

GALUEGA FAATINO: Tusiga Tala

Tusi mai sau parakalafa se tasi, e faamatala mai ai lou tina. Faailoa mai lona suafa, lona matua, foliga vaaia, o sana galuega. Faailoa mai foi ni ona uiga e te fiafia ai ia te ia, ma ana mea lelei o loo faia i le tou aiga.

(E lelei ae tulimatai e le faiaoga lagona fa'aalia o tamaiti ua fa'aalia mai)

PESE: Faaiu le mataupu i se pese masani mo tinā.
E mafai foi ona a'oa'o le pese lea.

You mean the world to me, my mother
You mean the world to me, my mother
No matter what I do, your love for me it true
Because you mean the world, to me.

O lo'u lalolagi oe, tinā
O lo'u lalolagi oe, lo'u tinā
Tiga ma faigata, o oe e te amoina
O oe o lo'u lalolagi, tinā

(E mafai foi ona faaopoopo se isi fuaiupu e le faiaoga)

A'OA'OGA:

1. Ia e alofa ma usitai i lou tinā.
2. Fesoasoani ia tina i feau a le aiga.
3. Faataitai i lou tinā i mea lelei na te faia.

TATALO:

Faaiu e se tamaitiiti le mataupu i se tatalo.

.....

ASO SA: 27 ME 2018

MATAUPU: **E SILI LE ALOFA NAI LO SE ISI LAVA MEA.**

SINI: Ia malamalama le vasega, e sili i le finagalo o le Atua le alofa nai lo se isi lava mea.

TUSI FAITAU: Mataio 9: 9 – 13

FESOASOANI MO FAIAOGA:

Sa i ai Iesu i lana galuega talai i Kalilaia, ma avea ai le aai o Kapanaumi ma nofoaga e ogatotonu i ai lana galuega. E toatele tagata mama’i na faamaloloina e le Alii, ma tupu ai le ofo i tagata ona o le pule ua ia te Ia.

O le tasi aso ina ua uma ona faamaloloina e Iesu le tagata supa, ona maliu ese ai lea o Ia nai lea mea. A o tuua e ia lea mea, na silafia ai e le Alii le tagata ao lafoga e igoa ia Mataio, o nofo i le fale e tali ai lafoga. O lana galuega e tusia ma faamaopoopo tupe mo le malo o Roma. Ina ua fetalai Iesu e mulimuli mai ia te Ia, ona usita’i ai lea o Mataio ma mulimuli atu i le Alii. O tagata ao lafoga, latou te ao faasili tupe mai tagata, ona tuu lea ma latou le faasiliga, ae ave le tupe sa’o o le lafoga. Faataitaiga – afai o le lafoga e \$5.00 latou te ta’u i tagata e \$7 le lafoga. O le \$2 o lo o sili, o lana tupe lea e maua. O lona uiga o le gaoi lava lea ma o le agasala i luma o le Atua. Tamaiti, e toatele foi tagata faapea i o tatou nuu ma Ekalesia. E le se amio e tataua ona tatou fai, e inosia i luma o le Atua.

Tamaiti, e lei toe manatu Mataio i na tupe faasili na ia maua i lana galuega. Na lagona i lona loto le fiafia e fai ma soo o Iesu, aua ua ia talitonu i vavega ua ia faia i luma o tagata. Sa i le fale o Mataio le Alii e taumafa ai. Na iloa e isi tagata ao-lafoga ma e ua agasala le Alii o taumafa i le fale o Mataio, ona latou omai ai lea, ua taooto e aai faatasi ma Iesu ma ona soo.

Ao fai la latou taumafataga, na omai ai i le fale le au faresaio ma vaaia ai le Alii o taumafa faatasi ma ia tagata. Na latou fai atu i soo o Iesu, pe aisea ua aai faatasi ai la latou a’oa’o (Iesu) ma e ao lafoga ma e ua agasala. Na lagona e Iesu la latou faitioga ma Ia fetalai atu ia i latou. *“E le aoga le fomai i e malolo, na o e mamai....”* O Iesu, o Ia lava o le foma’i silisili i o tatou tino, loto ma agaga. O lona mafuta faatasi ma ia tagata agasala i le

taumafataga, o se avanoa taua lea e ta’u atu ai i tagata, o lana galuega e mo tagata uma, e aofia ai ma e agasala ma mafatia i puapuaga o le ola. O le mulimuli atu o le tagata i faatinoga ma faasinoga ua faia e Iesu, e ao ina faapena foi tatou tamaiti. E tatau ona tatou faasoa atu ma faailoa atu le Talalelei i e faatauva, lē taualoga, tagata agasala ma mafatia i faigata o lenei olaga o tatou ola ai. E oo lava i tagata matitiva ma tuulafoa’iina. O fua na o lo tatou alofa moni pei ona finagalo ai Iesu ia i tatou. Po o le a le tele o tupe ua tatou fai taulaga ai mo le Alii, ae afai ua tatou le alolofa atu i tagata mafatia ma puapuagatia, ua lē aoga lava lea i le finagalo o le Alii. E silisili ia Iesu le alofa nai lo le taulaga. O lona Afio mai i le lalolagi ma fai lana galuega, o le oo mai ia faaolaina tagata mama’i i le agasala. E lei afio mai mo e amiotonu, ae o le Faaola o le lalolagi agasala. E sili lava le alofa i lo le taulaga.

GALUEGA FAATINO: Faatinoga

Faatino e faiaoga ma tamaiti le tala o le mataupu.

1. Ua mulimuli Mataio ia Iesu.
2. Taooto Iesu ma le au ao lafoga ma e agasala i le taumafataga i le fale o Mataio.
3. Omai le au Faresaio i le fale o Mataio ma fai atu i soo o Iesu.
4. Lagona e Iesu le upu a le au Faresaio, ma ia tali atu ia i latou.
5. Fai faatasi le upu lea a Iesu – “Ou te loto i le alofa a e lē o le taulaga.”
6. E sili lava ia Iesu le ‘ALOFA’

PESE: Ua i ai lava tatou pese masani o le ‘alofa’

1. Le alofa o le Atua, pei o se lio tele.
2. E alofa Iesu ia i tatou uma.
3. Alofa o se mea e te faasoa atu

(ma isi lava e tele)

A’OA’OGA:

1. Alofa i e mama’i, matitiva ma vaivai.
2. O le foma’i mo e mama’i
3. Ou te loto i le alofa, a e le o le taulaga.

.....

MANATU TAIALA O IUNI:

“IA ILOA ALA O LE ATUA”

“O a’u nei o le ala ma le upu moni ma le ola; e lē alu atu lava se tasi i le Tamā, pe a lē ui mai ia te a’u”. O upu ta’utino ia a le alii o Iesu na ia faamafanafana atu ai i ona soo; ina ia manino lelei le latou vaai i ala o le Atua. O ala o le Atua na Ia taumafai e faailoa ia Isiraelu i le feagaiga tuai, ae faataute’e ma faia pea o latou loto, ona o le ola lē talitonu. O le ala lea o le afio mai o Iesu; sei faailoa ala ia o le Atua. Le ala lea o le fetalai manino o Iesu. Afai sa lē talitonu le tagata i lona Tamā, o ia la ua sau e faailoa le ala o le tagata i le Atua.

ASO SA: 3 IUNI 2018

MATAUPU: O IESU LE ALA I LE TAMĀ

SINI: Ia a’oa’o tamaiti ia malamalama, o le tatou iloa lelei o le galuega ma le faaolataga na faia e Iesu i le lalolagi. Pau lea o le tatou ala i le Atua le Tamā, pe’ā o tatou talia o ia i le salamo ma le faatuatua faamaoni.

TUSI FAITAU: Ioane 14: 1 – 7

FESOASOANI MO FAIAOGA:

O upu faamafanafana ia a le alii o Iesu i ona soo. Ina ia tumau i le ola talitonu ma faatuatua faamaoni i le Atua. Ia faapena lo latou iloina o Iesu. O loo silafia lelei e le Alii le popole ma le atuatuvaile o lona au soo; auā o lea o le a tuua e ia le mafutaga, ona leai lea o so latou nofoaga i le lagi .

Le ala lea o le fetalai faapea o le Alii, aua ua oo mai le taimi e faalataina ai o ia, ma lona maliu, ona o le lē talitonu o le tagata i lona afio mai i le lalolagi. O le fetalaiga la a le Alii, e le gata ina ia toe faamalosiāu ma toe tapu'e ai le ola faatuatua o le tagata i le Atua; ae o loo faamanino mai ai foi e Iesu le ala o le tagata i lona Tama. Fai mai Iesu; “Aua le atuatuvaile o outou loto, ia outou faatuatua i le Atua, ia faatuatua mai foi ia te au.” O le faatuatua o le tagata, o le talitonu i mea e lē vaaiā; ma le talitonu i mea ua vaai tino iai e ala ia Iesu.

O loo fetalai manino le Alii i le maota ua uma ona saunia e lona Tamā. Le nofoaga mo i latou e faavavau. Le nofoaga mo e uma e faatuatua i le Atua, e faatuatua foi ia te ia. O le maota lea e fetalai iai Iesu, o le maota o le Atua i le lagi, o le maota e faavavau. O le fale e sa'oloto ai tagata faatuatua uma. E avanoa so o se tagata, matala faasolo atoa mo so o se tagata faatuatua e fia ulufale atu iai. O le fale e matagofie faasolo atoa. E lē pefua pe tuai foi i se taimi. E fiu e faatumu e lē tumu.

O le uiga la o le fetalaiga a Iesu, aua le popole i se mea e nofo ai i le lagi. Pau le mea e fai a le tagata, o le ola talitonu ma faatuatua i le Atua e ala ia Iesu. O le finagalo o Iesu, o ia lava o le ala. Pau lea o le ala o le tagata faatuatua i le Atua, pe a talitonu i lona afio mai. O ia lava o le upu moni ma le ola. Na afio mai e faaola ai tagata uma. O i latou uma e taliaina lea faaolataga a Iesu Keriso; o tagata tonu ia o le maota o le Atua i le lagi.

E ui lava o le fetalaiga a Iesu sa fai i ona so'o, a o le feau lea mo i tatou tamaiti. Pau lea o le tatou ala i le Atua ma maua ai so tatou avanoa i lona maota e faavavau. Pe afai tatou te taliaina Iesu Keriso i o tatou loto. O le faaolataga na afio mai ai i le lalolagi, o le finagalo alofa o lona Tamā. O le tatou taliaina o ia i o tatou loto, o le tatou iloa foi lea o le Tamā. O le a iloa foi i tatou e Ia, ma avatua i tatou i lona maota e faavavau.

Uiga o Upu:

- i) atuatuvaile: popolevale
- ii) faatuatua: o le talitonu i mea e le vaaia e mata

GALUEGA FAATINO:

Faatulaga sa’o mai fuaiupu o loo mulimuli mai i le faasologa sa’o e tusa ma le Tusi Faitau.

- 1. Afai foi ou te alu ma sauni se mea e nonofo ai outou, ou te toe sau,
- 2. Aua le atuatuvaile o outou loto, ia outou faatuatua i le 3. Atua, ia faatuatua mai foi ia te au.
- 3. O au nei le ala, ma le upu moni, ma le ola,
- 4. Ua outou iloa foi le ala i le mea out e alu i ai.

Tali: (2, 1, 4, 3)

PESE: Ua ou filifili e mulimuli ia Iesu.

A’OA’OGA:

- 1. Talitonu i le faaolataga a Iesu Keriso tatou te nonofo ai i le fale o le Atua.
- 2. O le talitonu ia Iesu Keriso o le faatuatua lava lea i le Tama

ASO SA:
10 IUNI 2018

MATAUPU: **UA TETEE LE ALII I ALA O PALAAMO**

SINI: Ia a’oa’o tamaiti ia malamalama, e lē taliaina e le Atua ni ala pi’opi’o e faia e le tagata e lē tusa ma lona finagalo. A o mea ua ia finagalo iai, o meatonu uma e ao ona savalia e soo se tagata.

TUSI FAITAU: Numera 22: 15- 35

FESOASOANI MO FAIAOGA:

O le taimi o le tupu o Palako i le nuu o Moapi tamaiti, o le taimi tonu lea o le \bar{o} ese mai o Isaraelu mai Aikupito. E ui o Mose le ta'ita'i malaga; a o le Atua lava o le ta'ita'i malaga sili. Fai mai le tala tamaiti, e logologoā le \bar{o} ese mai o Isaraelu mai Aikupito. Aua o nuu lava sa faalavelave ane i le malaga lea, liliu ane Isaraelu faatailalo.

Ua latalata ane le malaga i le nuu o Moapi, ua iloa e Palako le tupu o Moapi mea sa faia e Isaraelu a o agai mai i Kanana le nuu folafolaina; ona fefe ai lea. O le ala lea na alu ane ai le avea'i ia Palaamo le atalii o Peoro, na te fetu'uina le nuu o Isaraelu, ina ia faigofie ai ona latou fafasi i le nuu uma. O Palaamo tamaiti, fai mai o le tagata vaai poo le perofeta. O tagata ia latou te fesoota'i ma le Atua mo se faamanuia poo se faamalaia foi mo se itu taua.

O le feau lona lua la lea ua sau nei ia Palaamo mo sana fesoasoani, mai le tupu o Palako. Fai mai le tali a Palaamo tamaiti i tagata na \bar{o} ane; "Afai e foa'iina mai e Palako ia te au o ario ma auro e tumu ai lona fale, ou te lē mafaia ona soli le afioga a le Alii lo'u Atua, e fai se mea itiiti, po o se mea tele". Ua tautala Palaamo i se tau'i e aumai e le tupu mo ia. Ua faanonofoni e le perofeta tagata na \bar{o} ane, ae sei fesili muamua i le Atua i sona finagalo. Ae fai mai le tala, na afio ane le Atua ia Palaamo i le po ma fetalai atu iai, e alu e \bar{o} ma nei tagata, ae ta'u atu e ia le upu e fai atu ai i le tupu.

Ua alu le malaga, peita'i o loo silafia lelei e le Alii le mea o loo i le manatu o Palaamo, o le a maua mai lona tau'i mai le tupu. O le ala lea na alu ifo ai le agelu ma faasāsā le ala o le asini; ona o se fe'au o loo fia ta'u atu ia Palaamo. Ua iloa atu e le asini le agelu o loo tu mai i le ala; ua se'i ae i luga lana pelu, ona alo ese ai lea o le asini ua ui i luga o le vao. O le ita o Palaamo na ia sasa ai lana asini. E leo iloa e Palaamo le mea o loo fealoalofa'i solo ai lana asini, ona o loo taumafai i se auala e alo ese ai mai le agelu ma lana pelu, lea o loo tu mai i ona luma ma faasasa mai le auala.

Ua tupu tele le ita o Palaamo i le asini, ona ua omia lona vae i le aupa, ao lea foi ua taoto ane i lalo ae lei taunuu le faamoemoe. O le ala lea na ia sasa ai i lana asini i le laau. Na te'i Palaamo i le tautala ane o le asini ae lē

masani ai. Ao fetalia'i la Palaamo ma lana asini ona o le mea ua tupu; ae iloa atu loa e Palaamo le agelu a le Atua o loo tu mai le ala, ma lana pelu ua se'i o loo i lona lima. Ua vave ona iloa e Palaamo o lona iuga lea, ona ifo lea ma faapaūfao i luma o le agelu. Na ta'u atu e le agelu ia Palaamo, lona taumafai e tete'e atu i le ala o Palaamo, auā ua lē lelei i luma o le Atua. Ua ia faailoa atu foi ia Palaamo, ana le alo ese lana asini mai ia te ia, penei ua oti o ia, ae sao lana asini.

Ua lagona e Palaamo e lē sa'o le mafuaaga o lona alu, e le o fiafia iai le Alii. Le ala lea o le taumafai o le agelu e tete'e i lona alu atu ma nei tagata e tusa ma le mana'o o le tupu. O lea na ia faailoa ai i le agelu, o ia ua agasala; ana ia iloa foi, e toe foi lava o ia. Peita'i na fa'aauau lava ona o e tusa ma le finagalo o le Atua, ao upu o le a ia tautala ai, e mai le Atua, e tautala atu ai i le tupu o Palako.

So o se mea tatou te faia tamaiti e aunoa ma so tatou manatu mamafa iai, e ono afaina ai tatou. E silafia lelei e le Atua mafaufauga ma o tatou loto, i le ese o le mea e ave iai le tatou faamamafa ma le finagalo alofa o le Atua. O mea tonu ia e taumafai lava le Atua ina ia taofia mai ai i tatou, a ia faia lona finagalo, tatou te taunuu ai i ona manuia.

Uiga o Upu:

- | | | |
|------|-----------------|---|
| i) | faamalualiiina: | e ave iai le fa'aaloalo e gata ai e pei ona faia i se alii sili o se nuu. |
| ii) | fetuuina: | faamalaiaina, faatoina |
| iii) | faanofoa: | o ie poo se momi e tuu i le tua o le asini e tietie ai le tagata. |
| iv) | tetee: | lē talia, musu e fai se mea |
| v) | faagaganaina: | ua tautala ae lē masani ai ona tautala |
| vi) | faaonoono: | faatiga, faaita i le isi tagata |
| vii) | fasimate: | fasi ia pe, fasi se ia uma le ola |

GALUEGA FAATINO: TALIGA FESILI

Tali i le ‘Sa’o’ poo le ‘Sese’

i) Na mana’o Palako ia Palaamo n a te fetuuina le itu taua ina ia latou manumalo ai i le taua..

Tali: Sa’o

ii) Na teena e Palaamo le finagalo o le tupu.

Tali: Sa’o

iii) O Palaamo, e faalagolago lava i se fetalaiga a le Atua.

Tali: Sa’o

iv) O le finagalo o le Atua, ia alu ae tau lava o le upu e fetalai mai ai e fai atu ai o ia i le tupu.

Tali: Sa’o

v) Na finagalo le Atua ina ia o latou o ma tagata o Moapi e ta’u lona finagalo i le tupu.

Tali: Sese

vi) Na sasa e Palaamo lana asini ina ua taaoto o ia i lalo.

Tali: Sa’o

vii) Na faateia Palaamo ina ua tautala ane lana asini ia te ia.

Tali: Sa’o

PESE: Tulei ese Tulei ese Tulei ese

A’OA’OGA:

1. E teena e le Atua o tatou ala lē lelei.

2. E silafia e le Atua mea leaga uma o loo i o tatou loto

.....

ASO SA: 17 IUNI 2018

MATAUPU: IA LELEI O TATOU ALA MA AMIO

SINI: Ia a’oa’o tamaiti ia malamalama, e oo mai le toasā o le Atua i le tagata e alu ese mai le ala ua finagalo iai le Atua. Ao le e tumau i ona ala ma sao lana amio, e faamanuia iai le Atua.

TUSI FAITAU: Ieremia 7: 1- 7

FESOASOANI MO FAIAOGA:

O le mataupu lenei tamaiti; o loo faatonuina ai e le Atua Ieremia ina ia ta’u atu ia Iuta, ua tatau nei ona salamo ma liliu mai i le Atua, ona faamanuia mai ai lea o Ia. O le ulua’i afioga lea a le Alii ia Ieremia, o le a faataunuina i le malumalu. O lona uiga, o le lauga muamua lea a le perofeta i le malumalu, e momoli atu ai le finagalo o le Atua i tagata uma e ulufale ane e tapua’i i lea Aso.

O le autu la o le lauga a Ieremia; “Ia outou sauni lelei i o outou ala ma a outou amio, ona ou faatumauina ai lea o outou i lenei mea.” O le malumalu tapua’i tamaiti, ua nao mea paia lava e faatinoina ai, e pei foi ona tatou faatinoina i Aso Sa taitasi; i pese ma viiga, o talotaloga ma se faamalosi mai le afioga paia a le Atua, aemaise ai o le sakalameta paia o le faamanatuga, o le tino ma le toto o lo tatou alii o Iesu Keriso. E ō mai faatasi uma ai tagata e vivii ma faafetaia le alofa ma le agalelei o le Atua; faatasi ai ma mana’oga i mea ua manatu iai, aua se manuia mo tagata uma. Peita’i, ua leo lea i le silasila mai o le Atua. O se nuu lava faaoleole ma amio pepelo i le Atua. Ua savavali i ala faapaupau ma amio leaga i ona luma.

Ua galo ia Iuta tamaiti, o loo silasila le Atua ia latou upu pepelo. O le ola faamasinosino i si tagata. O le faasauā i tagata ese, le tagata aumatuā ma le fafine ua oti lana tane. O le faamaligi toto i e ua lē sala. Ma ua latou fai tapuaiga i atua ese latou te leiloa; ae o loo iai le malaia.

O le ala la lea o le oo ane o le afioga a le Atua ia Ieremia, ina ia faailoa ia Iuta, e tatau ona faalelei a latou amio, ma faasa'o le ala e ui ai, ona faatumauiina lea e le Atua o i latou i le nuu na foa'iina i o latou tamā.

O le uiga lava lea faatama ua masani ai foi o tatou matua i totonu o aiga. E leai se matua e mana'o e oo tatou i se malaia. O le faanaunautaiga lava, ia o tatou manuia. Pe a sa'o le ala tatou te ui ai, ma tatou amio lelei e pei ona finagalo iai le Atua, ona tatou manuia lea. E le finagalo le Atua tatou te ulufale atu e tapua'i ia te Ia, ae tatou te fai amio agasala i ona luma. O le tatou faaonoona lea ma anaana i lona alofa mai ia te i tatou. O le tatou faia o le amio lē lelei i luma o le Atua, o le manumalo lea o le alii o le lalolagi i o tatou tagata na faia e le Atua. O tatou tamaiti na faia e le Atua, e lei faia i tatou e Satani. E tatau la ona tatou savavali i ala ua ia a'oa'o mai tatou te savavali ai, ma ia o tatou amio e pei ona faia e le tatou uo pele o Iesu Keriso, ona tumau lea o manuia iai tatou e faavavau.

Uiga o Upu:

- i) aumatuā: o le tagata ua leai ni matua/ tamaititi ua matua oti.
- ii) tane: o le ta'u lea a le fafine i lona to'alua

GALUEGA FAATINO: TALIGA FESILI

- i) O ai na valaau iai le Atua e alu e ta'u lona finagalo i le nuu o Iuta?
Tali: Ieremia
- ii) O fea le nofoaga na finagalo le Alii ia Ieremia e faatino ai lea faamoemoe?
Tali: Malumalu
- iii) A amio lelei ma savavali i ala o le Atua ona a lea?
Tali: Ona faatumauiina ai lea e le Atua o le nuu i lea mea.
- iv) O le a le finagalo o le Atua ia Ieremia ina ia faia e le nuu?
Tali: Ia lelei o latou ala ma amio lelei i luma o le Atua.

PESE: O maia tatou uma ma mafuta fiafia.

A’OA’OGA:

1. Ia fai le finagalo o le Atua ae leo tatou loto.
2. Aua tatou te o ese ma manuia o le Atua.

ASO SA: 24 IUNI 2018

MATAUPU: UA USITAI PAULO I LE VALAAU A
LE ALII

SINI: Ia a’oa’o tamaiti ia malamalama, o le usitai; o le isi lea amioga e fiafia iai le tagata kerisiano faamaoni i le Atua. E lē faia mo sona lelei, ao le manatu alofa i le finagalo paia o le Atua.

TUSI FAITAU: Galuega 16: 1- 10

FESOASOANI MO FAIAOGA:

Talu mai lava le fa’aaliga na iloa e Paulo i le ala i Tamaseko tamaiti, e le i faapea na toe fultua ai o ia i le Alii. Na amata mai ai lava i ina ona matuā tuu uma iai lona ola atoa, e faia le finagalo o le Atua.

E ui ina tele fitā ma faigatā na toetoe a lē mafai e Paulo ona onosaia, i isi ana malaga muamua; ae na malō lava le musumusuga a le Agaga Paia i lona loto, e tusa ma lona ola valaauiina. Na matuā mausalī le faamoemoe o le Atua i le loto o Paulo, na faigofie ai mea uma i isi ana malaga muamua.

E ui i nei fitā sa fetaia’i ma le Aposetolo, ao lea ua fai ma mea suamalie i lona loto. Ua fai ma mea fiafia ia te ia nei faigatā. O le ala lea o le toe alu ai o le isi lea o ana malaga e pei ona tatou faitauina. Ua manatu Paulo e tatau ona ia toe asia le au uso Kerisiano i aai sa ia tala’i atu iai le Talalelei, poo faapefea mai le galuega.

Na o i laua ma Sila i le malaga lea. Fai mai ua oo i le tasi nuu ua igoa ia Lusa, ona la maua lea o Timoteo. O lona tina o le Iutaia, ao lona tamā o le Eleni. Fai mai o le tagata e ta’uleleia i Lusa. Ona peritomeina lea e Paulo ma Sila ia te ia e tusa ma tu ma aga faa-Iutaia, ona e toatele nisi o Iutaia e nonofo i aai o le a latou uia; Aua ua manatu Paulo e tatau ona latou o ma Timoteo.

Ua faaauau le malaga i aai e pei ona uia e Paulo i lana malaga muamua. Ua tuuina atu i ia Ekalesia iugafono mai Ieruselema latou te tausia, ma faamalosi ai le soifua tapua’i o le au Kerisiano ia Iesu Keriso. O Ieruselema tamaiti, o le ogatotonugalēmu lena o tapuaiga i le Atua soifua. E aumai ai alafua ma faiga faatapuiga faale-faatuata, e faatino ai tapuaiga i Ekalesia ua faatuina e Paulo i aai o loo taamilo ai i ana malaga.

Ua faaauau pea lenei malaga. Peita’i, na musumusuina i latou e le Agaga Paia e vavao ona tautatala atu i se upu i Asia. Na faapea foi ona lē mafai ona o atu i le tasi aai o Pitunia, ona o le Agaga Paia. Ona faaauau ai lea o le malaga, ua taunuu i Teroa. Ua malolo i latou i lea aai i le po, ona iloa lea e Paulo o le fa’aaliga. Fai mai o le tasi tagata ua tu mai, ua aioi mai ina ia o latou o atu i Maketonia, e fesoasoani ia tei latou. E lei toe faatali Paulo ma lana au malaga. Ua sauni loa i latou e tuuvaa atu i Maketonia, aua ua manatu le Aposetolo, o le valaauina mai le Ali e folafola le talalelei i lea aai.

Tamaiti, o le galuega a Paulo, sa faamoemoe lava i le musumusuga a le Agaga Paia. E lei faamoemoe i sona malosi poo se potu ua ia maua; ao le usitai lava i le Atua ma lana faasinomaga. Fai mai na musu le Atua e tautala i se upu i Asia, e lei finagalo foi e afea Pitunia, ina nei lē oo le feau i Maketonia. Le ala lea o le iloa loa o le faaaliga i le po; tula’i loa i latou, ma o atu e momoli le fe’au o le talalelei, e pei ona man’aomia ai se fesoasoani.

Toatele i tatou ua lē fia faalogo i matua, ua fulitua i le aoga aso sa, autalavou; ua tau le sau foi i le lotu. Ia manatua tamaiti, o le tatou o ese mai mea ia sa tatou masani ai; O le tatou lē usita’i lava lea i lo tatou valaauina mai le Atua, a ua faia o tatou loto, ma ua le maua ai e i tatou manuia faasoa mai o le Atua.

Uiga o Upu:

- i) Peritomeina: o le faamamaina o le itupa o alii(tama)
- ii) Iugafono: o ni faaiuga o ni fonono ua faamaumauina lelei.
- iii) Vaioa: taofi, vavao mai se mea e ono afaina ai le soifua ma le ola.

GALUEGA FAATINO:

Paso: Fa'aaoga le paso e saili mai ai nuu o loo i le lisi:- Teipe, Lusa, Ferikia, Kalatia, Teroa, Maketonia.

l	m	t	e	r	o	a	e	i	o
u	f	g	l	m	i	t	n	p	s
s	t	v	h	t	k	e	i	o	u
a	e	i	a	o	u	i	o	u	f
f	g	l	m	n	p	p	s	t	v
h	a	i	n	o	t	e	k	a	m
k	e	i	o	u	f	g	l	m	n
r	i	o	f	e	r	i	k	i	a

PESE: Trust and Obey

A'OA'OGA:

1. Tatou usita'i i le valaau mai o le Atua.
2. Faamoemoe mea uma i le Atua.

.....

MANATU TA'IALA IULAI.

“E SILASILA LE ALII I LOU LOTO”

“Aua e te vaai i lona tino poo le maualuga o lona tino; auā ua ou tetea ia te ia; aua e lē vaai le Alii pei o le vaai o tagata, auā e vaai tagata i le tino, ae vaai le Alii i le loto.” O upu ta’utino ia a le Alii ia Samuelu, i le eseesega o le filifiliga faaletagata, ma le filifiliga amiotonu a le Atua. E lē o le tino lelei ma maualuga, momosi ma aulelei, ae lē lelei le loto. E palaai ma to’ilalo gofie le loto i le vaai o mata ae lei faia se faatinoga. Ao le finagalo foi lea o le Alii, ina ia tatou iloa ma le mautinoa, o ō tatou loto e fua mai ai le amiotonu a le Atua. O le loto foi e iloa ai o tatou vaivaiga ma faaletonu.

ASO SA: 1 IULAI 2018

MATAUPU: UA FAAUINA TAVITA E FAI MA TUPU

SINI: Ia a’oa’o tamaiti ia malamalama, i le mafuaaga o le finagalo o le Atua, na filifilia ai Tavita e fai ma tupu ia Isaraelu.

TUSI FAITAU: 1 Samuelu 16: 1- 13

FESOASOANI MO FAIAOGA:

Nofo sa’o tamaiti, faalogo lelei; O loo amata le vaega lea sa tatou faitauina, i le fetalaiga a le Alii ia Samuelu e faapea; “.....E te faanoanoa ea ia Saulo seia afea? Aua o a’u, ua ou lafoa’i ia te ia, ina ia le fai ma tupu o Isaraelu.” Soo se mea lava tatou te lē ususita’i ai i le Alii, o le a faapea foi ona fai mai e le Alii lo tatou iuga.

Ua lē usita’i le tupu o Saulo i le Alii. O le ala lea o le faailoa o lona finagalo ia Samuelu, e tusa ma le tagata ua ia filifilia, o le a fai ma tupu e sui ia Saulo. O Samuelu o le ositaulaga i lona taimi. Aua o ia o le tagata na ofoina e lona tina mo le Alii. Fai mai ua faatonuina e le Alii Samuelu mo lona alu atu ia Iese i Peteleema, e faauu i lona atalii e fai ma tupu.

Na lagona e Samuelu lona fefe ia Saulo le tupu. Aua a faalogo i lea mea, ona ia fasioti ai lea ia Samuelu. O le uiga lea o le tagata; tatou te fefefe vavale e fai le amiotonu a le Alii. Ao Ia e ana le faatonuga e tatau ai ona tatou faia ma le faamaoni. Ona fetalai ane lea o le Alii e ave se tama’i povi,

ma ia alu atu ia Iese ma fai atu; “Ua ou sau e fai le taulaga i le Alii”. O le taulaga lea tamaiti, e finagalo le Alii e tataua ona iai Iese ma lana fanau uma.

Ua tapena e Samuelu mea uma e pei ona faatonu mai e le Alii ma ua alu atu o ia i Peteleema. E lei filemu le nuu ina ua vaai ia Samuelu. Ua fefefe po o le a se malaia o le a oo i le nuu. A ua tali atu o ia i le nuu uma; ua sau o ia ma le filemu e fai le taulaga i le Alii ma faapaiaina i latou; ma fai atu i tagata uma e ō mai i le osigā taulaga.

Ua ō mai tagata, ona iloa atu lea e Samuelu o Eliapo le atalii o Iese. O se tagata tino lelei ma maua luga. Ma ua manatu ai o ia, o le tagata lea ua finagalo iai le Alii. Peita’i ane, fai mai le Alii ia Samuelu; “Aua e te vaai i lona tino, po o le maua luga, aua ua ou tetee ia te ia; aua e le vaai le Alii e pei o le vaai o tagata, auā e vaai tagata i le tino, ae vaai le Alii i le loto”. Ona lē faauuina lea e ia, a ua fesili pe iai se isi. Ona faasolo ane lea e Iese o lana fanau. Ua alu ane Apinatapa, e lē o le finagalo lea o le Alii. Ua alu ane Sama, e leai lava. Ona valaau lea o Iese i isi tama e toafitu, peita’i ane e leai lava.

Ai ona o le laititi o Tavita ma lona fuaitino e lē tusa ma le vaai a le tagata, na lē amanaia ai e Iese. Peita’i, o le silasila a le Alii, e taulia le loto ae leo le tino. Na tula’i Samuelu ma faau’u ia te ia e fai ma tupu e sui ia Saulo.

Tamaiti, e lē na o se tupu e filifili i lea tulaga, ona o le tele o le loto. E mafai foi ona filifilia i tatou i soo se feau e finagalo iai le Alii, pe a pei o tatou loto o le loto o Tavita. Ae leai foi se aoga o le telē o loto, ae nao mea valea e sau ai. Ao le loto e iloa atu ai le Alii i sa tatou faatinoga. Le loto e finau malō i mea lelei mo le Alii, ae lē o mea inosia ma le ta’uvalea, e oo ai tatou i puapuaga ma le agasala.

Uiga o Upu:

- i) vagavagaia: faia, sauni e faia le taumafataga ii) la’oa’i:
laulau ua iai le taumafataga.
- iii) ui’i: tagata laititi i le fanau

GALUEGA FAATINO: TALIGA FESILI

TALI i le ‘Sao’ poo le ‘Sese’

- i) Sa fa’aaoga e Samuelu le fagu pa’u e ave ai le suau’u, e faau’uina i Tavita e fai ma tupu
- ii) Na fefe Samuelu e faatino le finagalo o le Atua, nei fasioti o ia e Saulo.
- iii) O le Atua lava na faia le peleni o le faau’uga o Tavita.
- iv) “.....aua e vaai le tagata i le tino, ae vaai le Alii i le loto.”
- v) O Tavita lava le ui’i o le fanau a Iese.
- vi) O le taimi lava na faau’uina ai Tavita e Samuelu; na osofia ai o ia e le Agaga o le Alii.

Tali: (Sese, Sa’o, Sa’o, Sa’o, Sa’o, Sa’o.)

PESE: 157 ‘Ave Lo’u Ola.’

A’OA’OGA:

- 1. Ia sao o tatou loto i le Alii.
- 2. Ave o tatou loto mo le Alii.

.....

ASO SA: 8 IULAI 2018

MATAUPU: UA SILAFIA E LE ALII LOTO O TAGATA

SINI: Ia a’oa’o tamaiti ia malamalama, e lē faigatā i le Atua ona faatino se mea o mana’o iai le tagata. Peafai e ole atu ia te Ia ma le loto talitonu ma le faatuatau faamaoni.

TUSI FAITAU: Galuega 1: 15 – 26

FESOASOANI MO FAIAOGA:

O le tala lea sa faitauina tamaiti. O lea ua tuua nei na o soo e toasefulu ma le toatasi o Iesu. Fai mai ina ua tuaana'i atu lona afio a'e, ao vaavaai i latou i lona toe foi atu i lona Tamā oi le lagi. Ua foi ane nei i latou, ma ē sa iai faatasi i le mauga o Olive, ma aga'i atu i Ierusalemā. Ua latou ō ane i le afeafe aupitoaluga e masani ona latou faatasitasi ai, ma ua latou finafinau ai i le loto gatasi ma tatalo ma aioi atu i le Atua, ina ia taunuu le fetalaiga a le Alii o Iesu Keriso, i le meaalofa o le Agaga Paia e fai ma ō latou fesoasoani i le galuega.

Fai mai e tusa ma le selau luasefulu i latou sa iai faatasi i lea mea. Ona tula'i ane lea o Peteru, ma fai atu iai latou, ua tatau ona filifilia se isi to'atasi e fa'aatoa ai le fuainumera o soo e pei ona filifilia e Iesu. O se isi o le a filifilia, e sui Iuta le na faalataina Iesu. Manatua foi tamaiti, o Iuta lea ua iloa ia Iuta le faalata. O le soo lea na ia faalataina le alii o Iesu i le sogi (kisi),ona o lona fia mana'o i tupe na ofoina ane e le au ositaulaga, ma e na latou lamalama ia Iesu. Fai mai o tupe na ofoina ane, na faatau ai lona fanua. Fai mai o le fanua lava lea na oti ai o ia i se oti matagā, e pei ona taua i le fuaiupu e 18. Ma ua tusia foi i le tusi o Salamo; "Ia tuufua lea mea ua nofo ai o ia. Aua foi ne'i iai se mau ai. I le ma lea, Ia fai lona faiva mo se isi." O le ala lēna na faaigoa ai lea fanua o Akeletama. O lona uiga, 'o le fanua o le toto.' O le tau i le tagata faalata i le Alii.

O le filifiliga la lea o le a faia, o le a filifili mai lava i le au faatuatua. O ē sa latou feoa'i faatasi ma Iesu ma lona au soo i taimi o lana galuega, mai lava i le taimi o le papatisoga a Ioane e oo mai i le taimi o le toe tu ma lona toe afio ae.

Fai mai ua potopoto i latou uma ma fai tatalo faatauanau ma aioi i le Alii, e tusa ma le mataupu ua latou manatu iai. Ua autasi manatu ma ua filifilia ai Iosefa; o isi ona igoa o Pasapa poo Iuso, faatasi ai ma Matatia. O i laua ia ua manatu Peteru ma le au soo, o le a fai i ai le vili e tusa ma tu ma aga masani a ia atunuu i faigafilifiliga. Ua fai le vili, ma ua faasino mai e le vili le tagata e tatau ona fai ma soo, o Matatia; aua na o latou faapea atu i le Alii; "...Le Alii e, o oe o le silafia loto o tagata uma lava, ia e faailoa mai poo ai so laua nei ua e filifilia

O manatu ma lagona e tutupu ae i le loto lelei o le tagata, e mautinoa foi le tali mai o le Alii e tusa ma ō latou mana'o. Ua silafia e le Alii lenei

potopotoga uma i o latou loto, ma le faamoemoe lelei mo le lumana'i manuia o le galuega faaaposetolo, lea na iu ai le vili ia Matatia. E leo se filifiliga faaletagata sa faia; ao le filifiliga sa tuu atu i le Atua, e tusa ma lona silasila mai i loto faatauana'u o ona tagata, ona o se manuia ua mautinoa o loo taoto i le lumana'i.

Uiga o Upu:

- i) Akeletama: O le fanua o le toto.
- ii) femaliua'i: fealua'i, mai lea nofoaga i lea nofoaga.

GALUEGA FAATINO:

E manaia foi ae faatino le mataupu e tamaiti. O lau susuga lava i le faiaoga e faia tofiga mo le faatinoina o le tala e pei ona faamatalaina. Saunia e lau susuga se maa mafolafola, lamolemole lelei mai le vaiata e faigofie ona vili mo le mataupu. Faailoga se pito e tasi o le maa e fai ma faasino vili.

PESE: Jesus loves me this I know

A'OA'OGA:

- 1. E tali mai le Atua i le loto gatasitasi o ona tagata.
- 2. Ia o faatasi o tatou loto ma a tatou tatalo i le Atua.

.....

ASO SA: 15 IULAI 2018

MATAUPU: IA FAI E OUTOU SE LOTO FOU

SINI: Ia a'oa'o tamaiti ia malamalama, a liliu ese le ua amio leaga i lana amio leaga ua masani ai, ma ua fai le amio tatau ma le amiotonu; Ua faaolaina e ia lona agaga.

TUSI FAITAU: Esekielu 18: 25- 32

FESOASOANI MO FAIAOGA:

Tamaiti, o le tusi o Esekielu, e tulaga tutusa ma le tusi o Faaaliga i le Feagaiga Fou. Aua o fa'aaliga na iloa e Ioane i le motu o Patamo, lea na ia faamauina i le tusi o Fa'aaliga. Ua faapena foi i le tusi o Esekielu, ona o fa'aaliga na iloa e Esekielu le atalii o Posai le ositaulaga; i le lima o tausaga ao iai o ia i le tafeaga i Papelonia, i le taimi o le tupu o Ioakina i Luta, ma Nepukanesa le tupu o Papelonia.

Fai mai Esekielu, ua na iloa atu le lagi ua avanoa, ma ua ia iloa atu foi fa'aaliga mai le Atua. O se isi la lea o vaaiga na iloa e le perofeta, o le faamasinoga amiotonu a le Atua. O se faamasinoga e lē faaituau. Ae faia faatatau i le tagata ma lana sa fai. A fai sa fiafia e fai le agasala, e fua foi le faaiuga a le faamasinoga i le mamafa o le agasala. Afai foi sa fai le amiotonu, o le a aumai foi se faaiuga fiafia e tusa ma lana amiotonu.

Poo le a lava la le faaiuga e aumai, ao le mea ua mautinoa, e le sao lava se tasi i lea faamasinoga amiotonu a le Atua. O le ala lea ua fai mai ai le nuu o Isaraelu, e lē tutusa ala o le Atua ma ala o le tagata. Aua o ala o le Atua e tonu ma sa'ō i taimi uma; ao ala o le tagata e femoumoua'i. Lea ua matuā faamanino mai e Esekielu le va'aiga i lea femoumoua'i. E lē avea le amiotonu sa iai e fai ma ona lafitaga, ina ua liliuese ae fai le amio leaga. E faapena foi le tagata sa fai le amio leaga, a ua ia liliuese ma fai le amio tatau ma le amiotonu. Ua mafai ona faaolaina e lea tagata lona agaga. Aua ua manatu lea tagata e liliuese mai lana solitulafono na fai, ae faasaga atu e faia le finagalo o le Atua. O le mea moni e ola lea tagata e lē oti; aua ua mafai e ia ona faia se loto fou mo ia lava.

O se ata faapenā o loo finagalo le Atua ia Esekielu, e ta'u atu i lona nuu o Isaraelu. Ina ia foi i le Atua. Ia liliuese i a latou solitulafono uma, ona lē faia lea o le agasala ma tausuai ai. Ia lafoa'i le agasala ma ia faia e i latou ni loto fou ma se agaga fou, ona lē oo lea o outou i le oti. O le a faaolaina le nuu uma pe a liliu mai i le Atua, ma faia lona finagalo ona le oo lea i le faanoanoa.

E le fia oo tatou tamaiti i se faanoanoa, pe afai tatou te lē usita'i ma lē faalogo i taimi uma. E toatele nisi tamaiti ua faigata ona liliuese mai ia uiga lē lelei, ma oo ai ini solitulafono matagā. Ao lea ua a'oa'o mai le tala sa faitauina mo i tatou; Afai o iai nisi o tatou o loo amio faapea; ua tatau ona tatou liliuese mai ia uiga lē lelei. Ia tatou tauivi ma o tatou loto ina ia mafai ona manumalo mo le Alii, ae lē o le pule sa'oloto ai o Satani. Fai mai Solomona le poto; “E sili le toa na te pulea lona loto i le toa na te aea le olo.” A mafai e i tatou tamaiti ona pulea o tatou loto, o le a lē faanoanoa i tatou, ae na o le ola fiafia i le faamanuia mai o le Atua. Loto fou na e fia faamanuia mai iai le Atua, ao le loto ma'aa ma lē faalogo, o le a lē maua e ia le fiafia e faavavau.

GALUEGA FAATINO: TALIGA FESILI:

Fetufaa'i ma tamaiti i fesili o loo mulimuli mai.

i) O le a le auga ma le faamoemoe o le vaega o le tusi lea sa tatou faitauina.

Tali: O le faamasinoga amiotonu a le Atua i tagata uma.

ii) Aiseā e fai mai ai le nuu o le Atua e lē tutusa ala o le Alii ma ala o le tagata?

Tali: O ala o le Atua o ala o le amiotonu, ao le tagata e fiafia i ala o le agasala.

iii) Fai mai le isi upu ua masani ai tatou; “E ai e matua le vine moto ae magiagia ai nifo o le fanau.” E sa'o lea i le mataupu o lenei Aso Sa?

Tali: Leai; e pa'u lava le agasala a le tagata na fai i ona luga. E faamasinoina le tagata lava ia e tusa ma lana sa fai.

iv) Afai sa tatou lelei muamua, a ua tatou agasa mulimuli? E lea lelei sa iai muamua e faamagaloina ai tatou.

Tali: Leai.

v) O le a se feau o loo momoli mai mo i tatou faia pea le lē usita'i i le Atua?

Tali: Ia faia e tatou se loto fou mo le Alii.

PESE: Pese 222 (Aue loto ua momomo.....)

A'OA'OGA:

1. Ia mafai e tatou ona suia o tatou loto tuai i se loto fou.
2. Ia tutusa ala o le tagata ma ala o le Atua.

ASO SA:
22 IULAI 2018

MATAUPU: **TATOU TE ILOA LE ATUA, PE A MAMĀ LOTO**

SINI: Ia a'oa'o tamaiti ia malamalama, o le loto mamā o le isi lea auala o le finagalo o le Atua, ia maua e tagata uma, tatou te mafai ai ona iloa atu le Atua.

TUSI FAITAU: Mataio 5: 8

FESOASOANI MO FAIAOGA:

E tusa ai ma le faataatiaga o le tala a le fai evagelia o Mataio; O loo amata lava i le gafa o Iesu. Sosoo loa ma lona fanau mai. Ona tuuina atu lea ia Ioane ina ia papatisoina. Sosoo ai ma le aveina atu i le vao i aso e fa sefulu mo ona faaosoosoga. Ina ua manumalo Iesu i nei faaosoosoga, ona amata ai loa lea o lana galuega e pei ona afio mai ai i le lalolagi. O le faaolaina o agaga, faamalolo i e mafatia ma e mamai, ae tualuga i le faaolataga mo le lalolagi uma.

Ao lei amataina lea galuega alofa i le lalolagi, na mua'i tusi aao Iesu i le toasefulu ma le toalua e fai ma ona soo, e fesoasoani ma vaavaai i ana galuega uma o le a faia, e a'otauina ai i latou mo le galuega i le lumana'i.

O le mataupu la lea e lima tamaiti, fai mai ua silasila atu ma le alofa le alii i le motu o tagata, ua lolofi ane mo le fia faalogologo i ana a'oa'oga ma faamalologa o soo se ma'i, ma tutuli temoni e Iesu; ona o latou o a'e lea i luga o le mauga, ua nofo o Ia i lalo, ua fetalai atu ma a'oa'o atu ia te i latou.

E iva ni faaamuia o loo taua e Iesu e faatautu i ni mafatiaga o loo maua ai o tatou tagata. Aua o ia faaamuia na fetalai ai i lena vaitau, ao mafatiaga foi ia o loo tutupu pea i o tatou tagata. O le fa'aamuia lona ono la lea sa tatou faitauina. O le fa'aamuia mo tagata e loto mamā. Tagata ia fai mai le fetalai a Iesu latou te iloa atu le Atua. Ao le a le mea e ta'u o le loto mamā? E mafai ona tatou iloa i le tagata e lē ita i le isi ona uso a tagata. E tiga lava ona fai mai e isi tagata ni gaioiga poo ni mea leaga e tiga ai lona loto, ae lē mafai a ona ita. Na te lē faia se mea e leaga, pe tautau leaga foi i se isi tagata. E lē naunau o ia i mea faatauvaa. E lē tauto faaoleole. Le ituaiga tagata lea e fiafia lava ia i taimi uma. E filemu ma amio lelei i taimi uma. E lē o le palai, ao le tagata ua na mafaia ona pulea lona loto mai faafiatauli e aafia ai le loto. Fai mai le tusi o Eperu 12: 14; “Ia outou tausisi i le filemu ma tagata uma lava, i le ma le amio lelei; a aunoa ma lea, e leai se tasi na te iloa atu le Alii.” O lona uiga, e le gata ina maualilē le ola faatuatua o lea tagata, a o le a ia iloa atu le mamalu silisiliese o le Atua. Fia maua ni tamaiti faapea i le tatou aoga Aso Sa ma le tatou nuu a tamaiti? O lona uiga, a faapea uma tamaiti i nuu ma aoga uma a le malō, aoga tumaoti ma aoga a lotu, o le a lē toe iai ni vevesi i le va o aoga e pei ona tutupu i le taulaga. A o le a tele foi ni manuia faasoa mai o le Atua i ai tatou uma, i le lumana'i.

GALUEGA FAATINO: (Tauloto)

E manaia foi ae fa'aoga le avanoa lea, e faatalatalanoa ai le vasega i faaamuia a le alii o Iesu, lea e amata mai le fuaiupu e 3 e oo i le fuaiupu e 11. Ma e mafai foi ona fai ma fuaiupu tauloto mo le vasega, e manatua ai lea faaamuia ma lona tau e maua e le tagata.

PESE: Faitau le Tusi Paia ma tatalo i aso uma.

A'OA'OGA:

1. Faamamā o tatou loto tatou te iloa atu ai le Atua.
2. Aua tatou te ita i mea faatauvaā o lenei olaga.

.....

ASO SA: 29 IULAI 2018

MATAUPU: UA LILIUERE LE LOTO O SOLOMONA MAI LONA ATUA.

SINI: Ia a’oa’o tamaiti ia malamalama, o Solomona le tupu na ole atu i le Atua ina ia foa’i mai le loto matala, na te faia ai le faaiuga amiotonu i lona nuu o Isaraelu. Peita’i, ua avea lea malamalama ma ala ua liliuese ai lona loto mai lona Atua.

TUSI FAITAU: 1 Tupu 11: 9 – 13

FESOASOANI MO FAIAOGA:

Fai mai le Atua tamaiti ia Solomona i le mataupu 9; 6; “Afai e te liliu ese, a e le toe mulimuli mai ia te au, o outou ma ō outou fanau, ma outou le tausia a’u poloaiga ma a’u tulafono ua ou tuuina atu i o outou luma, ae o atu outou ma outou auauna atu i atua ese, ma ifo atu ia te i latou; ona ou faaumatia lea o Isaraelu ai le fogaeleele.....”

Lea ua taunuu le mea lea na featalai ai le Alii ia Solomona tamaiti, aua o le amataga o le mataupu leni e 11, o loo faamatala manino mai ai le mana’o o le tupu i fafine ese e toatele, e ese mai le afafine o Farao. Fai mai o nei fafine, e o mai i nuu faapaupau. E ese atua latou te tapua’i ai. O lona uiga e lē talitonu i le Atua o Isaraelu.

Fai mai ua matua le tupu o Solomona, ua faigofie foi i nei fafine ona liliuese le loto o Solomona mai lona Atua, ae tapua’i atu i ō latou atua. O lona uiga, ua le tasi se Atua e tapua’i iai le tupu, ao atua uma o nei fafine faapaupau. Ona toasa lea o le Atua; auā ua liliuese lona loto mai le Alii le Atua o Isaraelu. Le Atua na foa’i ane ia te ia le loto mataala e pei ona ia

ole atu ai, ina ia mafai ai e ia ona faia faamasinoga tonu i lona nuu o Isaraelu. Fai mai tamaiti na fa'aali faalua ane le Atua ia Solomona. O se avanoa e matuā faamausaliina ai lona talitonuga i le Atua soifua; ma ua tatau ai ona faamalosiā le ola tapua'i o tagata i le Atua. Ma le fa'aaogaina tatau o lona potō na ia ole atu ai i le Atua, e matuā faamautuina ai le sootaga lelei o le aiga o lona tamā o Tavita ma le Atua. A ua avea lona potō na maua mai le Atua, ua ia pule soona fai ai, ma ua galo ai le Atua o ona auga-tamā.

Ona fetalai ane lea o le Alii ia Solomona, ua ia faapea atu; “Ua ia te oe lenei mea, ua e lē tausia foi la'u feagaiga ma a'u tulafono na ou poloa'i atu ai ia te oe, o le mea lea ou te sae'eseina ai le malo ia te oe, ma foa'iina atu i lau auauna.” O le a le uiga o lea fetalai a le Atua tamaiti ia Solomona; O lona uiga o le a aveeseina le malō mai ia te ia. E leai foi se tasi e tupuga mai ia te ia e soloa'i ane i le nofoalii o le tupu, ae o le a foa'iina atu i lana auauna. Lea na iloa ina ua sae sefululuaina e Akia le perofeta o Sailo le ofu fou sa ofu ai Ierepoamo le auauna a Solomona. Ona fai atu lea o Akia e ave ma Ierepoamo saega e sefulu e pei ona fetalai ai le Atua ia Solomona. Lea lava na taunuu ia mea uma ina ua vaeluaina le malō. Ua ō ituaiga e sefulu ma le lua i le itu i matū, ma ua faaigoa o Isaraelu. Ae totoe ai ituaiga e lua i sauté, lea ua faaigoaina o Iuta; E faamanatu ai le alofa o le Atua i le tupu o Tavita ma lana nofoaiga, na mamalu ma paia ai le aai o Ierusalemā. Ioe tamaiti, e afaina o tatou gafa pe a aveesea pe liliueseina o tatou loto i le Atua. O le a afaina ai o tatou so'otaga faaletagata, pe a motusia o tatou so'otaga ma le Atua soifua, ina ua tatou lē talitonu i lona alofa mai iai tatou, ae tatou liliu atu e faia o tatou lava loto. Ia tumau o tatou loto i le Atua, ona fa'aauau lea o manuia faasoa mai o le Atua i nisi e tupuga mai ia i tatou i le lumana'i ma fa'aauau ai pea le va fesoota'i lelei o tatou tagata ma le Atua. A o le e tumau ia te Ia i le faatuatua ma le faamaoni, e maua e ia le ola e faavavau.

Uiga o Upu:

- i) toasa: lē fiafia, ita
- ii) liliueseina: liliu ese, fulitua i mea sa masani ai.
- iii) poloai: avea'i, faatonuga

iv) saeeseina: aveese, lē toe iai se sootaga

GALUEGA FAATINO: PASO

Fa’aaoga le paso e saili mai ai upu o loo i le lisi.

toasa, liliuese, faaali, faalua, poloa’i, auuana, saeeseina, filifilia.

p	o	l	o	a	i	a	e	i	o
s	a	n	i	e	s	e	e	a	s
a	u	f	g	l	m	n	p	s	f
n	l	i	l	i	u	e	s	e	a
u	t	v	h	e	o	u	f	n	a
a	i	l	i	f	i	l	i	f	l
u	k	p	s	e	l	p	s	r	u
a	a	e	i	v	t	o	a	s	a

A’OA’OGA:

1. Ia tumau i le Alii lou loto, e manuia ai lou olaga.
2. O le loto atu i le Atua e faatumauina ai sootaga lelei.

.....

MANATU TAIALA O AOKUSO:

FAI LE MEA E FINAGALO I AI LE ATUA

O le finagalo o le Atua, o le mua e lē fuatia ma le tao e velo i le maninoa. O lona finagalo, e tatau lava ona faataunuaina. Fai mai le tali a Saulo ia Samuelu e tusa ma le finagalo o le Atua; “..... Na ou faalogo i le siufofoga o le Atua; A ua au maia e le nuu o mamoe ma povi, o mea sili e fai ai taulaga i le Alii le Atua.” O le finagalo o le Atua ia Saulo ia faaumatia uma Amaleka (o tagata atoa ma manu). E lē finagalo le Atua e osi se taulaga ia te Ia ini manu mai le vete. A o le alofa o le tagata i le Atua, e sili lea i lo le

taumafai mai o le perofeta o Hosea, i se auala ina ia faamanatu i o tatou tagata; aua o le faamanatu ia Isaraelu, o tatou lava lena. E tatau ona tatou salamo, ae aua le agasala pea.

Fai mai le vaega sa fautauina, o Efaraima ma Iuta sa sili ona lelei i le Atua. A ua sili foi ona leaga i le Atua ona o le agasala. O le ala lea o le inainā o perofeta iā latou upu, e fai ma sasa iai latou, ma le faamasinoga a le Atua e alu atu e faamalamalama le agasala ua oo iai le nuu uma. E le o le toasa o le Atua, ao le alofa faamaoni i ona tagata. Le alofa lea o le Atua e sili i lo le taulaga, e pei foi ona faamauina i le tusi o 1 Samuelu 15: 20- 24, i le tala i le lē usita'i o le tupu o Saulo i le finagalo o le Atua. Le alofa lea o loo finagalo le Atua e maua e lona nuu ona lē tigaina lea e faitaulaga.

O le taulaga tamaiti, o le mea ua masani ai le nuu o le Atua e pei ona faia mai le feagaiga tuai; O taulaga e ave ai le viiga ma le faafetai i le Atua, ma le taulaga e faia mo le faamagalogaina o se sese ua faia e le nuu i luma o le Atua.. Ua faamoemoe lava i le taulaga e magalo ai le ola agasala. Le agasala na amata mai ia Atamu, ua latou pelogia foi le Atua. Ua tā'ua Kiliata o le ata o le aai amio leaga, le fao mea ma le fasioti tagata i le ala i Sekema. Ua iloa foi le faitaaga ia Efaraima, ua leaga uma ai Isaraelu. O Iuta foi, ua tuu e ia le seleselegāsaito mo ia lava, ina ua faafo'isia mai le tafeaga.

O ata ua mautinoa ai le fulitua o le nuu i le Atua. Ua galo le alofa lavea'i o Le na aveina ae i latou i le sa'olotoga, ao lea ua faaalua lo latou le alolofa i le Atua. Ua faamoemoe lava i le taulaga e magalo ai mea uma. Ao lea ua a'oa'o mai le tala tamaiti, e le o le taulaga e sili, ao le alofa e pei ona alofa mai o le Atua iai tatou, e ala ia Iesu Keriso lea na faaolaina uma ai le lalolagi agasala, i lona toto na faamaligiina i luga o le satauro, ona o oe ma a'u ma le lalolagi uma. Manuia tele outou le fanau.

GALUEGA FAATINO:

Faatulaga sa'o fuaiupu o loo mulimuli mai, e tusa ma le faasologa o le tala sa faitauina.

1. Auā ua pei o le puao la outou amio lelei.
2. Ua a'u iloa i le aiga o Isaraelu le mea e matuā leaga.

3. Auā o le alofa out e loto iai ae le ola taulaga.
4. A ua latou soli le feagaiga e pei o Atamu, ua latou pepelo ia te au i lea mea.
5. O Kiliata o le aai lea o ē fai amio leaga o loo leaga i le toto.
6. O le mea lea ua ou fasia ai i latou e le au perofeta.

Tali: 1, 6, 3, 4, 5, 2.

PESE: Le alofa o le Atua, pei o se lio tele.

ASO SA:
12 AOKUSO 2018.

MATAUPU: (Aso Sa o Tamā)
‘O LE TAMĀ FAI AIGA LELEI’

SINI: Ia a’oa’o tamaiti ia malamalama, o le tamā o le ulu ia o le aiga. E faamoemoe ia te ia le lelei ma le leaga o le aiga. E fanau mai i se ta’ita’iga a se tamā lelei se aiga manuia ma ola fiafia.

TUSI FAITAU: Kenese 13: 1 - 18

FESOASOANI MO FAIAOGA:

O le a le uiga o lea fa’aupuga; ‘Tamā fai aiga lelei,’ Tamaiti, e tofua lava tatou ma le faavasegaina o tatou tamā, i le tulaga o iai i totonu o aiga. Poo se tama lelei, poo le lē lelei foi. E iloa vaega ia i lana ta’ita’iga i totonu o tatou aiga. O se tama lelei, na te faamalieina itu uma e mana’omia e le aiga. E faamuamua ona tagata, ae leo lona mana’o e faamuamua, ae faamulimuli lona auaga.

O le tala lea sa faitauina mai le Tusi o Kenese; sa fetalai le Atua ia Aperamo, e alu atu i se nuu na te faasino ane ia te ia e nofo ai. Na alu lea o Aperamo ma ave lona tamā o Tara, o Sarai lona toalua, ma Lota

le atalii o lona uso o Arana. Na o agai atu i Arana, ona tausii ai lava lea e le toeaina o Tara ia Lota.

Ona nonofo lea oi latou i Kanana, ma maua ai e le oge. Na fai e Aperaaamo le tonu ma oo ai i Aikupito. Ona faatigaina lea e le Atua ia Farao ona o Sarai le avā a Aperaaamo; ona ia tuuina atu lea o Aperaaamo ma lana ava ma ana mea uma sa ia te ia. Ua toe foi mai i latou ma nonofo ai i Peteli.

Fai mai ua mauoa tele lava o ia i manu, ario ma auro. O Lota foi sa ia te ia mamoe ma povi ma fale ie, ma ua lē mafai ai ona la mau faatasi. O le faafitauli ua tula'i mai, ua femisaa'i a laua leoleo mamoe. Ona faapea lea o Aperaaamo ia Lota, ia aua lava nei o la femisaa'i faapei o la leoleo mamoe. Fai mai na vave ona iloa e Aperaaamo le fofo o lea faafiatauli; Ona ia faapea atu lea ia Lota; E faasino le itu o le fanua e fia nofo ai, ina ia aua lava nei femisaa'i i laua ma a la fanau ma la auauna. Fai mai ua filifili e Lota le itu i Sasa'e o le laufanua, e laugatasi ma lafulemū e oo atu i Soara. O le itu lea, o loo iai Sotoma ma Komoro ma le vaitafe o le Ioritana. Ua vaai Lota i le lelei ma le lafulemu o le taoto mai o lona laufanua; Ae leo vaai i le tamaoaiga e maua mai i lona palapala. Ona agai lea o Lota ma lona aiga uma, o ana manu ma ana auauna e nonofo i Sasa'e i le mea ua ia filifila.

A o Aperaaamo, o le a agai o ia ma lona aiga i Sisifo. Fai mai o Kanana lea. Ua fetalai ane le Alii ia te ia, o le laueleele ua ia iloa atu, o sasa'e , sisifo, o le itu i matū ma le itu i Toga, o le a faia mo ia ma lana fanau e faavavau. O le laufanua e le o iloa pe faape'i sona tamaoaiga. Ai o le fanua lea na fetalai ai le Atua ia Aperaaamo; e tula'i ma alu i se fanua na te faasino ane e alu iai. Manatua foi tamaiti, o Aperaaamo o se tagata e faatuatua tele i le Atua. E le o popole la i se mea, o loo soifua le Atua na te foa'i le manuia i le laueleele mo ia ma lona aiga.

O se ata lelei lea o se tamā fai aiga lelei; o le ata o se ta'ita'i lelei. Ua ia le faasino lona lima i le mea ua ia loto iai mo Lota, aua nei faapea Lota e le mana'o iai. A ua tuu i lana filifiliga sa'oloto. O le mea e totoe, mo ia lea ma lona aiga. E le o popole i se fanua mo ia ma lona aiga. Ae faamoemoe i le Atua e lē oge i se mea, o le laueleele ma lona tamaoaiga, e oo lava i tagata.

Fai mai na lelei i le Atua le faaiuga a Aperaaamo na fai. Ona faamanuia lea iai o le Atua. Ua fetalai le Atua; “..... auā o le laueleele uma ua e iloa atu

nei, ou te foa'iina atu ia te oe ma lau fanau e faavavau. Ou te faia foi lau fanau e pei o le efuefu o le laueleele.....” Faamanuiaga e maua e se tamā fai aiga lelei. O lona uiga la tamaiti, a sao o tatou ala i luma o le Atua e ala i lo tatou faamoemoe ma faalagolago tasi atu i lana faasinomaga, o le a manuia tatou ma augatupulaga o mulimuli mai. O le finagalo lea o le Atua ia i tatou, ia tatou savavali i ona ala ae le o ala o le tagata. Ia fai e i tatou ni faaiuga lelei e maua ai le fealofani o tagata ma le nofo lelei, ma le filemu o le Atua i totonu o aiga, o nuu, Ekalesia, o aoga faapea foi i faalapotopotoga, ona manuia lea o tatou e faavavau.

GALUEGA FAATINO: TALIGA FESILI

i) O le a se mafuaaga na ala ai ona nonofo eseese Aperaaamo ma Lota?

Tali: Ina ia tumau i laua i le fealofani, ma a laua fanau e oo lava ia laua auauna.

ii) Aiseā na manatu ai Lota e fia nofo i le itu i Sasae o le laufanua?

Tali: Lafulemu ma laugatasi le laueleele i le vaai.

iii) O fea tuaoi o le laueleele ua mana’o iai Lota?

Tali: Mai le Ioritana e oo atu i Soara.

iv) O ai ni nuu logologoā i le faitaaga ma le ifo i tupua o loo lavea i le fanua ua mana’o iai Lota?

Tali: Sotoma ma Komoro.

v) O fea tonu o le laufanua ua nofo ai nei Aperaaamo ma ua faatu ai lona fale ie?

Tali: Ua mau o ia i aluna o Mamere o i Heperona.

PESE: Le alofa o le Atua e ofoofogia.

A’OA’OGA:

1. O le Atua le Tamā sili i ō tatou aiga.
2. E iloa se tamā lelei i le manuia e maua e lona aiga.

.....
ASO SA: 19 AOKUSO 2018

MATAUPU: NAUNAU E FAI LE FINAGALO O LE ATUA

SINI: Ia a’oa’o tamaiti ia malamalama, o le finagalo o le Atua e lē faataute’e iai se tagata. O le finagalo e finauina e tagata uma, ina ia faamanuia mai ai o Ia iai tatou o naunau e faatino mea uma e tusa o lona finagalo.

TUSI FAITAU: Ioane 4: 31- 38

FESOASOANI MO FAIAOGA:

O tatou tamaiti, e faamoemoe mea uma i o tatou matua. E fa’aalia foi lo tatou naunau ina ia faamalieina se mea o tatou faananau iai. E oo ina tatou matutua ma ua iloa fuafua lelei le mea e ao ona fai, ua faapena foi ona naunau e faatino le mea ua manatu iai. O le mea ua iloa nei, a tatou mananao i se mea, tatou te tagi lava seiloga e maua mai, ona faatoa filemu lea. E naunau le loto seiloga e faamalieina lona mana’o.

Fai mai ua uma ona fetautalatalaa’i o Iesu ma le fafine Samaria tamaiti; ona ō ane lea o ona soo ia te Ia i tuā pa ma ua fai ane ia Iesu; “Rapi e, ina taumafa ia.” O lona uiga; “Le a’oa’o e ina taumafa ia.” Ua faapea upu a le au soo tamaiti, auā na latou iloa le Alii o tautalatala ma le fafine Samaria. O le aai lea, e fai si toatele o tagata Samaria o loo ola ma nonofo ai. E le o iloa e nei so’o le galuega sa faia e Iesu i lea tamaita’i Samaria, ua mafai ai ona faaolaina lona agaga. A o se auala foi lea e oo atu ai le faaolataga i isi tagata Samaria. Na alu ma le fiafia lea tamaitai ina ua faaolaina lona agaga e le Alii.

Ua tali ane Iesu e tusa ma le mana’o o ona soo; o loo ia te Ia taumafa latou te leiloa.’ Ona fetautalatalaa’i lea o ona soo, pe na sau se tagata ma se mea

taumafa ma le alii. Na silafia e Iesu lea mea, ona Ia ta’u atu lea o lana mea e a’i; ‘o le finagalo o le na auina mai o Ia ma faaiu lana galuega.’ O le finagalo o Iesu, e maona le tagata faatuatau i afioga a le Atua. E pei foi ona tusia e Mataio i le faaososoga o Iesu e le tiapolo. Fai mai o Ia; “E le na o mea e ai e ola ai le tagata, a o afioga uma e tulei mai i le fofoga o le Atua.” O le isi lea uiga o le tagata e fai ma soo moni; E lē popole i se mea e ai ae naunau e fai le finagalo o le Alii.

Fa’auuau le fetalaiga a le Alii, na Ia tauā ai le toe fa masina i le oo ai i le seleselega. Ina ia vaavaai atu i le eleele ua sinasina i le seleselega saito. O le a le uiga o le fetalaiga a Iesu? O le masina o Novema, e tele ina totō ai le saito. E oo atu ia Tesema ua togo ae ma ola lelei ona o le tau. O le toe fa la o masina o loo taua e Iesu, e tau mai ia Tesema e oo ia Aperila, o le masina tonu lea e selesele ai le saito. Ae o loo faatatau le fetalaiga a le alii, i le vaai atu ua togo ae le saito. O loo faatatau i le faatuatua o tagata ua tupu ma ua amata ona mana’omia le fafagaina pea i meai faaleagaga. Manaomia le faatupu teleina ma faatalitali i le taimi o le seleselega.

O tagata selesele la, o loo faatatau i ona soo, ma so o se tagata lava o loo i lea tumutumu e mafai ona faia le finagalo o lona Tamā o i le lagi. O le finagalo o le Alii, ia matuā tapu’e agaga ia ua fia maua le ola faale agaga, lea e iai ma le fafine Samaria sa fetaia’i ma le Alii i le vai eli. O le ala lea o le faapea o le Alii; “E ese le lulu saito, ese le selesele.” O saito o loo faatatau i le upu a le Atua ua ola ai le tagata. Le upu lea o loo laugaina e Iesu, ia nofo lelei ma taliaina e tagata. Ao le faatupuina o lea upu i le loto o le tagata, e manaomia ai ni selesele saito lelei. E pei ona ia naunau atu ai i ona soo, ina ia naunau e faia le finagalo o lona Tamā oi le lagi, mo nei agaga ina ia tupu ma ola ma ia tumau ai e oo i le faavavau.

GALUEGA FAATINO:

Faatumu avanoa i upu o loo i le lisi; (finagalo, selesele, fetautalatala’i, seleselegasaito, Rapi,)

“..... e, ina taumafa ia.”

Ona lea o i latou; pe na au mai e se tasi sana mea e ai.

“O lau mea e ai, ia ou faia le ma faaiu lana galuega.

Ona fetalai atu lea o Iesu, ua toe fa masina i le
Ua ou auina atu outou e i le mea sa outou lē galulue ai.

Tali: (Rapi, fatautalatalaa'i, finagalo, seleselegasaito, selesele.)

PESE: Fetalai mai le Alii ia ou lagona pea. (Pese a Fagatogo)

A'OA'OGA:

1. O le faia le finagalo o le Alii, e maua e ia le ola e faavavau.
2. Ia fai i tatou ma ave feaa'u i le tala lelei.

.....

ASO SA: 26 AOKUSO 2018

MATAUPU: IA O ESE MAI LE IFO I TUPUA'

SINI: Ia aoao tamaiti ia malamalama, o le ifo i tupu o le agasala i luma o le Atua. E leai sona aogā, e leai foi sona uiga; Aua e lei fai e se tupua se faaolataga mo i tatou, e ala i se talisuaga e pei ona faia e le Alii o Iesu Keriso.

TUSI FAITAU: 1 Korinito 10: 14- 22

FESOASOANI MO FAIAOGA:

O Paulo o le tusi tala o le tusi lenei i Korinito. O loo faaalua ai lona lagona e tusa ma lana vaai i le mea o loo tupu i Korinito. O le isi lea faafitauli tele o loo vaaia i le aai, o le tele o le mau faatusa ua fai ma tapuaiga a tagata. E le gata i lea, ao tupua faaleiloga ua fai ma vaisu i le ola o le tagata lava ia. O le ala lea o le naunau o le Aposetolo e faailoa le vaega lea i lana tusi lenei, ona o le manatu alofa i nei ola o le a maumau i nei talitonuga. O le mea moni tamaiti, e lē maua e nei tagata se olioli i le ola e faavavau; ae o

le a pa'u'u atu i le malaia e faavavau. O le manatu alofa o Paulo i tagata, e lē tatau ai ona tuu fau, ae tatau ona a'oa'oina i latou i le finagalo alofa o le Atua.

Ua matuā faailoa e Paulo lona alofa i tagata. O le ala lea o le tusi atu, ina ia latou sosola ese mai le ifo i tupua. E lē o le manatu o le aposetolo o le a ō ese ma mea o nonofo ai, ao le loto ia matuā faapogisaina i le ifo i tupua, a ia faamalamalamaina i le alofa o Iesu Keriso. Le alofa na iloa i le talisuaga mulimuli na ia saunia ma ona soo; na maua ai le sakalameta o le faamanatuga o loo tatou faataunuaina i masina taitasi. Fai mai Paulo; “O le ipu o le faafetai o loo tatou faafetai ai nei, o le tatou auai faatasi lava lea i le toto o Iesu Keriso. O le areto tatou te tofitofi ai, o le tatou iai faatasi lava lea i le tino o Keriso.” O le ipu o loo faatatau i le toto, ma le areto, o le tino o le Alii na faamomomoina ona a tatou agasala. O le faaolataga lea na faia e Iesu e lē faaluaina. E ui lava ina toatele i tatou oi le lalolagi, ma nisi augatupulaga o loo fai mai, ae lava ma totoe i tatou uma i lea faaolataga. Ua faatusaina e Paulo le faigataulaga a Isaraelu. O le mea moi, e iai taimi e fai ai taulaga e le tofu ai le nuu ma le fata faitaulaga. Ao le taulaga lea na saunia e Iesu, poo le a le toatele, e fiu e aai ma feinu, e maoona ma malilie tagata uma, pe a faatuatua ma talitonu faamaoni i lea faaolataga a Iesu Keriso.

O le eseese la lea o le tupua o loo ifo ma tapua'i iai le toatele, ma Iesu Keriso o loo tatou talitonu iai. Aua ua iloa Keriso i lana faaolataga, ao le mea ua faia e tagata mo nei tupua, ua faia e i latou mo temoni. O lona uiga, o le ifo i tupua, o le mafuta faatasi lava lea ma temoni. O le ala lea o le manatu o le aposetolo, e tatau ai ona sosola ese ma le ifo i tupua. Aua e matuā leai lava se avanoa e mafai ai ona inu se tagata agasala i le ipu a le Alii. E lē mafai foi ona ai lea tagata i le laoai a le Alii.

Tamaiti, o le ala lea e papatisoina ai i tatou, ma faia au sailiili, ina ia faamautuina ai o tatou tagata i le ola faakerisiano, ina ia tatou feinu ma aai faatasi ma le Alii i lana laoai paia o le faamanatuga, ina ia tatou lagonaina pea lea alofa i taimi uma o lo tatou ola.

Ia manatua, e tele tama'i atua o le tagata lava ia ua faigatā ai ona avea i taua ma Kerisiano. A o lē e talitonu ma tumau i le faaolataga a Iesu Keriso, e maua e ia le ola e faavavau.

GALUEGA FAATINO: Taliga Fesili

i) O fea na ave iai le tusi lea a Paulo?

Tali: Na ave i Korinito

ii) O le a le mea lea e naunau le Aposetolo e sosola ese mai ai tagata?

Tali: O le ifo i tupua.

iii) O fea e oo iai le tagata pe a ifo i tupua?

Tali: E alu i seoli

iv) O le a le ipu lea e taua e Paulo o loo tatou faafetai ai nei?

Tali: O Iesu.

v) O le a le taimi o le tapuaiga tatou te faalogo ai i upu ia; ‘... o le ipu lea o le feagaiga fou i lo’u toto..... o lo’u tino lea ua tofitofi e fai ma faamanatuga ia te outou....’

Tali: O le faamanatuga.

PESE: 158 (Iesu e ou te fia fai)

A’OA’OGA:

1. Aua le ifo i tupua ae talitonu i le faaolataga a Iesu Keriso.

2. Ia tatou talisua faatasi ma le Alii i lana laoi paia.

.....

MANATU TAIALA SETEMA MA OKETOPA:

LE ALII E, A’OA’O MAI A’U I LE TATALO.

O le tatalo o le tasi lea auala tatou te fesootai tu’usa’o atu ai i le Atua i soo se mea tatou te manana’o pe popole ai, atoa ai ma mea tatou te viia ma faafetaia ai le alofa ma le agalelei o le Atua. O le mea taua e tatau ona tatou iloa lelei, a’e tatou te le’i tatalo atu i le Atua, ua uma lava ona silafia e le Atua manatunatuga ma mafaufauga oi o tatou loto. E ao ai foi la ona o tatou manatuaina, le Silisilese ma le mamalu o le Atua o lo o tatou vivii ma tapuai iai.

O a lava mea tatou te popole ma atuatuvaile ai, ia tatou tuu uma i le Atua e ala i le tatalo ma faamoemoe i le Agaga o le Atua, na te musumusuina ma aoaoina i tatou, ia tatou iloa ona faia o soo se mea e faapena foi i le tatalo.

**ASO SA: 2 SETEMA 2018
(ASO SA O LE TALALELEI)**

**MATAUPU: O LE TALALELEI MO TAGATA
UMA.**

SINI: Ia a'oa'o le fanau ia malamalama, o le Talalelei e le faapitoa mo na'o se vaega o ni tagata, ae peitai o le talalelei lava ia e avanoa mo tagata uma.

TUSI FAITAU: Mareko 16: 15-16

FESOASOANI MO FAIAOGA:

Tamaiti, o le a foi lea tala ua ta'ua o le Talalelei? Ioe, e tele ituaiga o tala eseese a tamaiti? o tala e fiafia ai, o tala e faanoanoa ai, tala tau-faasese, tala fatu, tala moni, ma isi lava ituaiga o tala eseese ua masani ai tatou a tamaiti?

Ae o le Talalelei lava ia tamaiti, o le tala i le oo mai o le malo o le Atua, o le tala i le maliu o Iesu lo tatou Alii faaola i luga o le satauro, atoa ai ma lona toetu manumalo mai le oti ma le tuugamau, lea ua maua uma ai e i tatou le leleiga ma le Atua sa le lelei, ona o le tele ma le anoanoai o o tatou faaletonu ma agasala i luma o le Atua. O le faamoemoe ola foi lea mo tagata Kerisiano uma i le lalaolagi, ma, afai e tutumau ma faatuatua faamaoni i tatou uma ia te ia, lona uiga o le a fai i tatou uma ma tagata o le malo o le Atua.

O le molimau foi lea a Mareko i le Tusi sa o tatou faitauina, lea sa fetalai ai Iesu i ona soo ia o atu i le lalolagi uma e tala'i atu le Talalelei i soo se tagata, ma papatiso atu i le Suafa o le Tamā, ma le Alo ma le Agaga Paia. Tala'i atu ua uma ona totogiina e Iesu agasala a tagata ola uma, ma, o i latou e talia o ia talitonu ma faatuatua faamaoni ia te ia e faamagaloina i latou e ia. O i latou tonu foi ia e maua le avanoa e mafuta faatasi ai ma le

Alii i lona malo e faavavau, peitai, o e latou te teena ma lē talia o ia e faasalaina i latou e ia.

Tamaiti o le uiga lea o le Talalelei mo tagata uma, o le alofa tunoa o le Atua e avanoa ma tatala mo tagata uma lava. Ia manatua e foai mai lava e le Atua ia te'i tatou o lana fanau e ala mai i le malosi o le mana o le toetu, le Agaga tatou te o atu ai e talai le Talalelei i tagata o lo o ola pea i le pogisa. O le matafaioi lea a'i tatou uma o Kerisiano, o tatou lava o so'o o Keriso faapei ona poloai mai ai lo tatou Alii o Iesu.

GALUEGA FAATINO:

Tali mai i fesili nei:

1. O le a le Talalelei?

Tali: O le Talalelei o le tala i le oo mai o le malo o le Atua, o le tala i lona maliu ma lona toetu manumalo mai le oti ma le tuugamau, O le fa'aaliga manino lea o le alofa tunoa o le Atua e ala i le faaolataga na ia saunia ua fai lava lea ma faamoemoe ola mo tagata uma.

2. O le a le uiga o le upu, Talalelei mo tagata uma?

Tali: O lona uiga, o le faaolataga na saunia e le Atua e ala mai i lona alofa tunoa, e le faapitoa mo na'o se vaega o ni tagata, ae mo tagata uma lava, o le matafaioi foi lea a tagata uma, o le tala'i atu o le Talalelei i e o lo o ola pea i le pouliuli.

3. O le a se taua o le Talalelei mo'i tatou?

Tali: O le taua o le Talalelei, ua mafai ai ona toe faalelei lo tatou va ma le Atua, afai tatou te talitonu faamaoni ma tumau i le Talalelei e uiga ia Iesu, ona mautinoa lea e mafuta faatasi i tatou ma Iesu i lona malo e faavavau.

PESE: Talai le tala moni. (Pese ma Viiga, 185)

A'OA'OGA:

1. Ia avea i tatou ma e fiafia e tala'i le Talalelei ia Iesu Keriso.
2. E foai mai pea e le Atua le malosi i a i tatou e fai ai lana galuega, faatasi ai ma faamanuiaga mo i tatou uma.
3. E mafuta faatasi tatou ma Iesu i lona malo pe afai tatou te tutumau ma faatuatua i lana Talalelei.

TATALO:

Le Atua e, matou te faafetai ua maea la matou aoga Aso Sa i lenei taeao, faafetai mo le talalelei e ala i lou alofa tunoa o le faaolataga lava lea na e saunia mo'i matou uma. Matou faatoese faamagalalo i matou ona o le tele ma le anoanoai o o matou sese ma faaletonu ua faia pea i ou luma i lea aso ma lea aso. Alofa faamanuia mai lau Afio ma foai mai le malosi ia tei matou, matou te folafola atu ai pea ma talai le Tala lelei i tagata uma. Ona o Iesu ua matou tatalo atu ai nei Amene!

.....

ASO SA: 9 SETEMA 2018

MATAUPU: AUA LE FAALIALIAVALE A O TATALO

SINI: Ia a'oa'o le fanau ia tatalo ma le Agaga o le ava ma le mata'u i le Atua. Tatalo mai le loto e lelei, ia aua nei afaina ai se finagalo o se isi uso, a ia faia mea uma mo viiga o le Atua

TUSI FAITAU: Mataio 6:5-8 , Luka 18:10-14.

FESOASOANI MO FAIAOGA:

Tamaiti e faafefea ona tatou fesootai i le Atua o lē na faia i tatou ma mea uma o i le lalolagi? Faamata e mafai ona e vili i le Atua e fa'aaoga ai se

telefoni? E leai a tamaiti, na’o le tatalo e mafai ona tatou fesootai ai i le Atua a tamaiti? O le auala sili lea ua mafai ona a’oa’oina ai i tatou tatou te fesootai ai i le Atua. Ioe, tatou te tatalo i le Atua e faafetaia lona alofa ma lona agalelei ua ia puipui ma malutia lo tatou ola i ona aao alofa, aemaise ia faafetaia le Atua ona o le tele o ana faamanuiaga ua aumai moi tatou, ua tatou maua ai le ola ma mea lelei uma e tele ona o lona alofa tele mai mo’i tatou. E ao foi ona tatou faamaulalo ma faatoese i le Atua ona o o tatou sese ma agasala ua faia. Tatou tatalo foi ia faamanuia mai i tatou, ae le gata i lea ia faamanuia i o tatou matua, aiga, nuu, ma Ekalesia i Samoa ma le lalolagi atoa.

E eseese lava tagata ma le tapenaina o a latou tatalo pe a tofia e tatalo i ni sauniga faapitoa, o isi e tusi lelei i le pepa a latou tatalo, ona faitau lea pe a tatalo. O isi ua masani lava i upu e tatalo ai i luma o tagata, o isi e tele ina fa’aaoga alagaupu faa-Samoa i a latou tatalo, o nisi ua sii mai upu o le Tusi Paia e fa’aaoga i a latou tatalo.

I le Tusi sa tatou faitauina, o lea ua aoao mai Iesu i le faiga o tatalo, e le t̄aua foi le soona tele naua o upu o a tatou tatalo, e pei ona taua e Iesu. E faapena tatalo e masani ona faia e tagata faa-fia amiotonu, mai latou e fai mo latou le tutu i fetaulaiga ala ma tatalo ai. Ua tele ina fai mo viiga o tagata ‘ae le mo le Atua.

O le mea taua i le tatalo, o le Agaga o loo fai ai le tatalo. Ta’ua e Iesu, ae tatou te le’i tatalo, ua uma lava ona silafia e le Atua mea ua tatou mananao ai. E le’o se tulaga lelei foi pe afai e faatinoina tatalo i le Agaga o le fia sili ma le manatu faapito, e faapei o le tatalo a le faresaio lea na fai i le malumalu. Ua ia tusitusilima fua i le telona poo le ao-lafoga ma faaleaga ai fua lea uso. Ae fai mai na sili atu ona fiafia le Alii ma talia lelei le tatalo a le telona, aua na ia tautino lona lava tagata ma faatoese i le Atua ia alofagia o ia o le tagata agasala. O le ala lena na tau-amiotonuina ai lana tatalo. Ioe, lea lava ua faata’ita’i mai e lo tatou Alii o Iesu le tatalo e fua agai iai a tatou tatalo pe oo ina o tatou tatalo i lo tatou Tamā oi le lagi.

GALUEGA FAATINO:

Tuu se lima minute i tamaiti e tusi mai ai ni a latou lava tatalo pupuu, pe tusa ma le lima pe ono laina le umi, ona faasolosolo ane lea e faitau atu i luma o le vasega a latou tatalo.

PESE: Fai sau tatalo i le taeao

A’OA’OGA:

1. Ia fai a tatou tatalo ma le loto mama ia faafetaia ma viia ai le Atua.
2. E le taua le soona faa-uumi o upu o a tatou tatalo ae tatou te le o ola ai.
3. Aua nei galo i a tatou tatalo ona tatou vivii, faafetai, faatoese, ma ta’u atu o tatou manao i le Atua.

TATALO:

Faaiu le mataupu i le tatalo a le Alii.

.....

ASO SA: 16 SETEMA 2018.

MATAUPU: UA TOE ATAMAI NEPUKANESA

SINI: Ia a’oa’o le vasega ia malamalama i le mafuaaga na ala ai ona toe atamai Nepukanesa.

TUSI FAITAU: Tanielu 4: 34-37

FESOASOANI MO FAIAOGA:

Tamaiti, o le a le isi upu e tutusa ma le upu atamai? Ioe, o le poto a tamaiti? O le a foi le amataga o le poto tamaiti lea e fai mai ai le Faataoto? Ioe, O le matau i le Atua, o le amataga lea o le poto a tamaiti? (Faataoto 1:7)

E faapena le tulaga na oo ia Nepukanesa tamaiti, o Nepukanesa sa avea ma tupu o le malo tele o Papelonia i le vaiata pe tusa o le 605-535 TLM. O le tulai mai la o Nepukanesa, sa ia faatoilaloina ai le tele o malo e aofia ai ma le malo o sã Iutã. O le ala lea na latou ave faatagata o taua ai tagata o sa Iuta i Papelonia e aofia ai ma Tanielu ma ana uo e toatolu.

Sa fai le faalepo poo le miti a Nepukanesa ma sa na’o Tanielu na mafai ona ia faamatalaina lea miti. Sa faailoa iai e Tanielu i le tupu tulaga uma o le a oo ia te ia ma lona malo e tusa ma lana miti sa fai. Sa fautua foi Tanielu i le tupu ina ia tuu le agasala a ia talitonu i le Atua Silisiliese o loo afio ile lagi, peitai e le’i taliaina e le tupu fautuaga a Tanielu ae sa fai lava lona faamaualuga.

Ioe, talu ai ona o le malosi tele ma le tamaoaiga o le malo Papelonia i na ona po, i le taitaiga a Nepukanesa, na avea a lea ma ala na faaosofia ai pea o ia i manatu faasausili ma le faamaualuga e pei ona sa tatou faitau iai, lea na savali ai i lona maota ma ia faapea ane, “e le’o Papelonia tele e’a lenei na a’u faia i lou malosi tele lava, e fai ma fale o le malo, ia viia ai lo’u mamalu”.

Fai mai a’o tautala o ia, o le siufofoga ua tulei mai le lagi ua faapea mai, “Nepukanesa e le tupu, e tulia oe ia te’a ma tagata, e te mau faatasi ma manu o le vao, e te ai i le mutia e pei o povi, e mavae atu ai ou tausaga e fitu, seia e iloa, ua pule le Silisili ese i le malo tagata.

Ioe, fai mai na taunuu ia mea uma e pei ona tulei mai ai le siufofoga mai le lagi. Ina ua maea tausaga e fitu, fai mai ua toe faasaga ae mata o Nepukanesa i le lagi, ua ia salamo i lona fia sili ma lona faamaualuga sa iai, ua lagona lona faatauvaavaa ma lona sese, ona toe atamai ai lea o ia ma ua vivii i le Atua Silisiliese e ou le mamalu ma le mana ma le pule aoao uma lava.

GALUEGA FAATINO:

Tuu se avanoa i tamaiti e tusi mai ai ni a latou parakarafa pupuu pe lima i le ono laina, e faamatala mai ai poo le a le atamai, ao le a foi se aoga o le atamai i le olaga o le tagata?

PESE: O le potō e taua i le olaga o le tagata.

A’OA’OGA:

1. Ia tatou toaaga i le lotu ma le aoga, susesue ma tatalo i le Atua ina ia tatou maua le atamai.
2. O le tagata e fiafia e ola i le pouliuli ma le agasala, o lona uiga e le'o i a te ia le atamai mai le Atua.
3. O le potu ma le atamai o faamanuiaga ia mai le Atua ia viia ai lana Afio.

Faaiu le mataupu i se tatalo.

.....

ASO SA: 23 SETEMA 2018

MATAUPU: UA FAAFOFOGA LE ALII I LE LEO O ELIA.

SINI: Ia malamalama tamaiti, e faafofoga pe faalogo mai le Atua i leo o ana auauna, faapei foi ona faafofoga i le leo Elia.

TUSI FAITAU: 1 Tupu 17:17-24

FESOASOANI MO FAIAOGA:

Talofa tamaiti, o manuia uma mai outou i lenei taeao? Ia lelei, o le a foi le tatou mataupu tamaiti i lenei Aso Sa? Ia lelei, fai faatasi: **Ua faafofoga le Alii i le leo o Elia.** O le a foi le uiga o le upu faafofoga a tamaiti? Lelei, ioe, o le upu faaaloalo lena o le faalogo a tamaiti. O ai e masani ona o tatou tautatala faaaloalo iai? Ioe, o o tatou matua, o ni tagta ese poo ni malo foi e o atu i le tou aiga, o e matutua, aemaise lava o le faifeau ma le faletua a tamaiti?

A o ai la Elia? Ioe, sao lelei, o le auauna a le Atua, ia poo le perofeta a le Atua? O le perofeta tamaiti e tutusa lava ma le faifeau, o ia lea na te tau atu le finagalo poo le feau a le Atua i tagata.

Fai mai sa iai se tasi tinā e i le nuu e igoa o Sarefata i le aai o Saitonu, ma sana tama tama e toatasi lava, o le tinā lea e ese le loto alofa i le perofeta

lenei o Elia. Na alu atu Elia agai i le nuu lea e iai le fafine lea, ona fia taumafa ai lea o ia ma fia inu' Fai mai e ui ina sa laitiiti si toega o falaoa sa totoe ae sa ave lava e le fafine lenei ma Elia, aua na fai atu iai Elia e aumai aua le popole. E faatupu pea e le Atua le falaoa atoa ai ma le suauu i le fagu mo i latou. O lea sa fai ai loa a latou areto ma aai ai, ae sa tupu pea le falaoa ma le suauu i le fagu e le uma.

I se tasi la aso, e i ai le mea na tupu, fai mai ua ma'i lava le tama a le fafine lenei, ma ua faafuasei a ona oti ai o ia. Sa matuā faanoanoa tele lenei tinā ma ua tele ana tala ua fai agai i le auauna a le Atua auā e na'o le toatasi lava si ana tama a'o lea ua oti. Sa tago atu loa Elia ua sii mai le tama ma ua ave i le potu e i le pito i luga o le fale, ma ua ia tatalo loa i le Atua ina ia toe faaola le tamaititi ua oti. Sa tatalo pea Elia i le Atua ma iu ai loa ina faafofoga le Atua i le leo o Elia ma ua toe faaola ai e le Atua le tama a le fafine Sarefata lenei. O ina na matua talitonu ai le fafine e moni lava e faafofoga le Atua i upu ma tatalo a ana auauna. Sa ia faapea ane ai loa ia Elia ua ou iloa nei e moni lava o oe o le tagata o le Atua.

GALUEGA FAATINO:

Tali mai i fesili nei:

- (1) O le a lea tagata e ta'ua o le perofeta?
- (2) E fea e sau ai le perofeta lenei o Elia?
- (3) Faamatala le ituaiga tina e iai le tina lea na oti lana tama?

PESE: Le faafofoga tatalo e;

A'OA'OGA:

1. Ia avea i tatou ma e fiafia e auauna ma faia le finagalo o le Atua.
2. E faafofoga le Atua i leo o ana auauna faamaoni.
3. E mafai mea uma i le fesoasoani mai o le Agaga o le Atua ia i tatou.

.....

ASO SA: 30 SETEMA 2018

MATAUPU: IA TATALO MO Ē TALA'I LE TALALELEI.

SINI: Ia a'oa'o tamaiti ia toa'aga e faamasani ma ia iloa le taua o le ola tatalo. Ia faamoemoe i le mana o le Agaga Paia e mafai ai mea uma. Ia fiafia e tatalo mo ē o tala'i le Talalelei ina ia tuputupu lauolaola pea lana Ekalesia i le lalolagi, aemaise ia liligi mai ana faamanuiaga mo tagata o le Atua e aofia ai i tatou uma lava.

TUSI FAITAU: Roma 15: 30 – 33

FESOASOANI MO FAIAOGA:

Talofa tamaiti, o a mai outou? Lelei o ai o manatua le tatou mataupu i le vaiaso ua te'a? O le a la se a'oa'oga na maua mai ai i lena mataupu mo i tatou? Ia lelei tamaiti! O le tatou mataupu la i le taeao lenei, fai faatasi; **IA TATALO MO Ē TALA'I LE TALALELEI.**

O ai i latou o lo o faia lea galuega o le tala'i o le talalelei? Ioe, o misionare, o faifeau ma faletua, a'oa'o, tiakono, ia ma i tatou uma ā o e ua ta'ua o Kerisiano a tamaiti? Ia lelei. O lea sa o tatou faitau i le Tusi Paia lea o loo ta'u mai ai le manao o le Aposetolo o Paulo i ona uso a kerisiano o loo i

Roma ma soo se mea lava, ina ia tatalo mo ia, a o sauni atu le Aposetolo e fia malaga i Roma se'i asi ona uso a kerisiano o loo iai. O le malaga a Paulo agai Sepania, ae fia malaga ma ave atu ni foa'i po'o ni meaalofa mo e o puapugatia o loo i Ieruselema auā o le taimi lea o loo iai o ia i Koronito.

Tamaiti, o le tasi foi lea galuega a le Aposetolo, e le gata o ia ua ofoina atu e fai ma ave feau na te tala'i le Talalelei i nuu ese, (nuu e ese mai le nuu o le Atua), a'e o le isi foi galuega lea a le Aposetolo, o le agalelei e tau momoli meaalofa mo i latou o e puapuagatia ma manaomia le fesoasoani o loo i Ieruselema. Ua silafia lelei e le Aposetolo le faigata o le a oo iai, ona o le vaitau tonu lea o loo tulai mai le malo o Roma e pulea lea itu o le lalolagi. O le malo na malosi i le faaoo o sauaga i le au-Kerisiano, o le malo foi lea na o latou faasatauro ma faaoo le maliu i lo tatou Alii o Iesu.

Ioe, o le faanaunauga tele lea ma le talitonuga maumautūtū o le Aposetolo o Paulo, e mafai e le mana o le Agaga o le Atua e ala mai i le tatalo a le au Kerisiano faatuatua, ona faataunuuina o so o se mea faigata, aemaise o le galulue ma talosia faatasi se faamoemoe e manuia ai.

O le taua lea o le ola tatalo tamaiti, o le mea mautinoa, poo ai lava e maua i puapuga ma faigata, ia tatou iloa lelei o le tasi lea o a tatou galuega lelei e fesoasoani ai mo i latou, o le tatalo i le Agaga o le Atua e lavea'i ma faasao i latou o maua ma aafia i puapuga ma faigata. Tamaiti ia tatou toa'aga e tatalo mo e tala'i le Talalelei ina ia fai i tatou ma e fesoasoani i le galuega a le Atua.

GALUEGA FAATINO:

Faafetaui upu ma o latou uiga ua ta'ua atu i lalo.

Paulo	Agaga Paia
Kerisiano	faatoga i le Atua
Foai	Aposetolo o nuu ese
Tatalo	puapuga
Mafatia	meaalofa
Fesoasoani sili	o e talitonu ma mulimuli ia Iesu Keriso

A’OA’OGA:

1. Ia tatou fiafia e tatalo mo nai o tatou uso puapuagatia ia manuia i latou.
2. E taunuu manuia olaga o i latou, o e fiafia e ola tatalo ma mafuta i le Atua.
3. Ia tatou iloa ona ofo atu meaalofa ma agalelei atu i isi o tatou uso puapuagatia.

.....
(Aso Sa 7/10, 14/10, 21/10 Tuuaga Lotu Tamaiti)

ASO SA: 28 OKETOPA 2018.

MATAUPU: UA TALIA E LE ATUA LE TATALO A ESEKIA

SINI: Ia a’oa’o le fanau ia iloa le taua o le faamaoni i soo se tiute e tuuina atu e fai, ia fiafia e auauna ma ola alofa i so o se tagata. Ia su’esu’e, galulue ma tapuai i le Atua i le Agaga ma le faamaoni, aua e talia lelei e le Atua tatalo a i latou o e galulue faamaoni, savavali i le amiotonu ma faia lona finagalo.

TUSI FAITAU: 2 Tupu 19 : 35-37.

FESOASOANI MO FAIAOGA:

Talofa tamaiti, o a mai outou i lenei taeao? Manuia uma tatou a tamaiti? Ia lelei, o ai foi le faaola o tatou a tamaiti? Sa’o lelei o Iesu le fa’aola o i tatou uma a? Ioe o Iesu ua mafua ai ona o tatou maua le ola ma le malosi a tamaiti? E faafefea la ona fai le tatou faafetai ia Iesu mo le ola ua tatou maua? Ioe, o le tatalo a tamaiti? O ai e masani ona tatalo ona moe ai lea? Ioe, e le gata ina tatou tatalo faafetai ia Iesu mo le ola ma le malosi ua

tatou maua, ‘ae mafai foi ona tatou tuu atu i le Alii soo se mea lava tatou te mananao e fesoasoani mai ai Iesu ia i tatou a tamaiti?

E faapena le tulaga na oo ia Esekia le tupu o Iuta, fai mai ina ua ta’u atu ia Esekia o lo ua siomia i latou e ‘au-tau a Asuria atoa ai ma upu tau faifai ma le tau-faafefe ua fai mai e le tupu ma tagata Asuria ia Esekia. Ioe tamaiti, faimai e leai lava se isi vaifofo na tapa iai Esekia ua na’o le tatalo loa i le Atua ina ia alofa e fesoasoani ma faasaoina mai i latou mai le malosi ma le sauva o le malo Asuria.

Sa faailoa e le perofeta o Isaia ia Esekia ua talia e le Atua lana tatalo. Tou te iloa la outou tamaiti, fai mai i le po lava lea na afio ifo ai le Agelu a le Atua i le api a Asuria ma fasioti le to’a selau valusefulu lima afe o fitafita a le malo Asuria. Na matua faatei’a ē na totoe ai ina ua latou feala a’e ma vaaia lea tulaga matautia ua tupu. Fai mai na matua faatumuina i le fefe le tupu o Asuria i le mea ua oo i lana ‘autau, ma o le ala lea na sola ai loa o ia Nineva. Ua matata’u tagata uma i le mea matutia ua fasiotia ai le faitau afe ma afe o fitafita a Asuria, ina ua talia e le Atua le tatalo a Esekia.

GALUEGA FAATINO;

Tali mai i fesili nei:

(1) O ai Esekia o loo taua i le tala?

Tali: O Esekia o le tupu o sã Iuta.

(2) Aisea na popole ai Esekia na ala ai ona tatalo i le Atua

Tali: Sa popole o ia i upu tau faifai ma le tau faamata’u a le tupu o Asuria.

(3) O ai na iloa ai e Esekia ua talia e le Atua lana tatalo?

Tali: O le perofeta o Isaia na ia tauina iai.

(4) Aisea na sola ai le tupu o Asuria?

Tali: Ua fefe ona ua foeti le toatele o ana fitafita.

(5) E faafefea ona oo le oti i fitafita Asuria?

Tali: Na afio ifo le agelu a le Atua ma faaoo le oti ia i latou.

PESE: Jesus is a winner man.

AOAOGA:

1. E le o se mea lelei le ola faamaualuga.
2. E faasaoina e le Atua o e tapuai atu i lana Afio i le Agaga ma le faamaoni.
3. Ia tuu i le Atua o tatou mafatiaga e ala i le tatalo.

TATALO: Faaiu le mataupu i se tatalo.....

MANATU TAIALA NOVEMA: O LE UPU A LE ATUA E MAMANA.

Sa i le amataga le Upu, sa i le Atua le Upu, o le Atua foi le Upu, (Ioane 1:1-2). Ua leva ona i ai i o tatou faitotoa le Upu a le Atua. O le Upu e mamana na foafoaina ai e le Atua le lagi ma le lalolagi ma mea uma o iai e oo lava ia i tatou o lana fanau. O Iesu o le atoaga lava lea o le Upu a le Atua, lea na faia le faaolataga mo le lalolagi agasala ma'i tatou uma. O le ata ma le faailoga manino lea o le Upu a le Atua e mamana.

ASO SA: 4 NOVEMA 2018

MATAUPU: FAALOGO MA TAUSI LE UPU A LE ATUA E MANUIA AI.

SINI: Ia a'oa'o le fanau ia fiafia e suesue ma savavali i le Upu a le Alii, ina ia saga faatupu atili ai pea le ola talitonu ma faatuatua i le Atua e manuia ai.

TUSI FAITAU: Luka 8: 9-15

FESOASOANI MO FAIAOGA:

Talofa tamaiti, malo le faamalolosi mai i le tatou aoga i lenei taeao.

Talitonu o loo manuia uma tatou i le tausiga a lo tatou Atua a tamaiti? O ai la se tamaitiiti lelei o ia manatua le tatou mataupu lea sa fai i le vaiaso ua te'a? Ia lelei, a'o ai la se isi o ia manatua se a'oa'oga na maua mai i le tatou mataupu lena? Ioe, sao lelei.

O le tatou mataupu la i lenei taeao tamaiti, **FAALOGO MA TAUSI LE UPU A LE ATUA E MANUIA AI.**

Lelei, O le a foi le isi ta'uga lea e ta'u soo ai e tatou le Upu a le Atua tamaiti? Ioe, sa'o lelei a! O le Tusi Paia a tamaiti, ia poo le Afioga Paia a le Atua. A'e, tou te iloa outou tamaiti, e iai foi le ta'uga o le vaega o le Tusi Paia lea na o tatou faitauina mai le evagalia a Mataio. O ai na te iloa o le a le ta'uga o faitauga ia e masani ona faaoga e Iesu i le tele o ana a'oa'oga? Ioe, o faataoto a tamaiti, lelei, O a foi ia mea e ta'ua o faataoto tamaiti?, Ioe, o faataoto o ni tala faa-faatusa ia o mea o le olaga nei, 'ae o loo aumai ai i totonu se feau taua faale Agaga mo so o se tagata e iloa lelei ona mafaufau, faauiga ma faaoga lelei ia a'oa'oga taua mo le olaga o so o se tagata. E faapena la le faataoto lea sa tatou faitauina a tamaiti. O ai na te iloa o le faataoto e faatatau i le a lea e taua mai i le tatou tusi faitau. Ioe, o le faataoto i le lulu-saito.

Ua faatusaina e Iesu le Afioga poo le Upu a le Atua i le saito na luluina e le lulu-saito. E eseese ituaiga o laufanua na luluina ai saito. O isi na luluina i le auala, o nisi saito na luluina i le mea papa, o nisi saito na luluina i le vao tuitui, a'o isi na luluina i le eleele lelei.

E eseese foi la ituaiga o vaaiga na iloa e le lulu saito mai vaega eseese nei. Ua faatusaina e Iesu saito na pa'u'u i le auala ia i latou o e na faalogo i le Upu a le Atua, peitai latou te le mauaina le Upu a le Atua, e mafua lea tulaga ona ua malosi le tiapolo ua aveesea ai mai o latou loto le Upu. O saito na luluina i le mea papa ua faatusaina ia i latou na talia le Upu ae e le'i tumau ai ona ua faaososoina e le fili ma le tiapolo ma ua o ese ai i latou ua leai ni o latou aa e mau ma ola ai. O saito na luluina i le vao tuitui ua faatusaina ia i latou na faalogo i le Upu 'ae ina ua feagai ma faigata ma puapuaga o le olaga ona faavaivai ai lea ma ua le fua lelei mai, peitai o saito na luluina i le eleele lelei fai mai o i latou ia ua faalogo i le Upu ma

tausi i ai ma le loto faamaoni. Ioe, fai mai, ona fua mai ai lea i fua lelei e tele ma le aoga. Tamaiti o fea le ituaiga o eleele e tatau ona iai tatou? Ioe, e tatau ona avea i tatou ma eleele lelei e pau iai le saito poo le Upu a le Atua ona fua mai ai lea o a tatou galuega i fua e tele, e lelei ma aoga e manuia ai i tatou.

GALUEGA FAATINO:

Vaevae le vasega i vaega e fa, ona faamatala mai lea e vaega taitasi ituaiga laufanua eseese na pa'u'u pe na luluina i ai saito, faamatala poo ai e faatusa i ai, po o le a le i'uga na oo iai, ae pe aisea foi ua faapea ai?

- (Vaega 1) Saito na pauu i le auala.
- (Vaega 2) Saito na pauu i le mea papa.
- (Vaega 3) Saito na pauu i le vao tuitui.
- (Vaega 4) Saito na pauu i le eleele lelei.

PESE: Faalogo ma usitai e leai se isi ala

A'OA'OGA:

1. Ia tausi i le upu a le Alii e manuia.ai
2. Tumau ma faatuatua i le Upu a le Alii.
3. Ia aua ne'i faaososoina gofie i tatou i mailei a le fili ma le tiapolo.

.....

ASO SA: 11 NOVEMA 2018.

MATAUPU: FIAFIA E FAITAU AFIOGA A LE ALII.

SINI: Ia faamanatu ma faailoa i fanau le taua o le fiafia e faitau Afioga a le Alii, aua tasi lea ki o le atamai ma le malamalama, o le lelei o le faitautusi, aemaise ia naunau e iloa le Talalelei ia Iesu Keriso e taiala ma tapasaina ai le olaga tuputupu ae o fanau.

TUSI FAITAU: Efeso 6: 10 – 20

FESOASOANI MO FAIAOGA:

Talofa tamaiti! O a mai outou i lenei taeao? Manuia uma tatou a tamaiti? Lelei, O ai la se tamaitiiti na te iloa o ai na tusia le Tusi lea sa tatou faitauina mai le Feagaiga Fou? Ia Tamaiti, o le Tusi lea ia Efeso na tusia e Paulo, le Aposetolo o nuu ese, ia poo Paulo foi lea na suia lona igoa mai a Saulo ina ua taia e le malamalama o Keriso i le ala i Tamaseko, o inā lea na suia ai loa ia Paulo ma avea ai o ia e fai ma Aposetolo e tala'ia le finagalo o le Alii.

O le tatou mataupu la i lenei taeao tamaiti, o lea sa tatou faitau i le Tusi Paia i upu faamalosi'au a Paulo mo le Ekalesia i Efeso. O le faamalosi a Paulo ia Efeso ina ia loto tetele i le Alii, ma e tatau ona oofu i latou i ofutau atoatoa mai le Alii e pei ona taua i le tusi faitau, faatasi ai ma seevae o le Talalelei, atoa ai ma le puloutau o le olataga, o aupega ia e fesoasoani ina ia mafai ai ona tetee atu i togafiti leaga a le tiapolo. Ae e faaopopo i ia mea uma, o le pelu lea o le Agaga, ia poo le Afioga Paia a le Atua, le Tusi Paia.

Ioe, e le mafai ona ofu na'o ofutau ae tuu le pelu o le Agaga. E tāua le pelu o le Agaga aua o le Afioga lea a le Atua. O le 'auga tonu lea ma le faapogai o faamanuiaga ma mea lelei uma tatou te maua, pe afai tatou te fiafia pea e faitau ma susesue le Tusi Paia ma savavali i ala tonu e tusa ai ma le Afioga a le Alii. Ua fai lava lea ma sulu i o tatou vae tatou te savavali ai i ala tonu ma le sa'o o le Atua, atoa ai ma lona malamalama i o tatou ala, tatou te iloa lelei ai ona faautauta tatau i mea uma, 'E le gata i lea a ia tatou faasusulu atu lona malamalama i e o loo ola pea i le pogisa, ina ia latou iloa le taua o le ola i le malamalama o le Alii e manuia ai.

GALUEGA FAATINO:

Faatumu avanoa i upu ua tuuina atu i lalo:

faatuatua, faamaoni, tetee, amiotonu, affioga, tala lelei, ofutau, faaolataga, tutumau.

O le mea lea ia outou tago ai i1..... atoaatoa mai le Atua, ina ia outou mafaia ona tutu ma2.....atu pe a oo i le aso vale, pe a uma foi ona outou faia o mea uma, tou te tutumau ai lava. O lenei, ina3..... ia outou o fusia o outou sulugatiti i le4.....; ia oofu foi outou i le ufifatafata o le5.....; ma ia faaseevaeina o outou vae i le sauniga o le 6 o le filemu; ia faaopopo i na mea uma ona tago atu i le talipupuni o le7.....; tou te mafai ai ona tinei o u fanafana mu uma lava a le o loo leaga. Ia outou ave foi le puloutau o le8....., ma le pelu o le Agaga, o le9..... lea a le Atua.

Faasologa:

1 = ofutau, 2 = tetee, 3= tutumau, 4 = faamaoni, 5 = amiotonu, 6 = tala lelei, 7 = faatuatua, 8= faaolataga, 9 = afioga.

PESE: Pese ma viiga; 170.

A’OA’OGA:

1. Ia tatou fiafia e faitau Afioga a le Alii e malosi ai lo tatou ola faatuatua.
2. E a’oa’o mai le Tusi Paia i o tatou ala e ola ai.

.....

ASO SA: 18 NOVEMA 2018.

MATAUPU: O LANA UPU E OLA AI TAGATA.

SINI: Ia a’oa’o ma faamanatu atili i fanau le taua o le Upu a le Alii. O le upu e ao ona tausia e tagata uma ma ola ai, “aua e le na’o meaai e ai e ola ai, ao mea uma e tulei mai le fofoga o le Alii e ola ai tagata”.

TUSI FAITAU: Teuterename 8: 1 – 9

FESOASOANI MO FAIAOGA:

Ia lelei, tamaiti, o le tatou mataupu i le taeao lenei, (fai faatasi): **O LANA UPU E OLA AI TAGATA.** O le upu a ai lea e ta'ua e ola ai tagata? Ioe, o le upu a le Atua a tamaiti! Lelei, o le a foi le isi ta'uga o le upu a le Atua tamaiti? Ioe, o le Tusi Paia ia poo le Afioga Paia a le Atua .

Ioe, fai mai i le o ese mai ai o le nuu o le Atua mai Aikupito, o le Atua lava sa taitaiina mai i latou i la latou malaga faaumiumi sa iai i le vao lea e fasefulu tausaga o i ai i latou. E le gata la sa faia e le Atua vavega tetele; e pei o le vaeluaina o le sami-ulaula ae savavali ai i totonu le nuu, ae sa latou iloa foi le ao faaniutu i le ao, ma le afi-faaniutu i le po sa taitaiina ai i latou, a'o alu la latou malaga i le vao, E le gata foi i lea 'ae sa fafagaina foi i latou e le Atua i le manai na toulu mai le lagi, atoa ai ma manu ua ta'ua o salu.

Ioe, o le finagalo o le Atua, ia le gata ina fafaga ona tagata i meaai faaletino, ae ia o faatasi foi ma le naunau i taumafa faa-le-Agaga ia poo le upu a le Atua. O le mea e ao ona matinoa ma iloa lelei e ona tagata, latou te mafaia ona fai o so o se mea, pe a faamoemoe ma faatuatua i le Atua, ae le o se isi lava atua poo se isi malosi ese.

Ae faafefea la ona iloa le faatuatua? Tamaiti, E iloa le faatuatua pe a galulue faatasi ma usiusitai i le upu a le Atua ua tuuina mai e limataitaina ai lana fanau. E ao ona tausisi i ai i le upu a le Atua ia ola ai ma savavali ai ona tagata, aemaise o la latou feagaiga na osia ma le Atua, (e fai i latou mona nuu, ae fai le Alii ma o latou Atua). Afai la e tutumau ai i latou i le upu a le Atua, ona mautinoa lea o le faamanuiaina e le Atua o le soifua ma le ola o ona tagata aemaise o e faatuatua faamaoni ma ola i lana upu.

GALUEGA FAATINO:

Tuu se avanoa i tamaiti latou te tusiina mai ai tulafono e sefulu i a latou api, amata mai le tulafono muamua e oo i le tulafono mulimuli. A mae'a, ona faasolosolo taitoatasi lea e faitau mai i luma o le vasega. A uma ona tauloto faatasi lea o tulafono e sefulu.

PESE: Saunia e le faiaoga se pese

A’OA’OGA:

1. E taua le faalogo i le Upu a le Atua ma ola ai.
2. Aua le naunau tele i meaai faaletino, ae galo meaai faale-agaga, ia poo le upu a le Atua.

TATALO: Faaiu le mataupu i se tatalo

.....

ASO SA: **25 NOVEMA 2018.**

MATAUPU: **E FAAPOTO TATOU E LE TUSI PAIA.**

SINI: Ia a’oa’o fanau ia fiafia pea e faitau ma suesue i Afioga Paia a le Atua, ia poo le Tusi Paia, ina ia a’oa’o ai, aoai ai, faatonu ai, ma faapoto ai i le amiotonu, .

TUSI FAITAU: 2 Timoteo 3: 10-17

FESOASOANI MO FAIAOGA:

Talofa tamaiti. O manuia uma tatou i lenei taeao a tamaiti? Ioe sa’o lelei a!, e tausia a i tatou i aao alofa o lo tatou Atua i aso uma a tamaiti? Lelei, o le tatou mataupu la i le taeao lenei, fai faatasli, “**E FAAPOTO TATOU E LE TUSI PAIA**”. O ai se tamaitiiti pototo a na te iloaina le tagata na tusia le tusi lea sa tatou faitauina. Ioe, o Paulo a tamaiti? O le tusi lona lua lenei a Paulo e ave i lona atalii faale-Agaga o Timoteo. Na tusia lenei tusi a’o iai Paulo i le falepuipui i Roma i le tausaga pe tusa o le 66 i le 67 tausaga tuana'i le Mesia. O Timoteo sa tofia e Paulo ma toea'iina e vaaia le Ekalesia i Efeso ia poo le avea foi lea o ia e fai ma faifeau o le Ekalesia i Efeso. O le Ekalesia i Efeso e i totonu o Asia itiiti (Asia minor). Sa avea ma se tasi o

taulaga iloga o le malo Roma e le gata mo ana upufai faalemalo ae sa avea foi ma ogatotonugalemu mo ana fefaataua'iga. O le ala lea o le aveina ai e Paulo o le tusi faamalosi'au e apoapoai ai i a Timoteo, ona ua tele tala'iga ma talitonuga sese ua foliga faasaga i ai nisi o le Ekalesia. O le faamalosi la a Paulo ia Timoteo, ina ia tumau pea i le faatuatua i le Alii o Iesu aemaise ia faaeteete ona o tala'iga sese ua ofi atu i totonu o Efeso talu ai ua tele tagata popoto ua lolofi atu ona o fefa'ataua'iga ma pisinisi o loo faia i Efeso. Taua e Paulo, o le mea pito sili lea ona taua o le tutumau ma le talitonu faamaoni i Afioga Paia a le Alii ua a'oa'oina ai o ia mai lava i lona ititiiti e ona tinā o Loi ma Eunike seia oo ina matua, fesoasoani ia Paulo ma tofia ai o ia e avea ma faifeau i Efeso. Poo a lava mailei a le fili ma tala'iga sese e ofi mai i totonu o o tatou nuu ma Ekalesia, ia faapea foi i tatou ona tatou tutumau pea i tatou i lo tatou faatuatuaga moni i le faaolataga na saunia e le Alii o Iesu mo tagata uma. O le fa'aaliga manino moni lea o lona alofa laveai mo i tatou. O lea ia tatou tutumau ai pea ma suesue atili i Afioga a le Atua e malolosi ai o tatou faatuatua ma popoto ai tatou i le upu moni.

GALUEGA FAATINO:

Faatulaga tonu mai upu ua tuuina atu i lalo ina ia maua ai ni fuaiupu sa'o.

- i) O Efeso o le Timoteo i Ekalesia i le faifeau.
Tali: O Timoteo o le faifeau i le Ekalesia i Efeso.
- ii) O le atalii o lona faale-Agaga a Paulo Timoteo i lona lua lenei Tusi.
Tali: O le Tusi lona lua lenei a Paulo i lona atalii faale-Agaga o Timoteo.
- iii) Ua sese ma talaiga i a'oa'oga totonu ua tele atu ofi o Efeso
Tali: Ua tele a'oa'oga ma talaiga sese ua ofi atu i totonu o Efeso.
- iv) O le aoai ai, amiotonu uma lava Atua ia, e aogā Tusi Paia faatonu foi ia e a'oa'o ai, e mai le ma faapoto ai i Agaga o le ai,

Tali: O Tusi Paia uma lava e aumai le Agaga o le Atua ia, e aogā foi ia e aoao ai, aoai ai, faatonu ai, ma faapoto ai i le amiotonu.

PESE: Faitau le Tusi Paia ma tatalo i aso uma.

A’OA’OGA:

1. Ia tumau i le faatuatua ma talitonu i le talalelei ia Iesu Keriso tatou te ola ai.
2. Aua ne’i taitaiina gofie i tatou i talaiga sese ua iai i nei ona po.
3. Ia ava ma matau i le Atua o le amataga lea o le potō.

TATALO: Faaiu e lau susuga i se tatalo.

.....

MANATU TAIALA TESEMA: O LE MESIA VALOIA

O le upu Mesia o lona uiga o lē na fififilia, ia poo lē na faau’uina. O le talitonuga ma le faamoemoega maualuga sa manatu iai tagata Iutaia, e iai le taimi e Afio mai ai lo latou Mesia e lavea’i ma faasao i latou mai le ola toilalo e pei ona sa iai i le taimi na pulea ai i latou e le malo Roma. E toatele Perofeta na o latou valoia le Afio mai o le Mesia, e pei o Isaia, Hosea, o Mika, ma isi. O lo latou manatu e Afio mai o ia e pei o se toa malosi na te faatoilaloina malo malolosi o lo o ola toilalo ai i latou, ae leai, e ese foi faiga a le Atua, o auala na liutino tagata mai ai i le lalolagi, atoa ai ma le faaolataga na ia saunia lea e atagia ai o se auala maualalo ma le faatauvaā na ia fa’aaogaina. Peitai e ui ina e faatauvaā ma inosia e tagata ia auala ae na matua toe faamaualugaina e le Atua lona suafa e sili i suafa uma, ma avea o ia ma tupu silisiliese o le na saunia le faaolataga mo le lalolagi agasala.

.....

ASO SA: 2 TESEMA 2018.
ASO SA AFIO MAI (Advent Sunday)

MATAUPU: UA VALOIA LE AFIO MAI O LE MESIA.

SINI: Ia a’oa’o fanau ia malamalama o le afio mai o le Mesia sa muai valoia mai e perofeta a le Atua anamua. Pe tusa o le 742-687 tausaga lumanai le Mesia na valoia ai e le perofeta o Mika le afio mai o le Mesia.

TUSI FAITAU: Mika 5: 1-5

FESOASOANI MO FAIAOGA:

O le vaitau o le nofoaiga a Setekaia le atalii o Iosia lē sa avea ma tupu o le malo sã Iutã, i le 597-586 T.L.M, o le vaitau foi lea na tula’i mai ai le perofeta o Mika, lea sa ia valo’ia ai, e le tumau Ierusalemia i ona tamaoaiga ma lona matagofie e pei ona mitamita ai ona taitai ma ona tagata, peitai na ta’ua e Mika, e iai le taimi e faatafunaina ai sa Iutã e le malo Papelonia lea lava na iu a ina taunuu ina ua faatoilalo e Nepukanesa ma ana au sã Iutã, (2 Tupu 25:1,2). E lei gata ai i ina valoaga a le perofeta, ae na ia valoia foi le Afio mai o le Mesia, ia poo le na faauuina pe na filifilia na te faaola o le lalolagi, o ia lea o Iesu lo tatou Alii. O ia lea na te lavea’i ma faaola le lalolagi mai a latou agasala. O ia o le tupu mai le ituaiga o Tavita, o lona malo foi e tumau e faavavau lava lea. Na valoia foi e Mika le soifua mai o le tupu i le aai o Peteleema i Efarata lea lava na taunuu foi, aua o lea a sa fanau mai o ia i le falepovi i Peteleema. O le Afio mai la o le Mesia, o ia na te aumaia le filemu i loto o tagata o e talitonu ma faatuatua faamaoni ia te ia, lea e ui ina sa teena o ia e ona tagata, ma iu ai ina maliu o ia ma toe Afio i le lagi, peitai na taua e Mika o le toe Afio faalua mai o le Alii o Iesu na te aumaia ai le filemu i le lalolagi, aemaise o lona malo e faatumauiina lava lea e faavavau. E lata i le fitu selau tausaga na va a’i valoaga a perofeta a’e faatoa soifua mai le Alii o Iesu, ae pe tusa ma le fa selau tausaga e va a’i le Feagaiga Tuai ma le Feagaiga Fou, (inter-testamental period) ae o lea lava na taunuu mea uma e pei ona valo’ia mai e perofeta.

Uiga o Upu:

- i) T.L.M. Tausaga lumanai le Mesia
- ii) Perofeta O auauna paia a le Atua latou te valoia ma faailoa le finagalo o le Atua.
- iii) Mesia O le na filifilia, auauna faauuina.

GALUEGA FAATINO:

Tusi mai sau tala e tasi le prakarafa e faamatala mai ai poo a galuega a'e poo le a foi le taua o galuega a le Mesia e fai?

Ulutala: "O le taua o galuega a Mesia".

PESE: Pese Kirisimasi – 'Alalaga ia

A'OA'OGA:

1. E moni ma faamaoni valoaga na valoia mai e perofeta a le Atua.
2. Aua tatou te mitamita pe tatou te faamaualuluga, a 'ia tatou faamoemoe mea uma i le Atua.
3. Na Afio mai le Mesia e lavea'i ma faaola i tatou mai le agasala.

ASO SA:
9 TESEMA, 2018.

MATAUPU: **UA O ATU IESU MA ONA MATUA I AIKUPITO.**

SINI: Ia a'oa'o fanau ia malamalama lelei o le faaolataga, sa fuafuaina mamao e le Atua. 'Ae o le faataunuuina foi lava ia o valoaga na valoia e perofeta e pei ona o latou valoia ai le afio mai o le Mesia, lea e oo foi a i

le malaga a Iesu ma ona matua i Aikupito sa valoia foi e perofeta. (Hosea 11:1).

TUSI FAITAU: Mataio 2: 13 – 15

FESOASOANI MO FAIAOGA:

E soifua a'e Iesu i Petele'ema, a'o le taimi tonu lea o loo tulai mai Herota e avea ma tupu poo le taitai o tagata Iutaia lea na tuuina iai e le malo Roma i le vaitau poo le 37 T.A i le 4 T.A . O se tagata saua tele le tagata lenei o Herota, fai mai le tala e oo lava i lana lava fanau moni, sa ia fasiotiina lava, ona o lona le manao lea e iai se isi e foua lona tulaga faa-tupu e oo lava foi i nisi o ona tai-toalua. O le saua foi o Herota lea lava na iloa a ina ua ia faatonuina fitafita e faaoo le oti i pepe uma lava e i lalo o le lua tausaga le matutua i Peteleema atoa. O mafaufauga o Herota, 'ia fasiotia faatasi atu ai ma Iesu i le taimi lava lea e pei ona tau atu ai e makoi ia te ia Iesu ua fanau mai. Lea fai mai ina ua fesili atu iai makoi poo fea o fanau mai ai Iesu le tupu o tagata Iutaia, peitai e leai lava se tasi na ia iloina. O le mafuaaga lena na faatonuina ai e Herota makoi, 'afai ae o latou mauaina le mea o loo soifua mai ai Iesu, ona o latou toe foi atu lea e ta'u atu ia te ia, ae se'i alu atu e ifo iai ma ave atu iai sana meaalofa. Peitai e lei toe foi makoi ia Herota aua sa faailoa iai e le agelu e 'aua nei toe foi atu ia Herota, a ia sui le ala latou te toe foi atu ai i lo latou nuu. Sa manatu Herota e faaoo le oti ia Iesu aua o le ala foi lena na ia fasioti ai ona atalii ia 'aua lava nei toe iai se isi e foua lona tulai mai i lona tulaga o ia o le tupu o tagata Iutaia. Ae peitai, e silisiliese lava le finagalo o le Atua, o lona finagalo lea na ia musumusuina ma faailoa ai ia Iosefa le tama o Iesu e tula'i ma ave lona aiga i Aikupito, auā o loo saili Herota e fasioti ia te ia, se'ia iai se aso ona ia toe faailoaina atu lea o se taimi e toe foi ane ai i latou. Ioe, e saunia lava ma tapenaina uma e le Atua auala esesese e saogalemu ai lona atalii, auā o lona finagalo 'ia taunuu lava le faaolataga ua fuafuaina e ia, e faia mo le lalolagi agasala, e pei o le faamoemoe na Afio mai ai o ia i le lalolagi.

GALUEGA FAATINO:

Tali mai i fesili ua tuuina atu.

i) Aisea na o ai Iesu ma ona matua i Aikupito?

Tali: Na ala ona o Iesu ma ona matua i Aikupito ona sa saili Herota e fasioti ia te ia.

ii) O ai na ta'uina ia Herota o Iesu o le tupu o tagata Iutaia?

Tali: O le au-makoi sa o latou tauina ia Herota.

iii) O le a le upu a Herota na fai i le au-makoi?

Tali: Sa fai atu Herota i makoi, afai latou te mauaina le mea o fanau mai ai Iesu, ona outou toe foi mai lea e ta'u mai ia te au, ou te fia alu atu foi ou te ifo atu ia te ia ma ave atu iai sa'u meaalofa.

iv) Pe mata e moni le upu a Herota na fai i le au-makoi?

Tali: E leai e le moni le upu a Herota, aua sa ia fia fasioti ia Iesu.

v) Aisea na fia fasioti ai e Herota Iesu?

Tali: Sa manatu Herota ina ia aua lava nei iai se isi e sili atu i lo'o ia, ua na o ia lava le tupu.

PESE: PESE KIRISIMASI

A'OA'OGA:

1. Ia tatou sosola mamao 'ese mai mea leaga e ono a'afia ai lo tatou ola.
2. E taua lo tatou saili i le Alii e faapei ona faia e le au-makoi.
3. Aua tatou te ola faasauā i tagata a ia o tatou alolofa i e puapuagatia.

TATALO: Faaiu le mataupu i se tatalo.

.....

ASO SA: 16 TESEMA 2018.

MATAUPU: TALIA A’OA’OGA MA FAAMALOLOGA A IESU

SINI: Ia a’oa’o fanau i le taua o le faalogo, usitai, ma talia a’oa’oga a Iesu, aua e le gata ina malolo ai gasegase o i latou uma o e o loo maua i ma’i o le tino, ae malolosi ai foi Agaga o’i latou o e malolosi i le tino ae vaivai i le ola faale-Agaga.

TUSI FAITAU: Mareko 1: 21 – 28
FESOASOANI MO FAIAOGA:

‘Tamaiti, o ai foi na faia i tatou? Ioe, o le Atua lava na faia i tatou a tamaiti? Ia tamaiti, o le mea e ao ona manino i ai tatou, so o se mea lava, e ala ona mafua ona faia pe fausia se mea, lona uiga e tataua ona iai sona aoga ma se faamoemoe taua e ala ai ona faia. O le upu moni, e leai leai lava se tasi e fia maimau fua sona taimi e fai ai se mea e leai sona aoga i le olaga nei. E faapena foi tatou a tamaiti, na faia i tatou e le Atua i lona faatusa paia ma lona faamoemoe, ia foliga i tatou i le Atua i le tino mafaufau aemaise i le tulaga tau i le ola faa le Agaga. O lona finagalo ia iloa e i tatou ona toe faafoi atu i lana Afio le viiga, le faamanu ma le faafetai e tusa ma lona alofa fua mai ia i tatou aua o ia na faia i tatou. E manino lava i le tala o le foafoaga, o le Atua lava na faia mea uma oi le lagi ma le lalolagi.

I le tusi sa o tatou faitauina, o lo o ta’u mai ai a’oa’oga a Iesu sa faia i se tasi o sunako i le nuu o Kapanauami. Sa taufai ofo tagata uma na iai aua ua ia a’oa’o atu e pei o se tasi ua iai le pule, ua le faapei o aoao tulafono e pei ona masani ai i latou. Na iloa lea tulaga ina ua ia faamalolo i le tagata sa ulutinoina e le agaga leaga. O le mea e ofo ai o le usitai lea o le temoni poo le agaga leaga ia Iesu. O le faailoga lea o le iai o le pule ia te ia, ao se fa’aaliga manino foi lea tatou te iloa ai e moni lava na faia e le Atua mea uma e oo lava i agaga leaga, ia poo i latou ia o agelu na tulia ese mai le lagi e le Atua ina ua le usitai. O le ala lea ua omai ai i le lalolagi e faasese tagata ina ia pa’u’u faatasi atu ai i latou i le malaia. O le faamoemoe taua

foi lea o le Atua mo i tatou o palealii o ana galuega, ia tatou iloa ona usitai faalogo ma talia lona a’oa’o mai ia te i tatou e ala i ana Afioga Paia, ma ia tatou iloa ona vivii atu ia te ia i aso uma e le aunoa.

Tamaiti, o lea ua toe o se aga ona o tatou taunuu lea i le Kerisimasi, o le vaitau o le faailogaina o le soifua mai o Iesu, o le faailoga o le alofa tele mai o le Atua ia i tatou ina nei toatele i tatou e fano ona o le taufaasoa ma le taufaasese mai o le tiapolo. O le ala tonu lena na liutino tagata mai ai o ia e ala mai ia Iesu le Pepe o le Kerisimasi, ina ia ‘aua nei fano se tasi o i tatou, a ia maua e i tatou uma le manuia i le ola e faavavau. Manuia tele le Kerisimasi ma le Tausaga fou.

GALUEGA FAATINO:

Faatino le tala e pei ona sa faitauina mai le Tusi faitau o le mataupu.

PESE: PESE O LE KERISIMASI

A’OA’OGA:

1. Ia tatou faalogo, usita’i ma talia a’oa’oga a Iesu i o tatou olaga e manuia ai .
2. O Iesu lava ia o loo iai le pule aoao i mea uma i lugā atoa ma lalo nei.
3. Ua na’o Iesu e malolo ai o tatou mai uma.

TATALO: Le Atua e, maeu le tele o lou alofa mai moi matou o lau fanau, e le gata ina e faasino mai, a’oa’o mai, faatonu mai, ae ua e Afio mai lava i le lalolagi e lavea’i ma faasao i matou mai le tele o faaososoga a le tiapolo e taufaasese mai ia te i matou. Faafetai tele le Atua mo le tele o lou alofa mai mo’i matou e alai ia mea uma. Faamagalalo o matou sese ma agasala ua faia pea i ou luma i lea aso ma lea aso e ala i le toto paia o lo matou Alii o Iesu le na maliu mo i matou uma. Ia tumau atu pea i lau Afio le pule aoao ma le mana uma lava nei e faavavau faavavau lava Amene!

.....

IA MANUIA LE KERISIMASI & TAUSAGA FOU.